

民族詩選

民族詩選

林森署



森

中華民國二十六年七月初版

(37005)

中學適用

學生國
學叢書
民族詩選
注一册

每册實價國幣柒角

外埠酌加運費匯費

選注者 胡才甫

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

* 版 翻 *
* 權 印 *
* 所 必 *
* 有 究 *

(本書校對者曹鈞石)

凡例

1. 本編選詩，旨在發揚民族精神，表章忠義氣節，名曰民族詩選注，以應中等學校課內選本或課外讀物之需。

2. 本編以中等學生爲對象，選材不取長篇，注釋但期明簡。凡鴻篇鉅製詞義艱晦者，概從割愛。注釋以能說明辭意爲主，不繁列出處。

3. 選詩宗旨有三：一曰人，如岳飛、文天祥、瞿式耜、張煌言之類。或有詩雖平庸，亦間錄之。二曰事，如戴復古之咏真德秀、上萬言疏、林宋偉之咏姚興抗金死國、何夢桂之挽正節先生、汪元量之哀浮丘道人等。三曰詩，如陸放翁憂國之作，劉後村感舊之詩，劉麟瑞之昭忠詠，吳日生之六公咏，並忠義憤發，足資觀感。

4. 宋明二代，外患最深，且亡于異族，忠義死事，史不絕書，本編取材，以二代

爲主。

5. 作者事略，有關詩義，輒于詩前簡括稱引。其瑣屑言行出于篇中者，則列入注釋，以避繁冗。

6. 注釋以初見爲主，重見則書『見前某詩注。』

7. 詩有本事，注釋宜詳。凡原集所引，或散見他籍者，酌採附于詩前，以便讀者。

8. 史實浩繁，徵引容有未當；如蒙指謬，曷勝感幸！

中華民國二十六年三月

建德胡才甫識于之江文理學院之寓樓

目錄

劉子翬

偶書

巡寨偶書

四不忍四首

北風

朱熹

拜張魏公墓下

王履

臨雜歌

▲宇文虛中

在金日作三首

何 桌

在金營題詩

▲滕茂實

哀詞

▲哀隆德守臣張確

▲李若水

▲衣襟中詩

曾如驥

題考功印紙

▲曲 端

蜀中作

▲岳飛

題青泥市寺壁

送紫岩張先生北伐

誄適齋先生

寄浮屠慧海

題驃馬岡

范成大

會同館

州橋

▲陸游

聞武均州報已復西京

喜小兒輩到行在

送芮國器司馬

龍眼書馬

秋興

五月十一日夜夢覺而成詩

冬夜不寐至四鼓起作此詩

秋夜泊舟亭山下

燕堂春夜

秋郊有懷

冬夜聞角聲

秋思

△秋夜將曉出離門迎涼有感

△夜讀燈鐔錄感而成詩

十一月四日風雨大作

癸丑七月夢游

蘇軾二首

夢至洛中觀牡丹

題陽關圖

枕上偶成

暮春 三〇

不寐

客去追記坐間所言

△追憶征西幙中舊事四首

縱筆

△秋夜思南鄭軍中

客從城中來

△示兒△△△△△△△

陳傅良

除夜

送會繼先赴山陰路鈴三五

民族詩選注 目錄

楊萬里

讀罪己詔三首

樓 鑰

題龍眠畫騎射抱毬戲

送張定叟鎮襄陽

李伸之

獻帥府經歷

黃公度

和龔實之聞虜人敗盟

劉克莊

△感昔二首

書事

夢豐宅之

寄何立可提刑

贈防江卒

聞何立可李茂欽詩二首

題忠勇廟

王庭珪

爲徐獻之賦詩一首

送宣向卿

戴復古

讀真德秀萬言疏詩

題徐京伯北征詩卷

楊由義

弔王忠肅

林宋偉

題忠毅姚公廟四首

周泊

拜卞忠貞墓

陳文龍

元兵俘至合沙詩寄仲子

▲文天祥

紀事

杜架閣

題蘇武忠節圖

△過零丁洋

言志

答張元帥言成詩一首

過淮河宿闕石有感

送行中齋

亂離歌六首

許遠

顏杲卿

— 正氣歌

留燕周星爲賦長句

出獄時臨刑詩

何夢桂

挽徐應鑣

林景熙

題陸放翁詩卷後

夢中作四首

冬青花

聞家則堂歸自北寄呈

端午次韻懷古

讀文山集

雜咏酬汪鎮卿

民族詩選注 目錄

挽徐應鑣

雜咏

拜岳王墓

謝 翱

冬青樹引別玉潛

書文山卷後

梁 棟

哀毘陵

李謹思

題吟嘯集

贈李節婦

張 琰

出塞曲二首

黃誠性

挽文丞相

鄧剡

挽文信公詩

韓性同

岳王墓

▲謝枋得

初到建寧賦詩一首

辭洞齋華甫惠寒衣

和曹東谷韻

和葉愛梅韻

和游古意韻

魏天應

△送疊翁北行二首

蔡正孫

△送疊翁北行

王濟淵

△送疊山先生北行

張子惠

△送疊山先生北行

王奕

一〇〇

△送疊山先生北行

洪咨夔

挽疊山先生

△汪元量

錢唐歌

北師駐皋亭山

文山道人事畢

▲浮丘道人招魂歌九首（一）

▲鄭思肖

▲墨蘭

▲寫憤

書前後臣子盟檄後

語聲

咏制置李公芾

咏察使姜公才

咏都統王公安節

自題大義集後

寅辰歲旦歌

勵志

一礪

二礪二首

八礪

劉壘

丞相文信國公

潘音

悼文丞相

劉麟瑞

、丞相信國公文公

、湖南安撫李公

、淮東制置使李公

、丞相陸公

、樞密張公

、江東制置使謝公

、階州守臣董公

、丞相江公知府江公

、參政高公

徐世隆

挽文丞相

丁二〇

虞集

哭文山丞相

彭友信

文文山獄中遺墨

胡奎

悼文山

甘瑾

讀文丞相傳

金幼孜

讀文丞相傳有感

薛瑄

讀文山傳三首

陳獻章

題厓山奇石陰詩

厓山大忠祠詩

厓山弔陸公祠

楊一清

△謁睢陽協忠廟

程敏政

謁京口魏勝將軍廟

李夢陽

石將軍戰場歌

邊貢

謁文山祠

黃相

謁岳飛廟

周用

厓山二首

顧鼎臣

讀文文山傳用少陵韻

文徵明

一三九

詠文信國事四首

一四〇

朱魯

文丞相忠孝外傳詩二首

陳嘉謨

信國故園

許炯

厓山大忠祠

螺川望文丞相墳

梁有譽

一四五

厓門弔古

吳國倫

礪州弔古

吳旦

厓門弔古二首

鄭國賓

關西老將歌

黃謙

惶恐灘

歸有光

一五〇

題周冕贈任別駕卷三首

頌任公詩

沈明臣

凱歌

▲戚繼光

登盤山絕頂

陳 第

送戚都護歸田詩

周 詩

謁岳王墓

黃鳳翔

謁于少保祠

李之世

匡山弔古

方孔炤

井中鐵

▲袁崇煥

南還別陳總戎

鄭 瑛

汪懋忠七十從軍

孫承宗

謁太常楊椒山祠

朱繼祚

絕命詞

孫士美

守城作

袁繼咸

讀西臺慟哭記

雪日

▲左懋第

客燕

臨刑絕命詞

祁彪佳

臨難題案

吳應箕

閒看

▲黃道周

過新嶺

金鉉

拜文信國祠下

賀王盛

絕命詞

徐汧

三月十九日

張錫眉

絕命詞

陳良謨

絕命詩

陳函輝

臨終別親友二首

絕命詞五首

范景文

甲申殉難詩

許直

絕命詞

陳潛夫

絕筆

夏允彝

哀侯峒曾

黃淳耀哀詞

絕命詞

麻三衡

西山二首

△被執時題詩

張秉純

絕命詞

睦本

與蔣冷生醉吟

悼葛蒼公

吳可箕

題衣上詩

凌潤生

題衣絕筆

▲夏完淳

秋夜感懷

春興同錢大作

張肯堂

絕命詞

△張煌言

挽張鯤淵相國二首

弔沈五梅中丞

答張書紳范子瞻

書懷

追往

八月辭故里二首

吳易

△六公咏六首

從軍行

陸 培

絕命詩

吳爾壘

我行其野三章

題仁書後

二一〇

凌 駒

題衣

葛 麟

贈友人

上史閣部

文 乘

絕命辭

▲何騰蛟

二一四

述懷

二一五

▲瞿式耜

自警

浩氣吟八首

初六日紀事

自嘆示別山

二二〇

閏十一月初一夜放言三首

▲張同敞

和稼軒師浩氣吟八首

和稼軒師

二二五

答留守師二首

稿成寄僧

臨刑詞

萬 泰

東義扶

三月十九日二首

陳士京

酌刀

林棟隆

讀岳少保題壁

王樂師

聞諸路起兵信

莊元宸

絕命詞三首

▲王夫之

讀指南集

陸世儀

張睢陽廟

哭錢希聲

挽瞿稼軒

周岐

弔史道鄰

徐夜

弔謝皋羽

戴本孝

安遠侯隸卒

長干丐者

方以智

告哀詩

哭臥子

余颺

拜戚少保祠

韓繹祖

哭史公墓

常延齡

揚州

胡長庚

揚州

女丹生

乙將軍歌

▲黃宗羲

卓烈婦四首

三月十九日聞杜鵑

釣臺

蒼水

▲顧炎武

王太監墓

哭歸高士

井中心史歌

歸莊

哭仲兄爾德

次願公韻

古意

顧夢游

拜文丞相祠

賈開宗

卓烈婦

杜濬

詠謝翱

黃達

卓烈婦

陸廷掄

過史相國墳

閻爾梅

答友人二首

傅鼎銓

憶劍

題扇

憶謝疊山

楊焯

拜于忠肅公墳

劉城

哭史公

胡春生

懷凌井心

柴紹炳

卓烈婦

俞國賢

軍中

民族詩選注

劉子翬

子翬，字彥沖，宋崇安人。以父幹任授承務郎辟幕屬。幹死靖康之難，子翬痛憤哀毀。除通判興化軍事，以羸疾乞祠，歸隱屏山。學者稱屏山先生。有屏山集。

偶書

風急胡塵暗九州，岸巾①長嘯一登樓。故園卻憶桐孫②在，薄宦端爲荔子③留。
湖海以南兵尙鬪，犬戎④不死禍難休。似聞推轂⑤皆飛將，盍有清談謝傅⑥流！

①岸巾，猶岸幘也。露額曰岸。

②桐孫，謂桐樹上孫枝。亦作孫子解。

③荔子，謂興化產荔枝，時子

翬通判興化軍事，故云。

④犬戎，泛指金人。

⑤助人成事曰推轂。此指朝臣言。

⑥謝傅謂謝安，

安卒贈太傅，世稱謝太傅，故云。

巡塞偶書

窮寇轉趨海，吾邦備宜先。連年戍役頻，徵兵及漁佃。扶戈或稚齒，嬰冑仍華顛。○
未知戎伍肅，朱旗亂長阡。林端晚燧發，石際飛梯懸。崎嶇樵牧地，萬竈生浮烟。
我行視營柵，兒戲端可憐！倚茲形勢險，寇至常遷延。羣兇昔吾軍，赤指抨鳴弦。防
胡屢瓦解，合寇俄星連。猶多燕趙兒，意氣非當年。駢車○載珍寶，結騎馳嬋娟。○
時危天稔○亂，事豈汝能專。怒風飛驚濤，河梁失歸船。四顧天地黑，攬衣思茫然！
○嬰，同櫻。繫著之義。冑，兜鍪也。戰時所著之冠，以禦兵刃者也。○華顛，白首也。猶言老人。○駢
車，猶言並車，與下句「結騎」義相仿。○嬋娟，狀人物美好之詞。此指美人。○稔，熟悉之義。亦
作積久解。

四不忍

草邊飛騎如烟滅，拉獸摧斑食其血。此時疾首○念鑿輿，○玉體能勝飢渴無危？
城屑麴○驚雲擾，簾簾○無光天座○杳。奮戈儻未雪深讎，我食雖甘何忍飽！

○疾首，怒恨之貌。詩：「疾如疾首。」
○鑾輿，猶鑾駕，天子所御車也。此泛指宋帝。
○屑麴，謂碎麴爲屑而食也。
○簠，祭器，此喻宗廟。
○天座，猶言帝位。

黃河鑿鑿，冰成路，人語寒，空氣成霧。此時泣血念鑾輿，玉體能勝凜冽。○無蒼

皇。○天步。○蒙塵。○去，晝衰。○飄零傷歲暮。飛書儻未伐姦謀，我服雖華何忍御！

○鑿鑿，鮮明之貌，謂冰也。詩：「白石鑿鑿。」
○凜冽，寒甚也。
○蒼皇，猶倉皇也，匆遽貌。
○天

步，詩：「天步艱難。」毛傳：鄭箋皆釋步爲行，謂天行此令人艱困之事也。朱子解天步爲天運。此喻

天子也。
○蒙塵，謂天子失國，奔走於四方也。此指徽欽被虜。
○晝衰，喻帝王。

平沙月轉旌旗影，擐甲爲衾戈作枕。此時飲恨念鑾輿，玉體能勝暴露無問安？
使者空相繼，清蹕不回宮殿閉。請纓儻未縛酋渠，我榻雖安何忍寐！

○擐，貫也。
○清蹕，清謂清潔道路，蹕，請辟止行人，爲舊時天子出行之制。
○請纓，漢終軍請受

長纓，羈南越王致之闕下。後人因以投効軍營爲請纓。
○酋渠，猶言酋帥，卽俗言首領之義。

漁陽。○疊鼓風沙戰，潑水淋漓舞胡旋。○此時太息念鑾輿，玉體能勝寂寞無六

宮遭亂多奔迸，^③不復梨園^④歌舞盛。著鞭儻未蹂龍庭，^⑤我瑟雖調何忍聽！

○漁陽，鼓曲名。

○胡旋，舞名。夷部樂有此舞，亦稱踏毬戲。

○奔迸，猶言奔逃走散。

○梨園，唐

明皇選坐部伎子弟三百人教於梨園，後世引爲陳設聲伎之處。

○龍庭，謂匈奴之王庭也。

北風

雁起平沙晚角，^①哀北風回首恨難裁。淮山已隔胡塵斷，汴水猶穿故苑來。紫色
蠶聲^②真倔强，翠華龍袞^③暫徘徊。廟堂此日無遺策，可是憂時獨草萊！^④

○晚角，角，軍中吹器。晚角，謂薄暮軍中吹角。

○紫色蠶聲，卽紫奪朱，鄭亂雅之意。蠶聲謂淫哇之

聲，猶鄭聲也。漢書王莽傳贊：「紫色蠶聲，餘分閏位。」此處喻金人雖倔强，究非正統。

○翠華，天

子之旗，以翠羽爲飾。龍袞，天子之服。此喻天子。

○草萊，本作田野解，此喻隱逸之士。

朱熹

熹，字元晦，一字仲晦，宋婺源人。中紹興進士第，歷仕高孝光寧四朝，仕至轉運副使，崇政殿說書，煥章閣待制致仕。年七十一卒。理宗贈太師，封信國公，改徽國。

拜張魏公○墓下

衡山何巍巍，湘流亦湯湯。○我公獨何往，劍履在此堂。念昔中興初，孽豎○倒冠裳。公時首建議，自此扶三綱。精忠貫宸極，○孤憤摩穹蒼。○元戎二十萬，一旦先啓行。西征奠○梁益，南轅無江湘。士心既豫附，國威亦張皇。縞素哭新宮，哀聲連萬方。黠虜聞櫛魄，○經營久徬徨。玉帛○驟來往，士馬且伏藏。公謀適不用，拱手遷南荒。白首復來歸，髮短丹心長。拳拳冀感格，○汲汲勤修攘。○天命竟難謀，○人事亦靡常。悠然謝台鼎，○騎龍白雲鄉。○坐令此空山，名與日月彰。千秋定軍壘，岌巖○遙相望。賤子來歲陰，烈風振高岡。下馬九頓首，撫膺淚淋浪。山顏今幾

年，志士日慘傷。中原尙腥羶，^⑤人類幾豺狼。公還浩無期，嗣德煒有光。^⑥恭惟宋社稷，永永垂無疆！

①張浚，宋綿竹人，字德遠，登進士第，爲太常寺簿。時金粘沒喝入汴京，欲立張邦昌，浚逃入太學，不肯署狀。高宗時爲川陝京西諸路宣撫使，力扼金人，會秦檜主和議，貶官。孝宗時除樞密使，都督江淮軍馬，封魏國公，諡忠獻。浚志在恢復，終身不主和議，功雖不就，人稱其忠。②湯，音商。湯湯，水流貌。③孽豎，喻亂臣。④宸極，北極星也，亦作天子之尊位解。⑤穹蒼，天也。言其形穹隆，而色蒼蒼也。⑥奠，定也。⑦褫魄，猶奪魄也。⑧玉帛，古會盟朝聘所執以爲禮也。句謂宋與金通好。⑨拳拳，懇至之意。感格，謂感格君上。⑩汲汲，求速之意。修攘，猶安內攘外之意。⑪謚，與愷通，信也。書：「天難諶，命靡常。」⑫台鼎，宰輔之稱，舊稱三公曰台鼎，言如星之有三台，鼎之有三足也。謝台鼎，猶言去宰輔之職。⑬句謂逝世。⑭岌業，山高危貌。蓋諸葛定軍壘與張魏公之墳遙遙對峙，定軍山，在今陝西沔縣，諸葛亮葬此，因山爲墳。⑮魚臭曰腥，羊臊曰羶，指金人言。句謂金人入據中國。⑯句謂張魏公後嗣繼起有人。煒，赤色，有光榮也。

王履

履，字坦翁，宋開封人。元祐初，從父景琚南郊恩，爲三班奉職。元符上書，編置新州，入黨籍。靖康初，除相州觀察使，扈駕被留，死之。

臨難歌

矯首向天兮，天卒無言！
忠臣效死兮，死亦何愆？
三朝北盟會編

宇文虛中

虛中，字叔通，宋益州廣都人。大觀二年進士。建炎初，以資政殿學士充祈請使，留金爲翰林學士。紹興中謀劫金主，事泄，全家皆死。

北窗炙輠云：宇文虛中在金作三詩，所謂人生一死渾閒事云云，豈李陵所謂欲一効范蠡曹沫之事？後虛中仕金爲國師，遂得其柄，令南北講和，大母獲歸，往往皆其力也。近傳明年八月間，果欲行范蠡曹沫事，欲挾淵聖以歸，前五日，爲人告變，虛中急發兵直至金主帳下，金主幾不能脫，遂爲所擒。嗚呼！痛哉！實紹興乙丑年也。審如是，始不負太學讀書耳。

在金日作

滿腹詩書漫古今，頻年搖落易傷心。南冠[○]終日囚軍府，北雁何時到上林[○]。開口摧顏空抱朴，脅肩奔走尙腰金。莫邪利劍今安在，不斬姦邪恨最深！

○南冠，謂羈囚之人也。左傳：「晉侯觀於軍府，見鍾儀而問之曰：南冠而縶者誰也？」對曰：鄭人所獻楚囚也。」
○句用蘇武故事，謂雁足帶書，何時可到中土。

遙夜沉沉滿幕霜，有時歸夢到家鄉。傳聞已築西河館，○自許能肥北海羊。○回首兩朝俱草莽，馳心萬里絕農桑。人生一死渾閒事，裂眚穿胸不汝忘。

○西河館，行人之館。

○句自比蘇武。蘇武爲匈奴所留，牧羊十九年，始得歸漢。

不堪垂老尙蹉跎，有口無辭可奈何！強食小兒猶解事，學妝嬌女最憐他。故衾媿見霑秋雨，短褐寧忘拆海波？○倚杖循環如可待，未愁來日苦無多。

○杜詩北征：「海圖拆波濤，舊繡移曲折。」謂剪舊物以補豎衣，故拆移而顛倒也。海圖，當是衣上所畫之物。

何 棨

棨，字文縝，仙井監人。政和五年進士第一人，歷官尙書右僕射，兼中書侍郎，死靖康之難。

在金營題詩

念念通前劫，依依返舊魂。人生會有死，遺恨滿乾坤！

滕茂實

茂實，字秀穎，杭州臨安人。章敏公元發從子，家於吳。政和八年進士，初名祿，徽宗改賜今名。靖康初以工部員外假侍郎使金，見留，終身布衣，稱宋使者，歿於雁門。其友董誥錄其哀詞來獻，詔宣付史館，褒錄之。

齊東野語：茂實先是自己必死，遂囑友人董誥以奉使黃幡裹屍而葬，且大書九篆字云：宋使者東陽滕茂實墓，復作詩自敘云云。後竟以憂憤成疾歿。北人哀其忠，爲起墓雁門山，定時致祭焉。

哀詞有序

茂實奉使無狀，不復返父母之邦，所當從其主以全臣節，或怒而與之死，幸以所仗旛裹其屍，及以所篆九字刊之石，埋之臺山寺下，不必封樹。蓋昔年病中，曾夢遊清涼境界，覺而病愈，恐亦前緣。今預作哀詞，幾於不達，方之淵明則不可，若蘇屬國牧羊海上，而五言之作，始敢援此例云。

螿鹽⊖老書生，謬作王都官。索米了無補，從事敢辭難。殊鄰復盟好，仗節來榆關。城守久不下，川途望漫漫。儉輩⊖果不惜，一往何當還。牧羊困蘇武，⊕假道拘張

騫。④流離念窘束，坐閱四序遷。同來悉已歸，我獨留塞垣。形影自相弔，國破家亦殘。呼天竟不聞，痛甚傷肺肝。相逢老兄弟，悼歎安得歡。波瀾卷大廈，一木難求安。就不違我心，渠不汗我顏？昔燕破齊王，羣臣望風奔。王蠋⑤獨守節，齊人有甘言。經首自絕脰，感慨今昔聞。未嘗食齊祿，徒以老爲民。況我祿數世，一死何足論。遠或投江海，近或死朝昏。斂我不須衣，裹尸以黃旛。題作宋臣墓，篆字當深刊。我室年尙少，兒女皆童頑。四海無置錐，⑥飄流倍悲酸。誰當給衣食，使不死飢寒。歲時一酌我，猶足慰我魂。我魂亦悠悠，異鄉寄沉寃。他時風雨夜，草木號空山。

① 蠶鹽，素食也。

② 儉輩，不詳。

③ 蘇武，見宇文虛中詩注。

④ 漢欲通月氏，以張騫爲使，道經匈

奴，爲單于所留，居十餘歲。

⑤ 王蠋，周時齊人。燕破齊，聞蠋賢，欲求之，蠋謝不往。燕人曰：不來，吾且

屠蠋。曰：忠臣不事二君，今國破君亡，吾何以存。乃欲刦之以兵，吾與其不義而生，不如死。遂自經死。

齊士聞之曰：蠋，布衣也，義不北面于燕，況在位食祿者乎？乃共立潘王子爲襄王。

⑥ 置錐，猶立錐

也，喻家貧。

哀隆德守臣張確。確浮休張舜民弟，嘗爲烏延帥幕，獨不廷謁。童貫詩以弔之。

睢陽萬古一張巡，忠義傳家有世臣。顏子服膺當入室，潘郎望拜肯同塵。圍城抱恨天猶晦，仗劍臨危氣益振。嘆子鄰邦盡曹李，偷生端作九泉人。

①張確，字子固，宋宜祿人。元祐進士，知隆德府。金兵至，諭使降。確曰：頭可斷，腰不可屈。戰死。②張巡，唐南陽人。開元末以進士官真源令，安祿山反，與許遠合兵守睢陽，拜御史中丞，累戰皆克，食盡，殺愛妾以饗士，城陷，爲賊所殺。③顏子謂顏淵。孔子稱其得一善則拳拳服膺而勿失。入室，謂學問已至精微之奧。此喻張確學有深造。④潘郎謂潘岳，岳見賈充，望塵而拜。⑤曹李謂曹蜎、李志。曹蜎，字彥道，襄陽人。世說新語：「庾道季云：廉頗藺相如雖千載上死人，懷懷恆如有生氣；曹蜎、李志雖見在，厭厭如九泉下人。」

李若水

若水，本名若冰，欽宗賜名若水，字清卿，曲周人。靖康初，以上舍登第，由太學博士，歷吏部侍郎，京師陷，從欽宗幸金營，不屈，死之。建炎初，贈觀文殿學士，諡忠愍，有集。

靖康小雅：靖康之難，死節之士，公爲第一。弔之詩曰：烈烈李公，實備全德；義動幽冥，氣貫金石。扈蹕虜營，爰定忠烈，杞人之憂，廢立大厄。公挺不顧，二酋面叱，勇甚雷霆，天地動色。命輕鴻毛，名高斗極。燎原之火，不變藍壁。滔天之溺，砥柱獨立。死得其所，震耀方冊。

衣襟中詩

胡馬南來久不歸，山河殘破一身微。功名誤我等雲過，歲月驚人利雪飛。每事恐貽千古笑，此心甘與衆人違。艱難惟有君親重，血淚斑斑染客衣。

曾如驥

如驥，秦和人，爲寶慶通判，死金兵之難。

豫章詩話：金兵薄寶慶，秦和曾公如驥遣弟如駿歸曰：「吾既以身許國，不得顧先人宗祀矣，汝其圖之。」涕泣與別，復以考功印紙題其上云云。澄江，指秦和故鄉也。事亟矣，書舍生取義一章於壁，以明己志。城將陷，左右請迎降，公叱之，登子城，投資江死。

△題考功印紙

謹將節義二字，結果印紙一宗。了卻神游何處？澄江明月清風。

曲端

端，字平甫，鎮戎軍人。建炎初，累官威武大將軍，涇州防禦使，爲張浚所忌，誣以反，下恭州獄，糊其口，燬之以火，乾渴求飲，予以酒，九竅流血死。

三朝北盟會編：張浚既失全陝，退保蜀中，復欲用曲端，王庶曰：不可，富平之戰，宣撫與曲端有勝負之約，今日宣撫何有面目見端？吳玠亦懼端之嚴明，乃書曲端謀反四字於手心，浚雖有殺端之心，而未有罪，庶等曰：曲端作詩題柱，有指斥乘輿之意，曰：不向關中興事業，卻來江上泛漁舟，此其罪也。浚乃送端萬州羈管，復令恭州取勘。康隨先在鳳翔，遭端決背一百，浚以康隨爲提點刑獄公事，端聞之曰：吾其死也。呼天者數聲，端有馬名鐵象，日馳四五百里，惜之過於子息，又連呼鐵象者數聲，既死不旬日，鐵象亦死。

鶴林玉露：端知書，嘗作詩云：破碎山河不足論，幾時重到渭南村？昔人云：欲挂衣冠神武門，先尋水竹渭南村。卽此事也。

蜀中作

破碎山河不足論，何時重到渭南村？一聲長嘯東風裏，多少未歸人斷魂！

岳飛

飛，字鵬舉，相州湯陰人。宣和間應真定宣撫募，累立戰功。南渡歷少保河南北諸路招討使，進樞密副使，封武昌郡開國公，罷爲萬壽觀使。爲秦檜所陷，殞大理寺獄。淳熙六年賜諡武穆，嘉定四年追封鄂王，淳祐六年改諡忠武，有集。

題青泥市寺壁

雄氣堂堂貫斗牛，誓將真節報君讎。斬除頑惡還車駕，不問登壇萬戶侯。

送紫岩張先生北伐

號令風霆速，天聲動北陲。長驅渡河洛，直搗向燕幽。馬蹀闕氏[○]血，旗臯可汗[○]頭。歸來報明主，恢復舊神州。

[○]蹀，踏也。闕氏，漢時匈奴王后之稱。

[○]臯，謂臯首，古有殺人而懸首木上也。可汗，猶言單于。

誅適齋[○]先生

南渡已三紀，衣冠今幾存！傷心失故老，回首望中原。去國權臣力，全軀聖主恩。致君堯舜日，哀意託空言。載家集

○適齋先生不詳，或是汪大猷。

寄浮屠慧海

湓浦廬山○幾度秋，長江萬折向東流。男兒立志扶王室，聖主專征滅虜酋。功業要刊燕石○上，歸休終伴赤松○游。叮嚀寄語東林○老，蓮社○從今着力修。金

陀粹編

○湓，水名，在江西。廬山，山名，在今江西九江境。

○燕然，山名，在外蒙古。後漢竇憲追北單于，登燕

然山，刻石勒功而還。

○赤松子，古仙人名。漢張良願棄人間事，從赤松子游。

○東林，禪院名。在

廬山。○蓮社，晉僧慧遠居廬山，與劉遺民等同修淨土，中有白蓮池，因號蓮社。

題驟馬岡

立馬林岡豁戰眸，陣雲開處一溪流。機春○水泚猶傳晉，黍秀宮庭孰憫周！○南

服①只今殲小醜，北轅何日返神州！誓將七尺酬明聖，怒指天涯淚不收！江西通志

①句義不詳，疑有誤字。（春或是春字。）

②箕子朝周，過殷之故墟，見家室毀壞，生禾黍，傷之，乃

歌曰：麥秀漸漸兮，禾黍油油，彼狡童兮，不與我好兮。蓋悲故國之滅也。

③南服，猶南方也。

范成大

成大，字致能，吳郡人，紹興中擢進士第，累官參知政事，奉祠，起知明州，除端明殿學士。有石湖集。

會同館

萬里孤臣致命秋，此身何止一漚浮。提攜漢節同生死，休問羝羊解乳否！

○遼人館宋使處，謂之會同館。原注：「授館之明日，守吏微言有議留使人者。」

州橋

州橋南北是天街，父老年年等駕迴。忍淚失聲詢使者，幾時真有六軍來？

○古者天子六軍。周制，萬二千五百人爲軍。

陸游

游，字務觀，山陰人。十二能詩文，蔭補登仕郎。孝宗時賜進士出身，五爲州別駕，西泝夔道，范成大帥蜀，爲參議官，以文字交，不拘禮法，人譏其放，因自號放翁。旋起知嚴州，同修實錄，陸寶章閣待制，致仕，封渭南伯，卒年八十五，有劍南詩稿。

聞武均州報已復西京

白髮將軍亦壯哉！西京○昨夜捷書來。胡兒敢作千年計，天意寧知一日回。列聖仁恩深雨露，中興赦令疾風雷。懸知寒食朝陵使，驛路梨花處處開。

○西京，北宋以洛陽爲西京。

△喜小兒輩到行在○

阿綱學書蚓滿幅，阿繪學語鷲轉木，截竹作馬走不休，小車駕羊聲陸續。書窗流壁○誰忍嘖，嘖嘖也復可憐人。卻思胡馬飲江水，敢道春風無戰塵。傳聞賊棄兩

京走，列城爭爲朝廷守，從今父子見太平，花前飲水勿飲酒。

○天子巡幸所居曰行在。○澆，泥著物也，同汙。澆壁，謂塗抹牆壁也。

送芮國器○司業

往歲淮邊虜未歸，諸生合疏論危機。人材衰靡方當慮，士氣崢嶸未可非。萬事不如公論久，諸賢莫與衆心違。還朝此段宜先及，豈獨遺經賴發揮。

○芮煜字仲蒙，一字國器，宋吳興人。紹興進士，因和沈長卿詩，爲秦檜所忌，竄化州。乾道中以右文殿修撰致仕。

太息宿青山鋪作

太息重太息，吾行無終極。冰霜迫殘歲，鳥獸號落日。秋砧滿孤村，枯葉擁破驛。白頭鄉萬里，墮此虎豹宅。道邊新食人，膏血染草棘。平生鐵石心，忘家思報國。卽今冒九死，家國兩無益。中原久喪亂，志士淚橫臆。切勿輕書生，上馬能擊賊。

龍眠○畫馬

國家一從失西陲，年年買馬西南夷。漳鄉所產非權奇，邊頭歲入幾番皮。崔嵬瘦骨帶火印，離立欲不禁風吹。圉人太僕空列位，龍媒汗血來何時？李公太平官京師，立仗慣見渥洼姿。斷縑歲久墨色暗，逸氣尙若不可羈。賞奇好古自一癖，感事憂國空餘悲。嗚呼安得毛骨若此三千匹，銜枚夜度桑乾磧！

①李公麟，字伯符，宋舒州人。元祐進士，工詩善畫，元符末致仕，歸老居龍眠山莊，自爲圖，號龍眠居士。②圉人，太僕，古時掌養馬芻牧之官。③龍媒，駿馬也。汗血，良馬之稱。一說，馬汗從前肩膊出，如血，故名。④渥洼，水名，在甘肅安西縣。史記有嘗得神馬渥洼水中之語，後人遂用稱產良馬之地。⑤桑乾河，即今永定河，又名渾河。磧，謂水淺石露之處，時其地已非宋有。

秋興

成都城中秋夜長，燈籠蠟紙明空堂。高梧月白繞飛鵲，衰草露濕啼寒螿。堂上書生讀書罷，欲眠未眠偏斷腸。起行百匝幾嘆息，一夕綠髮成秋霜。中原日月用胡歷，幽州老酋著柘黃。①滎河溫洛底處所，可使長作旃裘鄉。②百金戰袍鷓鴣

盤三尺劍鋒霜雪寒，一朝出塞君試看，且發寶雞暮長安。

○柘黃，謂用柘木所染之色，本天子所服，此謂金人僭號幽州。○滎河溫洛，均在今河南省。旃裘鄉，謂胡人所居之地。胡俗，衣旃衣，披羊裘，故云。○謂戰袍上繡鷓鴣者。○寶雞，長安均地名，在今陝西。又天子所都，通稱長安。

五月十一日夜且半夢從大駕親征盡復漢唐故地見城邑人物繁麗云西涼府也喜甚馬上作長句未終篇而覺乃足成之

天寶胡兵陷兩京，北庭安西○無漢營。五百年間置不問，聖主下詔初親征。熊羆○百萬隨鑾駕，故地不勞傳檄下。築城絕塞進新圖，排仗行宮宣大赦。岡巒極目漢山川，文書初用淳熙○年。駕前六軍錯錦繡，秋風鼓角聲滿天。苜蓿峯○前盡亭障，○平安火○在交河○上。涼州○女兒滿高樓，梳頭已學京都樣。

○北庭，漢時北匈奴所居之地。唐設北庭都護府，謂西域也。安西，唐置安西都護府於交河城，在今甘肅。○熊羆，皆猛獸，亦以喻武士。○淳熙，宋孝宗年號。（孝宗有隆興乾道淳熙三年號。）

④首稽峯，當是山名。⑤亭障，謂於塞上險要處，築牆置亭，使人守之也。⑥平安火，烽火之一，唐制烽火相去三十里，每日初夜放烟烽燧，以報平安，謂之平安火。⑦交河，水名，即馬邑川水，出山西寧武縣，入桑乾河。⑧涼州，地名，在今甘肅。

冬夜不寐至四鼓起作此詩

秦吳萬里車轍遍，重到故鄉如隔生。歲晚酒邊身老大，夜闌枕畔書縱橫。殘燈無焰穴鼠出，槁葉有聲村犬行。八十將軍能滅虜，白頭吾欲事功名。

秋夜泊舟亭山下

逢水逢山到處留，可憐身世寄孤舟。一汀蘋露漁村晚，十里荷花野店秋。羽檄未聞傳塞外，金椎先報擊衙頭。聞虜曾行帳，爲壯士所攻，幾不免。虜語謂曾之所在爲衙頭。煌煌太白，高千丈，那得功名取次休。

①煌煌，光明貌。②太白，金星也，天官書謂太白血，又謂主刑殺。

燕堂春夜

南樓統統①下疎更，一點紗籠滿院明。映月疎梅入簾影，讀書稚子隔窗聲。呻吟藥裏身寧久？汎掃胡塵意未平。草檄北征今二紀，山城仍是老書生！游嘗爲丞相陳魯公史樞相張魏公草中原及西夏書檄於都堂。

①統統，擊鼓聲。（統音耽。）

秋郊有懷二首錄一

楚人①固多孱，妄謂秋可悲。寧知河嶽間，氣俗樂此時。壯士鳴雕弓，健馬嚼枯萁，日馳三百里，榆關赴戰期。陣雲壓龍庭，殺氣搖參旗。②熾火燎狐兔，倒瀉黃金卮，③勒銘燕然④石，千載鎮胡兒。安能空山裏，凍研哦清詩。

①楚辭：「悲哉，秋之爲氣也。」宋玉，楚人。②參旗，星名。③句謂飲酒慶功。④燕然，山名。見岳

飛詩注。

冬夜聞角聲二首錄一

嫋嫋清笳入雪雲，白頭老守臥中軍。自憐到老懷遺恨，不向居延①塞外聞。

○居延，城名。漢武帝使伏波將軍路博德築遮虜障於居延，亦曰居延塞。

秋思二首錄一

半年閉戶廢登臨，直自春殘病至今。帳外昏燈伴孤夢，簷前寒雨滴愁心。中原形勝關河在，列聖憂勤德澤深。遙想遺民垂泣處，大梁城闕又秋砧。

△秋夜將曉出籬門迎涼有感

迢迢天漢○西南落，喔喔鄰雞一再鳴。壯志病來消欲盡，出門搔首愴平生！
三萬里河東入海，五千仞嶽上摩天。遺民淚盡胡塵裏，南望王師又一年。

○天漢，猶天河也。

△夜讀范至能○攬轡錄言中原父老見使者多揮涕感其事作絕句

公卿有黨排宗澤，○帷幄無人用岳飛。遺老不應知此恨，亦逢漢節○解沾衣。

○范成大，字致能，宋吳縣人，隆興中使金，秉節盡忠，著有攬轡錄。

○宗澤，字汝霖，宋義烏人，有文

武才略，建炎初爲東京留守，大破金兵，屢上疏高宗請歸汴，爲黃潛善等所沮，憂憤而死。○漢節，

猶言漢使，此指宋使言。

十一月四日風雨大作

僵臥孤村不自哀，尙思爲國戍輪臺。○夜闌臥聽風吹雨，鐵馬冰河入夢來。

○輪臺，西域地名，在今新疆。

癸丑七月二十七日夜夢遊華嶽廟

驛樹秋風急，關城暮角悲。平生忠憤意，來拜華山祠。
牲碑僞正朔，祠祝虜衣冠。神亦豈堪此，出門山雨寒。

僕頃在征西大幕登高望關輔樂之每冀王師拓定得卜居焉暇日記此意
以示子孫

八月殘暑退，秋聲滿庭樹。豈無四方志，衰病迫霜露。遼東黃頭奴，○稔惡天震怒。
南北會當一，老吾悲不遇。子孫勉西遷，俗厚吾所慕。約已收孤嫠，教子立門戶。黍
稷暗阡陌，鷄雉足匕箸。永爲河渭民，勿憚關山路。

○遼東黃頭奴猶言胡人。

夢至洛中觀牡丹繁麗溢目覺而有感

兩京初駕小羊車，顛顛江湖歲月賒。老去已忘天下事，夢中猶看洛陽花。○妖魂
豔骨○千年在，朱彈金鞭○一笑譁。寄語氍毹莫癡絕，祈連○還汝舊風沙。

○洛陽花，牡丹之一種。○妖魂豔骨，謂牡丹繁麗。○朱彈金鞭，謂游人之豪侈也。○祈連，山
名，卽天山。此泛指塞外漠北言。

題陽關圖○

誰畫陽關贈別詩，斷腸如在渭橋○時。荒城孤驛夢千里，遠水斜陽天四垂。青史
功名常蹭蹬，○白頭襟抱足乖離。山河未復胡塵暗，一寸孤愁只自知。

○陽關，古關名，在今甘肅。蓋有人本王維渭城朝雨之曲畫圖，而放翁爲之題。○渭橋，蓋古送別
之處。○蹭蹬，失勢貌，不遇之意。

枕上偶成

放臣不復望脩門，身寄江頭黃葉村。酒渴喜聞疎雨滴，夢回愁對一燈昏。河潼形勢寧終棄？周漢規模要細論。自恨不如雲際雁，南來猶得過中原！

暮春

數間茆屋鏡湖濱，萬卷藏書不救貧。燕去燕來還過日，花開花落卽經春。開編喜見平生友，照水驚非曩歲人。自笑滅胡心尙在，憑高慷慨欲忘身。

不寐

麗譙○聽盡短長更，幽夢無端故不成。寒雨似從心上滴，孤燈偏向枕邊明。讀書有味身忘老，報國無期涕每傾。敢爲衰殘便虛死，誓先鄰曲事春耕。

○麗譙，高樓之美麗者，亦作譙樓解。

客去追記坐間所言

征西幙罷幾經春，歎息兒音尙帶秦。每爲後生談舊事，始知老子是陳人。建隆乾德○開王業，溫洛榮河○厭虜塵。倘得此生重少壯，臨危敢愛不貲身。

○建隆、乾德、宋太祖年號。○見前注。

追憶征西幙中舊事

大散關○頭北望秦，自期談笑掃胡塵。收身死向農桑社，何止明明兩世人。

○大散關，卽散關，在今陝西寶雞縣西南，爲秦蜀往來要道。

小獵南山雪未消，繡旗斜卷玉驄驕。不如意事常千萬，空想先鋒宿渭橋。

憶昨王師戍隴回，遺民日夜望行臺。○不論夾道壺漿滿，洛筭河魴○次第來。

○行臺謂於外州置尙書省以專征討之責者也。○洛筭河魴，原注云：「在南鄭時，關中將吏有

獻此二物者。」

關輔○遺民意可傷，蠟封三寸絹書黃。○亦知虜法如秦酷，列聖恩深不忍忘。

○關輔，謂關中三輔之地。○原注云：關中將校密報事，皆以蠟書至宣司。

縱筆

行省當年駐隴頭，腐儒隨牒亦西遊。千艘衝雪魚關○曉，萬竈連雲駱谷○秋。天

道難知胡更熾，神州未復士堪羞！會須瀝血書封事，請報天家。③九世讎。④

①魚關，不詳，或指魚孔隘言。②駱谷，在今陝西。③天家，謂天子。④九世復讎，本公羊傳語。言

雖隔九世，猶可復仇也。此指復金仇言。

△秋夜思南鄭①軍中

五丈原②頭刁斗聲，秋風又到亞夫③營。昔如埋劍常思出，今作閑雲不計程。盛事何由觀北伐④，後人誰可繼西平⑤？眼昏不禁陳編得，挑盡殘燈不肯明。

①南鄭，地名，在今陝西省。②五丈原，地名，在今陝西，昔諸葛亮伐魏，駐此。③亞夫，謂周亞夫，漢

沛人，封條侯。文帝時，匈奴入邊，亞夫屯軍細柳，文帝勞軍，稱爲真將軍。④北伐謂伐金。⑤西平

謂西平郡王李晟，晟，字良器，唐臨潭人。平吐蕃有功，稱萬人敵，後破朱泚，收復長安，再造唐室，封西

平郡王。

客從城中來

客從城中來，相視慘不悅。引盃撫長劍，慨嘆胡未滅。我亦爲悲憤，共論到明發。向

來酣鬪時，人情願少歇。及今數十秋，復謂須歲月。諸將爾何心，安坐望旄節？
△示兒
死去元知萬事空，但悲不見九州同。王師北定中原日，家祭無忘告乃翁！

陳傅良

傅良，字君舉，居瑞安之帆游鄉，學于永嘉薛氏，得伊洛之旨，又從南軒東萊聞爲學大要。爲太學錄，累遷至嘉王府贊讀，龍樓閣問寢不時，獨切諫，每以天性感悟孝宗父子。後知上意弗回，遂乞歸。寧宗初，除中書，與朱子同朝，疏留朱子，爲韓侂胄所忌，遂罷去。

除夜

又添犬馬齒，^①常恐牛羊夕。^②牙無數株牢，鬢已大半白。六朝貴人家，珊瑚高數尺。復有陵邑豪，沃壤動連陌，居然燕巢幙。^③忽矣駒過隙，伊傅^④亦中壽。至今名赫赫，蒼苔臥風雨，曾乏斷碑額。中原五十載，胡騎亂禹跡。^⑤誰當癩折腰，去學陶彭澤。^⑥憂端壓不下，中夜歌秀麥。^⑦昭代豈無人，腰黃^⑧眼前赤，鴻儒籌禁省，壯士守邊場。罷歌且盃酒，澆此懷抱積。柴門剝剝聲，已有賀年客。

① 謂增年紀也。

② 牛羊夕，猶言晚景、暮景。

③ 燕巢幙，謂處非其境，不免危險。駒過隙，猶日月易

逝之意。④伊傅，謂伊尹、傅說，皆商之賢相。⑤禹跡，禹治洪水，足跡遍于九州，故稱九州爲禹跡。

（猶言中國也。）⑥陶淵明，晉尋陽人，爲彭澤令，以不願爲五斗米向督郵折腰棄官去。⑦麥

秀，謂麥秀歌。見前岳飛驤馬岡詩註。⑧腰黃，謂金帶。

送曾繼先赴山陰路鈐①

鬚髯白盡猶強飮，②脾肉添多未跨鞍。不向胡沙親矢石，卻來橋塚③護衣冠。歸舟自此長相背，薦墨④於今尙未乾。只恐燕然⑤他日事，獨無名字可同刊。

①路鈐，官名。②飮，俗飯字。

③橋塚，謂橋山之冢，本黃帝陵。此指南宋越中陵墓。（衣冠謂衣冠塚，相傳黃帝升天，羣臣取其衣冠埋之爲塚。）④薦墨，謂薦書。⑤燕然，見前陸游秋夜有懷詩

註。二句謂不戰沙場，不能立功異域。

楊萬里

萬里，字廷秀，吉水人，中紹興進士，爲零陵丞。張浚勉以正心誠意之學，遂自名其室曰誠齋。歷官國學太常，知漳州、常州，擢東宮侍讀，以議配饗忤孝宗，出知筠州。光宗召爲祕書監，尋出江東轉運，總領淮西、江東朝議行鐵錢，萬里不奉詔，改贛州，乞祠，自是不復出。韓侂胄築南園，屬爲記，許以掖垣，曰：官可棄，記不可得。侂胄權日盛，遂憂憤成疾，家人不敢進邸報，適族子自外至，言侂胄近狀，萬里慟哭，呼紙書曰：姦臣專權，謀危社稷，吾頭顱如許，報國無路，惟有孤憤別妻子，筆落而逝。年八十三。

諡文節。

讀罪己詔 ①時有符離之潰

莫讀輪臺詔，②令人點淚垂。天平容此虜，帝者謁非罷。何罪良家子，知他大將誰。誰懲危度口，③儻復雁門踦。④危度口見光武紀二年注

①孝宗隆興元年五月，張浚有符離之潰，帝下詔罪己。②輪臺詔，猶言罪己詔。漢書西域傳贊：

「孝武之世，圖制匈奴，迺表河曲，列四郡，開玉門，通西域，以斷匈奴右臂。及末年，棄輪臺之地，而下

哀痛之詔豈非仁聖之所悔哉。」
③危度口地名。
④漢書「段會宗以單于當朝徙爲雁門太守，數年坐事免。及復爲都護，谷永戒之曰：『願吾子因循舊貫，毋求奇功，終更亟還，亦足以復雁門之騎。』」

亂起吾降音烘日，吾將強仕年。○中原仍夢裏，南紀且愁邊。陛下非常主，羣公莫自賢。金臺○尙未築，乃至羨強燕。

○強仕年，謂四十禮：「四十曰強而仕。」
○金臺，謂黃金臺。戰國時燕昭王欲招賢以強燕，郭隗以千里馬骨可致駿足爲喻，請王先禮隗，昭王從之，築臺易水東南，置千金其上，延天下士，號黃金臺，其後樂毅、鄒衍皆至燕。

只道六朝窄，渠猶數百春。國家祖宗澤，天地發生仁。歷服端傳遠，君王但側身。○楚人要能懼，周命正維新。○

○側身，言戒慎恐懼，不能安其身也。
○二句用楚子問鼎故事，言周德雖衰，天命未改，楚子不應問鼎之輕重，以喻宋尙有爲，胡人未許輕易南侵也。

樓 鑰

鑰，字大防，自號攻媿主人，鄞人也。登第歷太府宗正寺丞，出知溫州。光宗初，累擢中書舍人，進吏部尚書，以顯謨閣學士奉外祠奪職。韓侂胄誅，復官，兼翰林侍講，除端明殿大學士，位兩府五年，進資政殿大學士，卒諡宣獻。

題龍眠○畫騎射抱毬戲

綠楊幾枝插平沙，柔梢裊裊隨風斜。紅綃去地不及尺，錦袍壯士斫鬚射。橫磨箭鋒滿分靶，一箭正截紅綃下。前騎長纓抱繡毬，後騎射中如星流。繡毬飛硯最難射，十中三四稱爲優。元豐○策士集英殿，金門應奉人方倦。日長因過衛士班，飛騎如雲人馬健。駕幸寶津○知有日，窮景馳驅欣縱觀。龍眠胸中空萬馬，駭目洞心千萬變。追圖大概寫當時，至今想像如親見。靜中似有叱咤聲，墨淡猶疑錦繡眩。閑窗撫卷三嘆息，五紀胡塵暗畿甸。安得士馬有如此，長驅爲決單于戰。

○見前陸游龍眠畫馬詩註。

○元豐，宋神宗年號。

○寶津，樓名。

送張定叟^① 尚書鎮襄陽

武部尚書張公，出鎮襄陽，士夫莫不惜其去。昔昌黎送鄭尚書詩韻，必以來字，祝使成政而來歸，疾去而願歸，蓋人之至情也。而公自受陞委，謂邊事非可趣辦，願加久任，庶有成績，憂國而不爲身謀，聞者壯之。某曾陪郎省，餞別分韻，得壞字，未能措辭，繼又隨西蜀諸賢之後，始得詳聞奏請之言。被酒夜歸，亟述長韻。

公家忠獻公，^②勛名照穹壤。南軒^③傳聖學，後進斗山^④仰。尚書天分高，百聞真朗朗。日坐四益堂，濡染助涵養。小出輒驚世，發譽自英蕩。兩朝倚才辦，三接承睿獎。堂堂尹京手，風采漢張敞。^⑤九街寢桴鼓，終朝清訟鋸。^⑥汗流化清溝，鬧市鋤巨駟。^⑦鈴齋^⑧晝無人，士友厚吾黨。政成化自行，談笑揮浩穰。^⑨皇家重閫寄，^⑩拊髀^⑪勞注想。頗牧^⑫起禁中，帝曰汝其往。人多惜公去，地位切臺兩。^⑬惟公不擇地，引義猶慨慷。陬度^⑭更周詢，千里若尋丈。再拜受臨遣，因得進忠讜。邊臣固多事，備禦當素講。要須久其任，百弊隨剗斲。願假臣歲月，表裏如指掌。人材固不

乏，第一戒欺罔。樸拙勝巧心，好佞寧木彊。願求忠直士，枉直謹誅賞。更須寬轡策，
奏請應如響。上問卿何先，安靜最爲上。上憂襄漢間，吳楚欠遮障。公固論形勢，衰
衰到遜抗。⑤是時晉在洛，武昌勢相向。是爲必爭地，南北謹提防。今雖居上游，事
與古殊狀。狂寇縱欲來，無處可傳餉。況今三陲靜，皇靈方遠暢。與蜀相犄角，國勢
自增壯。尙期効寸尺，才疎意非廣。忠肝氣凜凜，秋旻足排蕩。上喜憂顧寬，趣行開
玉帳。捐金示優寵，諭賜煩上相。惟公最得士，離別俱惘惘。薦紳紛祖餞，直欲傾家
釀。賦詩寫胸臆，一一成技癢。家聲與國事，負荷有餘量。邊頭十萬兵，公臨如挾纊。
吾聞胡運窮，羣酋欲爭長。不戢將自焚，前轍有狂煬。⑥當爲不可勝，有和謹毋倡。
千載羊叔子，⑦制敵恢天網。行將友斯人，山川固無恙。備成撫機動，應煩護諸將。
功高歸未晚，會見登弼亮。⑧他時名父子，繼踵凌烟⑨像。

①張杓（一作杓）字定叟，浚子，宋綿竹人。以父恩累官至袁衢二府，提舉湖北，常入奏事，孝宗甚

喜。累遷戶部侍郎，端寧朝至端明學士，知建康府。杓天分高爽，吏材敏給，所治有能聲。②忠獻公

謂張浚，見前陸游詩註。

③南軒，謂張栻。栻，浚子。穎悟夙成，以古聖賢自期，與朱熹爲友，仕爲直秘

閣，後開府治戎。學者稱南軒先生。

④斗山，謂泰山北斗，人所瞻仰者。

⑤張敞，字子高，漢平陽人。宣帝時爲京兆尹，桴鼓稀鳴，市無偷盜。然無威儀，又爲婦畫眉。長安中傳張京兆眉嫵。

⑥鈺，受錢器也。趙廣漢爲潁川太守，教民爲鈺笛，以受民之詞訟。訟鈺，猶言詞訟也。

⑦駟，謂市井間牙儈之狡黠者，猶無賴也。

⑧鈴齋，猶言鈴閣，謂將帥所居之地。（鈴通鈴，亦作鈴閣。）

⑨浩穰，謂人衆多也。漢書「長安中浩穰」。顏師古註曰：「浩，大也。穰，盛也。言人衆之多也。」

⑩闔寄，言委以治軍之事也。

⑪撫髀，劉備故事。備曰：「吾常身不離鞍，髀肉皆消。今不復騎，髀裏肉生。日月若馳，老將至矣，而功業不建，是以悲耳！」

⑫頗牧，謂廉頗李牧，均戰國時趙之名將。

⑬臺兩，喻大臣也。周禮有「九兩」，漢官有「三臺」。

⑭陬度，陬，隅也。度，量度也。「陬度」與前「周詢」對言。

⑮遜抗，謂陸遜。陸抗，字伯言，三國時吳郡人。仕吳爲輔國大將軍，官至丞相。抗遜次子，襲父爵，仕至奮威將軍，拜大司馬。父子均曾爲荊州牧，長才貞節，爲一時名將。

⑯狂煬，不詳。

⑰羊祜，字叔子，晉南城人。晉武時鎮襄陽，綏懷遠近，深得江漢之心。與陸抗對境，務修德以懷吳人，官至征南大將軍。

⑱弼亮，猶言輔佐。書「弼亮四世，正色率下」。註「輔佐文武，成康四世爲公卿」。

⑳凌，謂凌烟閣，唐太宗圖畫功臣於上。

李伸之

伸之，官統制，爲金人所獲，不屈死。

劉祁歸潛志：貞祐（金宣宗年號）南征，獲一統制官李伸之者，帥府經歷官劉達卿召而飲之，且誘以降，將宥焉，伸之獻詩云云，竟就死。

獻帥府經歷

一飯感恩無地報，此心許國已天知。胸中千古蟠鍾阜，一死鴻毛斷不移。

①鴻毛，言死有輕于鴻毛。

黃公度

公度，字師憲，莆田人。紹興八年，進士第一，簽書平海軍節度判官，累仕考功員外郎，有知稼翁集。

和龔實之茂良聞虜人敗盟

請纓○未繫單于頸，置火須然董卓○臍。列郡奔馳喧羽檄，聖朝哀痛下芝泥。○
盟寒關隴無來使，春晚江淮有戰鼙。十載枕邊憂國淚，不堪幽夢破晨雞。

○請纓，見前劉子翬四不忽詩註。

○董卓，字仲穎，漢臨洮人。桓靈時擅朝政，立獻帝，後爲王允等

所殺，尸于市。卓素充肥，守尸吏然火置卓臍中，光明積日。○芝泥，滯印染籀之具也，猶今印泥。此

喻詔書。

劉克莊

克莊，字潛夫，號後村，莆陽人。以蔭仕爲建陽令，移仙都。嘗咏落梅詩，有東君謬掌花權柄，卻忌孤高不主張。讒者箋其詩以示柄臣，由此閑廢十載。因有病後訪梅絕句云：夢得因桃卻左遷，長源爲柳忤當權；幸然不識桃并柳，也被梅花累十年。淳祐中賜同進士出身，官至直學士，卒諡文定，有後村集。

△感昔二首

談攻說守漫多端，誰把先朝事細看。棄夏○西陲忘險要，失燕北面受風寒。傍無公議扶种李，○中有流言阻范韓。○寄語深衣○揮塵者，身經日擊始知難。

○夏，謂西夏，本姓拓跋，唐賜姓李，世爲夏州節度使，宋時元昊稱帝，國號大夏，史稱西夏，據有今內蒙鄂爾多斯阿拉善及甘肅西北部，世爲宋邊患，後爲蒙古所滅。○种李，謂种師道、李綱。种師道，

字叔彝，知兵有謀，巍然有柱石之望，靖康中拒金兵有功。李綱，字伯紀，邵武人，歷仕徽、欽、高三朝，位至宰相，諡忠定。綱負天下之望，以一身用捨爲社稷民人安危所繫。○范韓，謂宋名臣范仲淹及

韓琦，范仲淹，吳縣人，字希文，仁宗時與富弼率兵同拒西夏爲朝廷所倚重官至參知政事爲秀才時嘗言士當先天下之憂而憂後天下之樂而樂其以天下自任如此守延安時夏人相戒莫敢犯曰小范老子胸中自有數萬甲兵韓琦，安陽人，字稚圭。仁宗時西夏反琦爲陝西經略招討使與范仲淹率兵拒戰久在兵間名重當時後爲相臨大事決大議不動聲色執政十年光輔三主社稷臣也。

④深衣，士大夫之服。揮塵，言揮塵尾拂也。晉人好清談，每揮塵尾以爲談助。

先皇立國用文儒，奇士多爲筆墨拘。澶水①歸來邊奏少，熙河②捷外戰功無。生前上亦知強至，③死後人方誅尹洙。④螻蟻小臣孤憤意，夜窗和淚看輿圖。

①澶水，謂澶淵。宋真宗時，遼人入寇，寇準請帝親征，遂幸澶州，遼乃奉書請盟，罷兵去。②熙河，地

名，宋與西夏交界處。③強至，字幾聖，宋錢唐人。慶歷進士，爲文簡古不徇俗。宰相韓琦欲薦充館

閣，不果，終祠部郎中。④尹洙，字師魯，宋河南人。天聖進士，遷太子中允。會范仲淹貶，洙奏仲淹臣

之師友，仲淹被罪，臣不可苟免，出監唐州酒稅。自西夏不庭，洙常在兵間。性內剛外和，博學有識度，

爲文簡練有法，世稱河南先生。

書事二首錄一

人道山東入職方，○書生膽小慮空長。遺民似蟻飢難給，俠士如鷹飽易揚。未見
馳車修寢廟，先聞鑄印拜侯王。青齊父老應流涕，何日鸞旗○駐路旁！

○職方，官名，主四方者。句謂宋收復山東。○鸞旗，天子之旗。

夢豐宅之○二首錄一

一別茫茫隔九京，夢中慷慨語如生。老猶奮筆排和議，病尙登陴募救兵。天奪偉
人關氣數，時無好漢共功名。殘明仍在王師老，寶劍雖埋憤未平。

○豐有俊，字宅之，宋鄞人。紹熙進士，累官知揚州，所至有聲。

寄何立可○提刑

故人握節守齊安，○聞說邊頭事愈難。赤手募丁修險隘，白頭擐甲禦風寒。半腰
城甫包圍畢，一把兵皆點摘殘。收得去年書在架，憶君燈下展來看。

○何立可，仕履不詳。○齊安，地名，在今湖北黃岡附近。

壯士如駒出渥洼，○死眠牖下等蟲沙。老儒細爲兒郎說，名將皆因戰起家。

○渥洼，水名，在今甘肅，產馬之處。

聞何立可李茂欽訃二首

初聞邊報暗吞聲，想見登譙與虜爭。世俗今猶疑許遠，○君王元未識真卿。○傷
心百口同臨穴，極目孤城絕救兵。多少虎臣提將印，誰知戰死是書生！

○許遠，唐玄宗時拜睢陽太守，累加防禦使，適張巡將兵三千至，遠與合兵拒賊，（安祿山）以自
才不及巡，請稟軍事，而居其下，專治軍糧戰具，被圍數月，糧盡無援，城陷，與巡俱被執，不屈死。○
顏真卿，字清臣，唐臨沂人。玄宗時爲平原太守，安祿山反，獨倡義討之，亂平，封魯國公。德宗時慰喻
李希烈，持節不屈，爲所縊殺。

何老長身李白鬚，傳聞死尙握州符。戰場便合營雙廟，太學今方出二儒。史館何
人徵逸事，羽林無日訪遺孤。病夫疇昔曾同幕，西望關山涕自濡。原注二君皆舊同官

題忠勇廟

隨庵漫錄：紹定庚寅春，汀寇入誰，趙守竄，殿司裨將胡斌領弱卒二百，巷戰，矢盡刀折，易雙鐵鞭，所殺尤衆，死焉。坐執雙鞭，屢日不僵，民賴其力，多獲竄免。守臣王埜聞于朝，贈武節大夫，贈廟額忠勇。士各全軀命，惟侯視死輕。張巡①鬚盡怒，先軫②面如生。短刃猶梟寇，空卷③尙背城。新祠蕭鼓盛，人敬比神明。

①張巡，見前滕茂實詩註。

②先軫，春秋晉大夫。秦伐鄭，襄公從軫之謀，敗秦師于殽，獲秦將以歸。

公從文嬴請釋之，軫聞之怒，不顧而唾。狄伐晉，軫曰：「匹夫逞志于君，而無討，敢不自討乎？」免胄入狄師死焉。狄人歸其元，面如生。③卷，連弩也。

王庭珪

庭珪，字民瞻，宋安福人。政和八年進士。紹興中，胡銓上疏乞斬桧，謫新州，庭珪獨以詩送行，坐訕謗流夜郎。桧死，許自便。孝宗召對內殿，除直敷文閣。有瀘溪集。

張持操攜徐獻之侍郎書見訪，兼出示著述中興論諸雜文爲賦詩一首以文軸還之，他日亦錄寄獻之也。

君不能徒步上書獻天子，又不能移書帝城結王公。欲將筆力扛九鼎，紙上有說能平戎。宣和○治極久忘戰，羯奴騎馬嘶淮甸。○是時猶屯百萬師，無人北向放一箭。大臣搏手知何爲，草間公卿兒女啼。至今謀國無上策，讀君斷稿令人悲。君家人物照青汗，○曲江○猶識胡雛亂。他年論事要回天，應向荊州尋好漢。

○宣和，宋徽宗年號。○句謂遼金入寇，淮水一帶被擾。○汗青，言書之史策也。古時以火炙簡令汗，取其青易書，謂之汗青。○曲江，謂張九齡。玄宗時安祿山討奚契丹敗，帝欲曲宥。九齡曰：

「祿山喪師，不可不誅，且勿誅後必爲患。」帝不聽，後祿山反，帝遷蜀，思其言，爲之流涕。

送宣向卿往衡山兼寄胡康侯^①侍講

海內甲馬未盡休，豪英爲時當出謀。天生奇才必有用，何乃相率居巖幽！胡公人品今第一，汗漫久作朱陵游。朱陵窟宅倚蒼翠，此公招隱安可留。九廟今誰起頽壓，四方正爾煩誅求。我聞昔時元刺史，^②春陵^③地分天子憂。少陵^④作詩頌其事，至今人傳元道州。公爲道州績猶偉，誰爲再作春陵謳。孤城疲卒捍狂賊，高論力詆庸兒羞。安知如公數十輩，參錯天下爲邦侯。京洛腥羶不難掃，潢池^⑤寇孽不難收。願公早請尙方劍，^⑥先斬佞臣張禹^⑦頭。

①胡安國，字康侯，宋崇安人。紹聖進士，高宗時以張浚薦，除中書舍人，兼侍講，獻時政論二十一篇，

尋以疾求去。謝良佐稱其如大冬嚴雪，百草萎死而松柏獨秀。卒諡文定。②元結，字次山，後魏之

裔。舉天寶進士，肅宗召見，上時議三篇，帝悅之。後歸樊上，著書自娛，晚拜道州刺史，免徭役，收流亡，

進授容管經略使，身諭蠻豪，綏定諸州，民樂其教，至立石頌德。③春陵，地名，在今湖南。④少陵，

謂杜甫。

⑤潢池，漢書：「故使陛下赤子，盜弄陛下之兵于潢池中耳。」此言海濱羣盜爲寇，無異

于幼兒私竊兵器戲弄于池塘之畔，非有重大之罪也。今通諭作寇盜解。⑥尙方劍，猶尙方斬馬

劍。尙方，作供御器物之官，斬馬劍，劍利可以斬馬也。漢成帝時槐里令朱雲請賜尙方斬馬劍，斬安

昌侯張禹。

⑦張禹字子文，漢河內人，封安昌侯。

戴復古

復古，字式之，號石屏，黃巖人。嘗登陸放翁之門，以詩鳴江湖間。有石屏集。

嘉定甲戌孟秋二十有七起居舍人兼直學士院真德秀^①上殿直前奏邊事不顧忌諱一疏萬言援引古今鋪陳方略忠誼感激辭章浩瀚誠有補于國家天台戴復古獲見此疏伏讀再三竊有所感敬效白樂天體以紀其事錄于野史

禁城雞唱金門開，起居舍人攜疏來。榻前一奏一萬字，歷歷寫出忠義懷。頓首惶
恐臣昧死，越錄敢言天下事。百年河洛行胡朔，恨滿東南天一角。夷甫^②諸人責
未酬，志士愁眠劍鋒落。天意未回事難舉，鄉來一試成干誤。犬羊頻歲自相屠，^③
盛衰大抵由天數。昨臣銜命出疆時，自期有去必無歸。屈膝穹廬當憤死，天相孤
忠半道回。金山^④之下長江水，擊楫中流書壯志。東風吹上妙高臺，^⑤略望江淮

見形勢。形勢從來只如此，幾年待得天時至！朝廷爲計保萬全，往往忘卻前朝恥。臣今未暇論規恢，胡虜已亡何慮哉！中原曠地無人管，政恐英雄生草萊。北方苦饑民骨立，萬一東來竊吾粟。邊頭諸州無鐵壁，借問誰能備倉卒？請朝廷厲精兵，擇良將；辦多多，策上上；更選人材，老練通達；分守要衝，講明方略。一賢可作萬里城，一人可當百萬兵。坐令國勢九鼎重，所賴君心一點明。長牒奏徹龍顏悅，繼言臣愚進此說，言雖鄙，用甚切，宸斷必行天下福。勿謂儒生論迂闊，臣之肝膽與人別，讀書豈爲文章設。王師若出定中原，玉堂④敢艸平羌策。

①嘉定，宋寧宗年號。起居舍人，官名。真德秀，字景元，後改希元，宋浦城人。慶元進士，官至參知政事，世稱西山先生，諡文忠。其學以朱子爲宗，自韓侂胄設僞學之禁，以鋼善類，而其後正學得以復明者，德秀之力也。

②王衍，字夷甫，晉臨沂人。神姿高徹，而好清談。總角時，山濤見而奇之，曰：「何物

老嫗，生此寧馨兒。然誤天下蒼生者，未必非此人也。」③句謂金元互相攻伐，金勢日蹙。④金山

山，山名，在江蘇丹徒縣西北。本名浮玉山，以裴頭陀開山得金，因名。⑤妙高臺，在金山絕頂，形勝

第一，宋僧了元建，亦名晒經臺。⑥玉堂，官署名，宋時指翰林官署。

題徐京伯通判北征詩卷

一襟忠誼氣，數首北征詩。不許公卿見，徒爲篋笥奇。銜枚衝夜雪，擊楫渡江時。此志無人共，愁吟兩鬢絲。

楊由義

由義，字宜之，宋開封人。避地鹽官，以父蔭補官。隆興初，以閣門祇候使金，不屈而還。孝宗嗟嘆。徽國朱文公會受業焉。

弔王忠肅

太原城下屹行宮，雲樹龍蔥掩碧空。鐵馬無聲汾水急，滿天風雨泣英雄！
海寧

縣志

○王稟，字正孫，宋開封人。靖康初，總軍太原，金人入寇，稟提孤軍，由平陽應援，自春至秋，救援不至，城陷，抗辭罵賊，赴火死。

○汾水，源出山西寧武，流經太原府境，轉入黃河。

林宋偉

宋偉，字力叟，號橘園。

題忠毅姚公○廟

梅圃詩話，紹興辛巳之冬，金主亮傾國入寇，如林之族，充塞淮甸，尉子橋之戰，大將王權先遁，統領姚興，獨以所部四百騎當虜六十萬，自辰至午，凡十戰，斃數百人。虜相謂曰：「使更數人如此，吾曹何可當！」權不遣一卒援，部將戴皋亦玩視不救，興竟沒于陣。朝廷憫其忠，厚加恤典，謚忠毅，立廟淮甸，迄今血食。橘園林宋偉力叟題四絕于廟。

赤心許國自平時，見敵捐軀更不疑。權忌皋庸○皆遁走，同時死難只青獅。○

○姚興，宋相州人，靖康中以武功累遷荆湖南路兵馬副都監。金人渝盟，王權遣興拒之，與金兵遇，揮兵力戰，救援不至，父子俱死，謚忠毅。

○權謂王權，當時大將皋謂戴皋，王部將也。

○青獅，姚

興馬名，姚每親飼之，若通其語言，時取斗酒投大盆中，與馬同飲，曰：「吾與汝同力報國！」竟與馬同死。

農父犁田出寶刀，○銅花浸血冷侵毛。神鋒凜凜衝星斗，未許豐城劍氣高。○

○耕者得姚所用大刀，重六十斤。

○豐城劍氣，晉書：吳未滅時，斗牛之間，常有紫氣，後張華以問

雷煥，煥曰：「斗牛之間有異氣，是寶劍之精，上徹于天耳。」華以煥爲豐城令，掘獄基得雙劍，一曰

龍泉，一曰太阿。自是牛斗間氣不復見。

歲歲烝嘗九月期，○西風笳鼓萬人悲。山邊走馬神旗閃，遙望君侯復下來。

○姚興生重九日，軍民祀之。

兩日經行舊戰場，卻來祠下謁堂堂。偷生諸將今何在，萬古英靈獨耿光。

周洎

洎，字子及，宋天台人，乾道二年進士，官國子監主簿。

拜卞忠貞墓

晉鼎艱危，^①姦人窺，孰謀國者如兒嬉。陷窳弗設，延虎豹，虓鬪搏噬，嬰者摧，^②羣公奔潰，不敢誰。卞公力疾起督師，謂事迫矣，奚生爲？以肉餒虎，吁可悲！公則死矣。二子隨，偉哉忠孝萃一時。維公忠義，天所資，向來謀國如著龜，^③不用吾言，至于斯。爲社稷死，則死之。冶城之麓，江之湄，荒冢突兀，餘豐碑。半生讀史，長歎歎，拜公之墓，涕霑頤。死者可作吾誰歸！嗟哉江左固多士，往往所欠惟一死。元規^④兒輩何足罪，王公^⑤偪仄石頭裏。氣息奄奄，有如泉下鬼。蘇武^⑥之節，不如是，視公胡不賴有泚，^⑦男子之死一言耳。死而不亡，公父子。建康志

①卞壺，字望之，晉冤句人。永嘉中爲著作郎，成帝立，太后臨朝，蘇峻反，壺以尙書令都督諸軍拒之。

軍敗，力疾戰死，二子眈、盱同時見害。諡忠貞。其墓在金陵冶城。②輓，脆，不安貌。③虓，喻勇士

奮怒如虎也。虓，虎怒鳴也。闕，虎聲搏擊也。噬，嚙也。嬰，當也。④著龜，古占卜之具，此喻謀國有先見

之明，如著龜之示兆也。⑤庾亮，字元規，晉鄆陵人。風格整潔，動由禮節。初拜中書郎，累遷中書監。

成帝初，蘇峻反，亮鎮蕪湖，郭默反，亮率步騎討之，遷征西將軍，諡文康。⑥王公疑指王導，導，字茂

弘，元帝爲瑯琊王時，導知天下將亂，勸王招賢共事。及卽位，參與機務，朝野傾心。後受遺詔扶幼主。

歷事三朝，出將入相，頗有功績。石頭城，卽今南京，東晉都此。⑦蘇武，字子卿，漢杜陵人。武帝時以

中郎將使匈奴，被留居海上，嚼雪吞氈，仗節牧羝十九年，得還。昭帝拜典屬國，宣帝時賜爵關內侯。

⑧穎有泚，猶言慚愧汗顏，語本孟子。

陳文龍

文龍，字志忠，一字君賁，宋興化軍人。咸淳四年廷對第一，累遷參知政事。元兵至杭，文龍乞歸養。益王立于福州，復拜參知政事，充閩廣宣撫使，即興化軍開闢。元兵攻城，通判曹澄孫降，俘至杭，餓死。

諡忠肅。

元兵俘至合沙詩寄仲子

斗壘孤危勢不支，書生守志定難移。自經溝瀆非吾事，臣死封疆是此時。須信疊
囚堪疊鼓，未聞烈士樹降旗。一門百指淪胥盡，唯有丹衷天地知。

○疊鼓，古戰爭時，殺牲以祭，以血塗鼓也。此喻自身被俘，生死不顧，雖以疊鼓，亦所不辭。

文天祥

天祥生時夢紫雲，故名雲孫，天祥其字也。寶祐乙卯以字貢，遂改字宋瑞，又字履善，吉州廬陵人。廷對第五，理宗擢第一。德祐乙亥，元兵渡江，奉詔起兵，除右文殿樞密，權兵部，屯兵洪詔，兼知平江府，常州破，朝議棄平江，趣天祥移守餘杭。丙子正月，伯顏兵至高亭，陳宜中、張世傑皆遁，乃除右丞相，兼樞密，至北軍講解，遂爲所留，而臨安降表已出，伯顏卽脅隨祈請使北行。至京口脫走，趨真州，謀合兩淮作興復計，而制置李庭芝疑拒之，復從揚州逃至高郵，崎嶇數瀕死，得渡海道至台溫，奉益王子福州，督諸路軍，號召天下，由汀漳入梅州，戰零都，大捷，因開府興國，元兵大至，旋潰，妻子皆陷。及衛王立，欲移軍入朝，而宜中世傑忌阻之，第加少保信國公。張宏範破厓山，令弘正襲執天祥，服腦子，二兩不死，繫至燕，不屈，被囚四年而志愈堅，遂遇害。衣帶有贊曰：「孔曰成仁，孟曰取義，惟其義盡，所以仁至。讀聖賢書，所學何事，而今而後，庶幾無愧。」有指南錄三卷，皆奉使脫難興復記事之詩，又有吟嘯集，則囚燕所作。

紀事

原序曰：正月二十日晚，北留予營中，云北朝處分，皆面奉聖旨。南朝每傳聖旨而使者實未曾得到。簾前。今程鵬飛面奏大皇，親聽處分。程回日卻與丞相商量大事畢歸闕。既而失信，予直前責虜酋，辭色甚厲，不復顧死。譯者再四失辭，予迫之益急。大會怒且愧，諸酋羣起呵斥，予益自奮，文煥輩勸予去。虜之左右，皆喑喑嗟嘆，稱男子心。

狼心那顧敵銅盤，舌在縱橫擊可汗。自身身為齧粉碎，虜中方作丈夫看。

杜架閣二首之一

原序曰：天台杜澥，字貴卿，糾合四千人，欲救王室，當國者不知省。正月十三日，見予于西湖上，予嘉其志，頗獎異之。十九日，客贊予使北，杜斷斷不可，客逐之去。予果爲北所留，後二十日，驅予北行，諸客皆散，杜憐予孤苦，慨然相從，天下義士也。

仗節辭王室，悠悠萬里轅。諸君皆雨別，一士獨星言。啼鳥亂人意，落花銷客魂。
東坡愛巢谷，頗恨晚登門。

○星言，語本詩「星言鳳駕。」

○巢谷，字元修，眉山人。東坡謫嶺海，谷往訪之，至新州病死。

題蘇武忠節圖

原序略云：余脫走入真州，苗守出李龍眠畫漢蘇武忠節圖，求予題咏，撫卷淒涼，浩氣憤發，慨慷激烈，有去國思君之念矣。遂賦三詩，書于卷後。時丙子三月二日也。

忽報忠圖紀歲華，東風吹淚落天涯。
蘇卿更有歸時國，老相兼無去後家。
烈士喪元心不易，達人知命事何嗟。
生平愛覽忠臣傳，不爲吾身亦陷車。

獨伴羝羊海上游，相逢血淚向天流。
忠真已向生前定，老節須從死後休。
不死未論生可喜，雖生何恨死堪憂。
甘心賣國人何處，曾識蘇公義膽不！

漠漠愁雲海戍迷，十年何事望京師。
李陵○罪在偷生日，蘇武功成未死時。
鐵石心存無鏡變，君臣義重與天期。
縱饒夜久胡塵暗，百煉丹心涅不緇。

○李陵，字少卿，漢隴西人。少爲侍中，善騎射，愛人下士。武帝時，伐匈奴，以少敵衆，後援不至，力竭降。帝聞之，族陵家。

過零丁洋

原序曰：上巳日張元帥令李元帥過船，請作書招諭。少保投拜，遂與之言，我自救父母不得，乃教人背父母可乎！書此詩遺之。李不能強，持詩以達，張但稱好人好詩，竟不能逼。

艱苦遭逢起一經，干戈落落四周星。山河破碎風拋絮，身世飄搖雨打萍。皇恐灘頭說皇恐，零丁洋裏嘆零丁。人生自古誰無死，留取丹心照汗青。①

①汗青，見王庭珪詩注。

言志

九垓化爲魅，億醜俘爲虜。既不能變姓名卒于吳，②又不能髡鉗奴于魯。③遠引不如四皓翁，④高蹈不如仲連父。⑤冥鴻墮矰繳，長鯨陷網罟。鷓燕上下爭誰何，螻蟻等閑相爾汝。狼藉山河歲云杪，飄零海角春重暮。百年落落生涯盡，萬里遙遙行役苦。我生不辰逢百罹，求仁得仁尙何語。一死鴻毛或泰山，之輕之重安所處。婦女低頭守巾幗，男兒嚙齒吞刀鋸。殺身慷慨猶易免，取義從容未輕許。仁人志士所植立，橫絕地維屹天柱。以身徇道不苟生，道在光明照千古。素王⑥不作

春秋廢，獸蹄鳥迹交中土。閔位^⑥適當三七間，禮樂終當屬真主。李陵^⑦衛律^⑧罪通天，遺臭至今使人吐。種瓜東門^⑨不可得，暴骨匈奴固其所。平生讀書爲誰事，臨難何憂復何懼。已矣夫！易簣不必如曾參^⑩，結纓^⑪猶當效子路。

①戰國時范雎亡秦，變姓名爲張祿，此不知何指。②楚項羽將季布，數窘高祖，及羽滅，高祖購之

千金，布潛匿于魯朱家，髡鉗爲奴，後滕公爲解說，得赦。③商山四皓，漢之隱士，東園公、綺里季、夏

黃公、甬里先生也。④魯仲連，戰國齊人，高蹈不仕，喜爲人排難解紛。游趙，秦圍趙急，魏使辛垣衍

請帝秦，仲連義不許，見衍曰：「彼卽肆然爲帝，連有蹈東海而死耳！」秦軍爲卻。後田單言于齊王，

欲爵之，連逃隱海上以終。⑤素王，謂孔子也。⑥閔位，猶言非正統。按漢路溫舒從祖父受歷數

天文，以爲漢當厄三七之間。三七，二百一十也。漢初至哀帝元年，共二百一十年。此以漢喻宋。⑦

李陵，見前註。⑧衛律，本胡人，生長于漢，與李延年善。以延年薦，使匈奴，還，會延年家被誅，律懼，亡

降匈奴。⑨種瓜東門，謂邵平。平，秦廣陵人，封東陵侯。秦亡，種瓜長安東門。⑩易簣，曾參將死，因

寢席之非禮，命曾元等舉扶而易之，反席未安而歿。⑪結纓，子路負創將死，曰：「君子死，冠不免，」

乃結纓而死。

張元帥謂予國已亡矣，殺身以忠，誰復書之？予謂商非不亡，夷齊自不食周

粟，人臣自盡其心，豈論書與不書？張爲改容，因成一詩。

高人名若浼，烈士死如歸。智滅猶吞炭，商亡正採薇。豈因微後福，其肯蹈危機。萬古春秋義，悠悠雙淚揮。

○豫讓戰國晉人，事智伯。趙襄子滅智伯，讓漆身爲厲，吞炭爲啞，謀刺襄子。爲襄子所獲，求襄子之衣擊之，以致報仇之意，遂自殺。

○伯夷、叔齊，孤竹國君子，隱首陽山。周滅紂，夷齊恥食周粟，采薇

而食，遂餓死。

過淮河宿關石有感

北征垂半年，依依只南土。今辰渡淮河，始覺非故宇。故鄉已無家，三年一羈旅。龍翔在何方，乃我妻子所。昔也無奈何，忽已置念慮。今行日云近，使我淚如雨。我爲綱常謀，有身不得顧。妻兮莫望夫，子兮莫望父。天長與地久，此恨極千古。來生業緣在，骨肉當如故。

送行中齋○

神龍蕩失水，馴擾終未得。威鳳雖在藪，肯顧雞鶩食。所以古之人，受變心不易。毫鼎已遷周，○西山○竟肌瘠。豫子○身自漆，萇弘○血成碧。何嘗怨興廢，而或二心跡。堅白不在緇，羔裘良自惜。此義公素明，俗見或未識。

○鄧剡，字中齋，見前。○毫，商都也。句謂周滅商。○西山，卽首陽山，謂伯夷叔齊，見前註。○豫讓，見前註。○萇弘，周靈王時人。周人殺之，流血成碧，不見其尸。

亂離歌六首

按鐵網珊瑚引信國公遺墨云：「收柳女信，痛割腸胃。人誰無妻兒骨肉之情，但今日事到這裏，于義當死，乃是命也。奈何！奈何！塗中有三詩，今錄之，言至于此，爲之奈何。兄事只待千二哥至，造物自有安排。可將此詩呈嫂氏，歸之天命。仍語觀妝瑤英，不會周旋得，毋怨毋怨，徐妳以下，皆可道達吾此意，當此天翻地亂，人人流落，天數奈何奈何！一可令柳女環女好做人，爹爹管不得，淚下哽咽哽咽。一此詩本仍可納之千二哥。兄天祥家書達百五賢妹。」

有妻有妻出糟糠，○自少結髮不下堂。亂離中道逢虎狼，鳳飛翩翩失其凰。將雛

二三出何方，何虞國破家又亡。不忍舍君羅襦裳，天長地久遠茫茫，牛女夜夜遙相望。嗚呼一歌兮歌正長，悲風北來起徬徨。

○糟糠貧者之所食。後漢宋弘有「糟糠之妻不下堂」之語。

有妹有妹家流離，良人去後攜諸兒。北風吹沙塞草萋，窮媛慘淡將安歸。去年哭母南海湄，三男一女同歔歔。惟汝不在割我肌，汝家零落母不知，母知豈有瞑目時。嗚呼再歌兮歌孔悲，鵲鵲在原○我何爲。

○詩：「鵲鵲在原，兄弟急難。」此喻家遭亂離，弟妹失散。

有女有女婉清揚，大者學帖臨鍾王，○小者讀字聲琅琅。朔風吹衣白日黃，一雙素壁委道旁。雁兒雁兒秋無梁，隨母此去誰人將。嗚呼三歌兮歌愈傷，非爲兒女淚浪浪。

○鍾王，謂鍾繇王羲之，古書法名家。

有子有子風骨殊，釋氏抱送徐卿雛。四月八日摩尼珠，榴花犀錢落繡襦。蘭湯百

沸香似酥，歛隨飛藿，飄泥塗。汝兄。十三騎鯨魚，汝今三歲知在無。嗚呼四歌兮，歌以吁，燈前老影明月孤。

○四月八日，佛生日，徐陵以是日生，天祥子佛生亦以是日生，故云。○謂天祥長子，名道生，早卒。

有妾有妾，今何如，大者手將玉蟾蜍。○次者親抱汗血駒。○晨妝靚服。○臨西湖，英英雁蕩，飄瑤琚。風花亂墜，烏嗚呼，金鏡沉瀼，浮汗渠。天摧地裂，龍虎徂，美人塵土何代無。嗚呼五歌兮，歌鬱紆，爲爾迎風立斯須。

○玉蟾蜍，喻女。○汗血駒，謂良駒。汗血，言流汗如血。此喻其幼子。○公有妾曰靚妝，曰瑤英，兩

句，寓名。

我生我生，何不辰，孤根不識桃李春。天寒日短，空愁人，北風吹隨鐵馬塵。初憐骨肉鍾奇禍，如何骨肉更憐我。汝在空能嬰我懷，我死誰當收我骸。人生百年何醜好，黃梁○得喪俱草草。嗚呼六歌兮，勿復道，出門一笑天地老。

○黃梁，謂黃梁夢。唐盧生于旅舍一夢，數十年得失，及醒，主人炊黃梁尙未熟也。

許遠○

起師哭玄元，○義氣震天地。百戰奮雄姿，鬱妾士揮淚。睢陽水東流，雙廟垂百世。當時令狐潮，○乃爲賊游說。

○許遠，見前劉克莊詩註。

○玄元謂老子。老子，唐時稱玄元皇帝。遠起兵時，曾哭玄元廟。

○令

狐潮，安祿山部將。

顏杲卿○

常山義旗奮，范陽哽喉咽。明維○一狼狽，六飛○入西川。哥舒○降且拜，公舌膏
戈鋌。人世誰不死，公死千萬年。

○顏杲卿，字昕之，唐臨沂人。安祿山鎮范陽，表爲營田判官，假常山太守。祿山反，以策殺祿山假子

李欽湊，擒賊將高邈送京師。祿山遣人急攻常山，杲卿未及爲守計，糧矢盡，城陷，爲賊執。杲卿見祿

山罵詈，祿山縛之天津橋柱，節解，以肉啖之，杲卿詈不絕口。賊鈎其舌曰：復能詈否？杲卿含胡而死。

○「明維」疑當作「胡維」。○六飛，喻帝王也。○哥舒翰，唐人。善戰，破吐蕃有功，爲左僕射

平章事。安祿山反，出戰不利，降賊被殺。

正氣歌

余囚北庭，坐一土室，空廣八尺，深可四尋，單扉低小，白閒短窄，汗下而幽暗，當此夏日，諸氣萃然。雨潦四集，浮動床几，時則爲水氣。塗泥半朝，蒸滷歷瀾，時則爲土氣。乍晴暴熱，風道四塞，時則爲日氣。檐陰薪爨，助長炎虐，時則爲火氣。倉廩寄頓，陳陳逼人，時則爲米氣。駢肩雜遝，腥臊汗垢，時則爲人氣。或圍溷浮屍，或腐鼠雜出，時則爲穢氣。疊是數氣，當者鮮不爲厲，而余以孱弱俯仰其間，于茲二年矣。是殆有養致然，然爾亦安知所養何哉？孟子曰：「我善養吾浩然之氣。」彼氣有七，吾氣有一，以一敵七，吾何患焉？況浩然者，乃天地之正氣也。作正氣歌一首。

天地有正氣，雜然賦流形。①下則爲河嶽，上則爲日星。于人口浩然，沛乎塞蒼冥。皇路當清夷，含和吐明廷。②時窮節乃見，一一垂丹青。③在齊太史簡，④在晉董狐筆。⑤在秦張良椎，⑥在漢蘇武節。⑦爲嚴將軍頭，⑧爲嵇侍中血。⑨爲張睢陽齒，⑩爲顏常山舌。⑪或爲遼東帽，⑫清操厲冰雪。或爲出師表，⑬鬼神泣壯烈。或爲渡江楫，⑭慷慨吞胡羯。或爲擊賊笏，⑮逆豎頭破裂。是氣所磅礴，凜烈萬古存。當其貫日月，生死何足論。地維賴以立，天柱⑯賴以尊。三綱⑰實繫命，道義爲之

根。嗟余遘陽九，^①隸也實不力。楚囚^②纓其冠，傳車^③送窮北。鼎鑊甘如飴，求之不可得。陰房闐鬼火，春院闕天黑。牛驥同一皁，雞栖鳳凰食。一朝蒙霧露，分作溝中瘠。^④如此再寒暑，百沴^⑤自辟易。哀哉沮洳場，爲我安樂國。豈有他謬巧，陰陽不能賊。顧此耿耿在，仰視浮雲白。悠悠我心憂，蒼天曷有極！哲人^⑥日已遠，典刑在夙昔。風簷展書讀，古道照顏色。

①二句謂浩然正氣充塞天地之間。

②二句謂清平之世，賢臣效忠于朝廷。

③丹青，圖畫也。謂

世窮乃見氣節，正氣立身者，得圖像傳于後世。

④春秋時崔杼弑齊君，太史直書之，杼殺太史。

⑤春秋時晉趙盾弑君，太史董狐直書之。

⑥張良，字子房，家五世相韓，謀爲韓報仇，擊始皇于博

浪沙，誤中副車。

⑦蘇武見前周泊詩註。

⑧漢末劉璋使嚴顏守巴郡，爲張飛所擒，飛欲其降，顏

曰：「我州但有斷頭將軍，無降將軍。」飛怒，令牽去砍頭，顏色不變，飛壯而釋之，引爲賓客。

⑨稽

紹，字延祖，晉銓人。永興初，河間王反，紹從帝戰，侍衛皆潰，惟紹以身捍衛，遂被害于帝側，血濺御衣。

事定，左右欲浣衣，帝曰：「此稽侍中血，勿浣。」

⑩張巡，守睢陽，城陷被執。賊帥詢以每接戰時何

以緊嚼其齒，巡罵曰：「恨不吞賊耳！」遂被殺。

⑪顏常山，見前顏杲卿詩註。

⑫管甯，字幼安，三

國朱虛人。漢末黃巾之亂，避地遼東，不就徵辟。居遼東三十年，戴白帽，著布裙，安貧樂道，不問世事。
⑤蜀相諸葛亮，出師伐魏，臨行上出師表。
⑥渡江擊楫，祖逖事。逖，晉范陽人，字士雅，爲豫州刺史，渡江擊楫，誓曰：「不清中原而復濟者，有如此江！」部兵與石勒相持，黃河以南，盡爲晉土。卒之日，豫州士女，如喪父母。
⑦段秀實，字成公，唐涇陽人。德宗時，朱泚反，召秀實計事，秀實奪象笏擊泚，唾其面，大罵，笏中泚頰，流血被面，秀實遂遇害。
⑧地維天柱，喻辭，謂天地賴正氣以不傾墜。
⑨三綱，謂君爲臣綱，父爲子綱，夫爲妻綱也。孟子以浩然之氣配道義，故此以道義爲浩氣之根本。
⑩陽九，奇數也，爲陽數之窮。古人以陽九爲厄會。
⑪楚囚，見前宇文虛中詩「南冠」條註。
⑫傳車，猶言驛車，謂乘傳車以赴燕也。
⑬句謂自分當作溝中之瘠，死不得歸也。
⑭疹，害也，惡也。
⑮句謂百害退避。
⑯哲人謂上述諸人，典型，指上述十二事可爲後世模楷者。

去年十月九日余至燕城今周星不報爲賦長句

君不見常山太守①罵羯奴，天津橋②上舌盡劖。又不見睢陽將軍③怒切齒，三十六人同日死。去冬長至前一日，朔庭呼我弗爲屈。丈夫開口卽見膽，意謂死生在頃刻。赭衣④冉再生蒼苔，書雲時節忽復來。鬼影青燈照孤坐，夢啼死血丹心

破。只今便作渭水囚，食粟已是西山羞。悔不當年跳東海，空有魯連心獨在。^⑤

①常山太守謂顏杲卿，見前註。

②天津橋，杲卿死處，見前詩註。

③睢陽將軍謂張巡，見前滕茂

實詩註。

④赭衣，囚衣也。

⑤末二句用魯仲連卻秦軍事。

出獄時臨刑詩按趙弼效顰集載臨刑詩三首，不知真偽，今錄其一。

衣冠七載混氈裘，憔悴形容似楚囚。龍馭兩宮崖嶺月，貔貅萬灶海門秋。①天荒地老英雄喪，國破家亡事業休。惟有一腔忠烈氣，碧空長共暮雲愁。

①句謂厓山之敗帝昺與后同死于海。

何夢桂

夢桂，字巖叟，淳安人。咸淳乙丑登第，授台州軍事判官，旋引疾去。元初累徵不起，築室著書，自號潛齋。有潛齋集。

挽太學正節先生徐應鑣①

國破君亡一死宜，絕憐兒女死如飴。龍池②竟負媯皇誓，蛙坎③空遺烈士悲。洗骨不污唐六館④，瀝心無愧趙孤兒⑤。北行多少生還客，休向梯雲⑥讀墓碑。

- ①徐應鑣，字巨翁，宋江山人。咸淳末試補太學生，宋亡，三學生皆從入燕，應鑣誓不降，作文祭岳飛祠，長子琦亦賦詩自誓畢，並幼子崧，女元娘，縱火自焚，諸僕驚救撲滅，父子快快出。次日卒同投井死。同舍生哀之，私諡曰正節先生。
- ②龍池，喻所投死之水。言本冀其效力王室，今乃投水而死，故曰負。
- ③蛙坎，亦喻池水。
- ④六館，唐代處士子之館。
- ⑤趙孤兒，謂趙朔子武，見程嬰杵臼條註。
- ⑥梯雲，當是應鑣葬處地名。

林景熙

景熙，字德陽，號霽山，宋温州平陽人。咸淳辛未，太學釋褐，授泉州教官，歷禮部架閣，轉從政郎。宋亡不仕，客居會稽王英孫家，會楊璉真伽發宋陵，英孫使客收其棄骨，熙得高孝兩函，與唐珏所收者，葬於蘭亭，樹冬青以識。庚戌卒於家，年六十九，所居在白石巷，詩曰白石樵唱，大概悽愴故舊之作，與謝翱相表裏。

題陸放翁詩卷後

天寶詩人詩有史，杜鵑^①再拜淚如水。龜堂^②一老旗鼓雄，勁氣往往摩其壘。輕裘駿馬成都花，^③冰甌雪椀建溪茶。承平磨節半海寓，歸來鏡曲^④盟鷗沙。詩墨淋漓不負酒，但恨未飲月氏首。牀頭孤劍空有聲，坐看中原落人手。青山一髮愁濛濛，干戈已滿天南東。來孫卻見九州同，家祭如何告乃翁！^⑤

①陸游，見前。

②杜鵑，以喻帝王。杜甫有杜鵑詩云：「我見常再拜，重是古帝魂。」古時蜀有帝名

杜宇，死後化爲鳥，名曰杜鵑。

③龜堂，陸游所居堂名。

④陸游曾官蜀閬，詳見前。

⑤鏡曲，謂鏡

湖之曲。④放翁有示兒詩，詳見前。

夢中作四首原注云：元兵破宋，河西僧楊勝吉祥，行軍有功，因得於杭置江淮諸路釋教都總統，所以管轄諸路僧人，時號楊總統，盡發越上宋諸帝山陵，取其骨渡浙江，築塔於宋內朝舊址，其餘骸骨，棄草莽中，人莫敢收。適先生與同舍生鄭樸翁等數人在越上，痛憤，乃不能已，遂相率爲采藥者，至陵上以草囊拾而收之。又聞理宗顛骨爲北軍投湖水中，因以錢購漁者求之，幸一網而得，乃盛二函，託言佛經，葬於越山，且種冬青樹識之。會元時作詩，不敢明言其事，但以夢中作爲題，下篇冬青花，亦此意也。

珠亡忽震蛟龍睡，軒敞寧忘犬馬情。親拾寒瓊出幽草，四山風雨鬼神驚。①

①詩言諸陵被發，舊臣不能忘情，故爲拾骨改瘞。

一杯自築珠丘①，土雙匣②，猶傳竺國經。獨有春風知此意，年年杜宇泣冬青。③

①舜葬蒼梧，有鳥銜青砂珠，積成壘，名曰珠丘。②雙匣猶二函，見題注。③冬青，見下詩題注。

昭陵玉匣走天涯，金粟①堆前幾莫鴉。水到蘭亭轉嗚咽，不知真帖落誰家。

①金粟山，唐明皇葬處，此喻帝陵。

珠纓玉鴈又成埃，斑竹臨江首重回。猶憶年時寒食祭，天家一騎捧香來。

冬青花 冬青一名女貞木，又名萬年枝，漢宮嘗植此，後世因之，宋諸陵亦多植此木。

冬青花，花時一日腸九折，隔江風雨清影空。①五月深山護微雪。②石根雲氣龍所藏，尋常螻蟻不敢穴。③移來此種非人間，曾識萬年觴底月。蜀魂④飛遠百鳥臣，夜半一聲山竹裂。⑤

①原注：句謂冬青之在宮中者。②原注：此言在紹興陵上者，冬青開于五月，其色白而微黃。③

原注：謂天子所葬之處，尋常臣民不得而雜處也。④蜀魂謂杜鵑，古傳蜀帝所化，故名。⑤杜甫

詩：「子規夜啼山竹裂。」子規，卽杜鵑也。

聞家則堂①大參歸自北寄呈

濱死孤臣雪滿顛，冰氈嚼盡偶生全。②衣冠萬里風塵老，名節千秋日月懸。清淚秋荒遼海鶴，③古魂春冷蜀山鵑。④歸來親舊驚相問，禾黍離離夕照邊。

①家鉉翁，字則堂，宋眉山人。元兵至杭，丞相檄告天下守令降，鉉翁獨不署。奉命爲祈請使，詣燕，聞

宋亡，旦夕哭不食。元欲官之，不受。後放還，乃歸江南。時年八十有二矣。②句用蘇武使匈奴故事。

武居海上牧羊，以節毛和雪吞食，得不死。③句用丁令威化鶴故事。④句用蜀帝化杜鵑故事。

端午次韻懷古或疑屈原曹娥死非正命是不知殺身成仁者也併爲發之
葵榴入眼明，得酒慰衰齒。胡爲浪自悲，懷古淚紛委。湘江沈忠臣，①越江沈孝子。
②沈骨不沈名，清風兩江水。或云非正命，是昧舍生理。歸全豈膚髮，所懼本心毀。
哭父天爲驚，憂君國將燬。于焉偷吾生，何以立戴履。修短在百年，芳穢垂千紀。之
人死猶生，滔滔真死矣。

①屈原，名平，戰國楚人。仕楚爲三閭大夫，襄王信讒，謫原江南，原作漁父諸篇以見志，自沈汨羅江死。②曹娥，東漢孝女，上虞人。父溺死于江，不得屍，娥年十四，沿江號哭，晝夜不絕聲，旬有七日，投江而死。

讀文山集

黑風夜撼天柱折，萬里飛塵九溟竭。誰欲扶之兩腕絕，英淚浪浪滿襟血。龍庭①
戈鋌爛如雪，孤臣生死早已決。綱常萬古懸日月，百年身世輕一髮。苦寒尙握蘇

武^①節垂盡猶存杲卿^②舌，膝不可下頭可截，白日不照吾忠切，哀鴻上訴天欲裂，一編千載虹光發。書生倚劍歌激烈，萬壑秋聲助幽咽。世間淚洒兒女別，大丈夫心一寸鐵！

①龍庭，見前劉子暈詩注。

②蘇武，見周泊詩注。

③杲卿，見文天祥詩注。

雜詠酬汪鎮卿^①

垂垂大廈顛，一木支無力。精衛^②悲滄溟，銅駝化荆棘。③英風傲几礎，滾死猶鐵脊。血染沙場秋，寒日亦爲碧！惟留吟嘯篇，④千載光奕奕。

①汪鎮卿，名鼎，號桐陽，宋末平陽人。此詩咏文天祥事。

②精衛，鳥名，常銜木石以填東海。

③銅

駝荆棘，謂銅駝荒沒于荆棘之中。本索靖語，以喻世亂。

④吟嘯集，天祥詩集之一。

太學同舍徐應鑣^①誓義沈井後十年衆爲營墓立碑私諡正節先生

高名不與魄俱沈，魚腹孤忠耿至今。翠碣已書身後諡，寒泉猶照死時心。神游舊月山河改，夢斷疎槐風雨深。埋骨誓終從武穆，②棲霞嶺③樹隔秋陰。

○見前何夢桂詩注。○武穆謂岳飛。○棲霞嶺在杭州西湖北，岳墳在其麓。

雜咏

權臣坐偃月，○棄官如飄蓬。及茲顛沛秋，翻然挺孤忠。一死○未得所，罔羅挂飛鴻。渡淮已不食，蛻槁夷齊○風。何人續遷史，○表爲節義雄。

○此咏謝枋得詩。權臣謂賈似道，枋得對策詆時政，諷似道，貶居興國軍。偃月，李林甫爲相時所起堂名。每欲有所中傷，卽坐其中，沈思久之，若笑而出，卽其家破矣。○時枋得欲死節，或勸之曰：「死且未晚，」乃止，餘詳枋得仕履。罔羅句，謂被迫入燕。○夷齊見前注。○遷史謂司馬遷史記。史記列傳以伯夷爲首，重節義也。

△拜岳王墓○

寥落一杯土，英雄萬古冤。孤忠懸日月，遺恨寄中原。樹老殘霞澹，塵深斷碣昏。東南天半壁，往事泣寒猿。

○謂岳飛墓，在杭州棲霞嶺山麓。

謝 翱

翱，字臯羽，慕屈平託遠游，乃號晞髮子，宋福建長溪人。文丞相開府延平，翱以布衣諮議參軍，天祥卒，亡匿，所至輒感哭，挾酒登子陵釣臺，設天祥主亭隅，再拜號哭，以竹如意擊石，歌曰：『魂朝往兮何極，暮歸來兮江水黑，化爲朱鳥兮，有味焉食。』歌畢，竹石俱碎。有晞髮集。

冬青樹引別玉潛

冬青樹，山南陲，九日靈禽居上枝。①知君種年星在尾，②根到九泉護龍髓。恒星畫隕夜不見，③七度山南與鬼戰。④願君此心無所移，此樹終有開花時。山南金粟見離離，白衣⑤人拜樹下起，靈禽啄粟枝上飛。

①玉潛，義士唐珏字。

②九日者，陽谷上有扶木，九日居上枝，一日居下枝。靈禽，鳥也，鳥，陽精也，精

爲魂。今九日居上枝者，魂升其上也，日者，君之象也。（按此引張丁原注）③星在尾者，歲在寅

也。④句喻宋亡。

⑤未詳。

⑥白衣，蓋作者自謂也。

魂飛萬里程，天地隔幽明。死不從公死，生如無此生。丹心渾未化，碧血已先成。無處堪揮淚，吾今變姓名。

梁棟

棟，字隆吉，宋湘州人，後遷鎮江。咸淳進士，選寶應簿，調錢唐仁和尉，宋亡不仕，依弟入茅山從老氏學，有隆吉詩。

哀毘陵

荆溪 ① 水腥泊船早，落日無人行古道。鬪饑有眼不識春，春風吹出青青草。荒基猶認是人家，敗柵曾將當城堡。當時壓境兵百萬，不脫鞞尖堪踢倒。短兵相接逾四旬，毒手尊拳日攻討。內儲外援兩消沈，一縷人心堅自保。孤臣守土輕性命，赤子效死塗肝腦。朝廷有爵媿降附，幽壤無恩澤枯槁。願箋司命錄英雄，收拾忠魂畀蒼昊。

① 毘陵，亦稱常州，今江蘇武進。德祐元年，元兵攻常城破，知州事姚岢、統制王安節等死之。② 荆溪，水名，在江蘇，以近荆南山得名，上承永陽江，下注太湖。

李謹思

謹思，字明道，號養吾，宋餘干人。咸淳中試禮部釋褐，入元卒。

題文丞相吟嘯集

南人不識兩膝貴，曲摺百態卑且勞。斯人護膝不護頭，故以頸血霑君刀。蟠胸孤憤擘不碎，殺氣千丈纏旌旄。援桴親鼓盡南海，背水更用蜚丁○。鑿。俘來吮血語神語，咄咄向與天爭豪。須臾赤日減顏色，元雲莽莽風颼颼。或言巨靈○收拾付真宰，讀罷拊臆生長號。又言豐隆○列缺對愁絕，疾指玉鞭鞭六鼇。雨瓢倒翻水怪舞，斗樞橫軋天籟號。憐伊肝膽苦復苦，亦見曩昔真離騷。刮灰滿地莫掛眼，蓬萊雖遠容輕舠。長驅厲鬼尙堪戰，儘閑未許飛仙遨。乃言興廢在爾不吾與，吾死吾主吾焉逃。魯叟○聞言拍手笑，斯人六經爲骨爲皮毛。斯人捲取六經去，空將質本傳兒曹。

① 蜚丁，蜚戶之丁，南蠻之一種，居閩粵沿海水上。文天祥用之抗金。② 巨靈，河神也。③ 豐隆，雷師也。列缺，謂電也。④ 魯叟，謂孔子。

贈李節婦

郭天錫詩文雜記：謝疊山妻李節婦，以君直故與二子繫金陵獄，一將官欲納之，李給曰：爾能脫我械繫，乃可議此。將以爲然，禱上下釋其獄。李卽具湯沐，約翼日出。是夕，伺二子熟寐，解衣帶自經死。藁葬城東壕。二子放還後數年，子定之復往裹骨歸葬，養吾李先生詩云云。

猝猝多羝屈，幽幽獨雉經。① 借渠施粉黛，聊與照丹青。孤樵② 何年寄，重泉底處
肩？有人能縮地，不隔短長亭。

① 首句謂時人多降元，二句謂李節婦獨能自經盡節。② 孤樵，猶言孤松。

張 琰

琰，字汝玉，宋廣陵人。長身多髯，有節概。補州牙兵，隨制置李庭芝潰圍，南赴行在，所追者及之，麾下鳥獸散，琰獨戰死。

出塞曲

腰間插雄劍，中夜龍虎吼。平明登前途，萬里不回首。男兒當野死，豈爲印如斗。忠誠表壯節，燦爛千古後。

朝發山陽去，暮宿清水頭。上馬左右射，捷下如獼猴。先發服勇決，手提血鬪髀。兵家互勝負，凡百慎前籌。谷音集

黃誠性

仕履不詳。

挽文丞相

三百餘年樂育恩，晚從科目得斯人。崎嶇嶺海期年國，零落氈毛萬死身。○諸葛
○未亡猶有漢，包胥○欲泣更無秦。挑燈慷慨歌梁父，鬢髮蕭森懾鬼神。吳禮

部詩話

○句以蘇武喻文天祥。

○諸葛謂諸葛亮。

○包胥謂申包胥。春秋楚大夫，吳伐楚，入郢，包胥哭

秦廷七日，乞師復國。

○梁父謂梁父吟，諸葛亮好爲梁父吟。

鄧剡

剡，字光薦，號中齋，宋廬陵人。祥興時歷官禮部侍郎，丞相文信公客也。厓山兵潰，爲張宏範所得，教其次子得放還。有中齋集。

挽文信公詩

憶公淚懸河，九地無處瀉。想公騎赤龍，請命蒼梧野。世人醉生死，翻笑獨醒者。焉知千載英，精爽皎不夜。義士無廢興，時運有代謝。念昔喪亂初，公騎使君馬。奮袂起勤王，慷慨淚盈把。須臾三萬衆，如自九天下。燈棋書檄交，笑語雜悲咤。捧土障洪河，一繩維大廈。至哉朝宗性，百折終不舍。身北冠自南，血碧心肯化！顏鈞凜忠勁，杜詩蔚騷雅。晉陽骨肉冤，東市刀兵解。精誠揭天日，氣魄動夷夏。丈夫如此何，一死尤足怕。田橫老賓客，白髮餘息假。有時夢岩電，意悟當飄灑。非無中丞傳，殺青自誰寫。魂歸哀江南，千秋俎鄉社。吳禮部詩話

- ①騎龍，喻死。 ②蒼梧，地名，帝舜崩處。 ③勤王，謂以兵援救王室。 ④血碧，萇弘故事，見前注。
- ⑤句謂天祥善書，如顏真卿之有勁氣。 ⑥句謂天祥工詩，如杜甫之賅薄騷雅，又天祥有集杜詩。
- ⑦田橫，見前注。此鄧剡自喻。 ⑧岩電，目也。 ⑨唐韓愈爲張巡作中丞傳。此喻鄧剡欲爲文山作傳。

韓性同

性同，字伯循，別號古遺，與陳石堂同里而及其門，入元不仕。

岳王墓

妖星墮地芒角赤，龍劍悲號風蕭瑟。中原王氣挽不回，將軍一死如毛擲。秦家小兒真戲劇，○播弄造化搖樞極。指讎爲親忠且逆，隻手上遮天眼碧。○九重茫茫隔天日，無由下燭臣愚直。臣愚萬死不足惜，國恥未湔猶憤激。古墳埋冤血空瀝，風雨年年土花蝕。我恐精忠埋不得，白日英魂土中泣；請將衰骨斲蒼苔，獻作吾皇補天石。曹氏歷代詩選

○句謂秦檜。

○句謂秦檜蒙蔽朝廷。

謝枋得

枋得，字君直，號疊山，宋弋陽人。寶祐進士，爲人豪爽，以忠義自任。應建康試，語侵賈似道，謫居興國軍。德祐初，以江東提刑知信州，元兵至，信州不守，乃變姓名入建寧山中，日麻衣跣履，東鄉哭。已而賣卜建陽市，取米屢以自給。宋亡居閩中，留夢炎薦之不起，遺書曰：「吾年六十餘，所欠一死，豈有他哉！」福建參政魏天佑強之北行，至燕遂不食死。年六十四，門人私諡文節，有疊山集。

初到建寧賦詩一首

魏參政○執拘投北，行有期，死有日，詩別妻子良友良朋。

雪中松柏愈青青，扶植綱常在此行。天下久無龔勝○，潔，人間何獨伯夷○清！義高便覺生堪捨，禮重方知死甚輕。南八○男兒終不屈，皇天上帝眼分明。

○魏天祐，字吉甫，元益都人。官至福建行省參政，以貪罷。○龔勝，字君賓，漢彭城人。哀帝時官光

祿大夫，出守渤海，病免。後復徵爲光祿大夫，王莽秉政，乞歸，莽遣使徵之，勝因敕門人爲棺斂喪事，語畢，遂不復開口飲食，積十四日死。

○伯夷，見前文天祥詩注。

○南八謂薺雲，唐頓丘人。安祿

山反，從張巡守睢陽，城中食盡，巡令乞師于賀蘭進明，引精騎三十，冒圍出，賊當之，皆披靡。既至，進明無出師意，又欲留霽雲，爲大饗，霽雲泣曰：「睢陽將士不食月餘日矣，義不忍獨食！」因拔刀斷一指，一座大驚。將出城，抽矢射浮圖，曰：「吾歸破賊，必滅賀蘭。」復奪圍入，城陷被執，賊欲降之，巡呼曰：「南八男兒死耳，不可爲不義屈！」霽雲笑曰：「欲將以有爲也，公有言，敢不死。」遂死之。

辭洞齋華甫二劉兄惠寒衣

離羅內阱，何損麒麟？反君事讎，忍爲狗彘！凡勸吾入燕吐胸中不平而後死者，皆非忠于謀人者也。『南八男兒死爾，不可爲不義屈。』豈敢曰『將以有爲』乎？平生學問，到此時要見分明。辱惠寒衣，義不當受，大顛果聰明識道理，胸中無滯礙，何必受昌黎先生衣服爲別耶！小詩寫心，謾發一笑。

平生愛讀龔勝，傳進退存亡斷得明。范叔綈袍雖見意，大顛衣服莫留行。

此時要看英雄樣，好漢應無兒女情。只願諸賢扶世教，餓夫含笑死猶生。

○龔勝，見前注。

○范叔謂范雎。雎，戰國魏人，須賈譖雎于魏齊，笞辱雎，雎亡之秦，更姓名曰張祿。

仕秦爲相，須賈使秦，雎微行見之，賈曰：「范叔一寒如此哉！」取一綈袍贈之，及知雎爲秦相，大驚謝罪。雎曰：「以綈袍戀戀，有故人之意，故釋公。」

○大顛，唐僧，姓楊氏，初居羅浮山，後歸潮陽靈

山。韓愈言其聰明識道理，能外形骸，以理自勝，因與往來，造其廬，留衣服爲別。

和曹東谷韻

萬古綱常擔上肩，脊梁鐵硬對皇天。人生芳穢有千載，世上榮枯無百年。此日識公知有道，何時與我詠游仙！不爲蘇武卽龔勝，○萬一因行拜杜鵑。

○蘇武、龔勝並見前注。

○拜杜鵑，見前注。

和葉愛梅韻

道逢患難正當行，禮食從來孰重輕！綠鬢行藏堪檢點，白頭去就要分明。了知死別如龔勝，未必生還似子卿。○緯地經天文不喪，許君獨擅大聲名。

○子卿，蘇武字。

和游古意韻

死易程嬰○豈不知，十年死後未爲非。文辭未必改秦甥，○敲扑徒能抱御衣。○無志何勞悲廟黍，得仁更不食山薇。儒冠有愧一廝養，何忍葵心對落暉。

○程嬰，春秋晉人。與趙朔友，屠岸賈殺趙朔，朔妻遺腹生一兒。朔客公孫杵臼與嬰謀，取他人兒負之匿山中，嬰出告所匿處，攻而殺之。嬰乃抱趙氏真孤匿山中居。後韓厥言于景公，立爲趙氏後，是爲趙武，遂攻屠岸賈滅之。武旣冠，嬰曰：「今宜下報宣孟，杵臼。」遂自殺。

②秦甥，謂呂飴甥，周晉人。惠公時爲大夫，會秦穆公伐晉，執惠公，飴甥會秦伯盟于王城，遂奉惠公以歸。

③句用豫讓故事，見前注。

魏天應

天應，號梅墅，宋建安人。鄉貢進士，受業於謝枋得。

疊翁老師將有行賦詩言別綱常九鼎死生一毛慷慨激烈高風凜然真可
以廉頑立懦天應足患痼疾莫能往餞回視后山之送彼翁爲有媿矣斐
然拜和未知能徹師聽否臨風淒斷

萬疊青山只麼青，從容時止又時行。斯文未喪予何畏，舉世隨流我斷清。日月精
忠今古在，丘山道義死生輕。吾翁鐵脊文翁侶，無愧淵明與孔明。

○文翁謂文天祥。

○淵明謂陶潛，孔明謂諸葛亮。一守節，一效忠。

先生心事炳丹青，顧影何曾愧獨行。○商嶺○芝能如橘隱，首陽粟不似薇清。綱
常正要身扶植，出處端爲世重輕。安得寒泉○來會宿，參同極論到天明。

○宋儒蔡元定有獨行不愧影，獨寢不愧衾之語。

○商嶺，猶商山也。四皓隱居之處。四皓爲東園

公，綺里季，高黃公，角里先生，均漢初隱士。

○寒泉謂寒泉林，在今福建建陽，朱子葬母于此，築舍

曰寒泉精舍，與弟子講學于此。

蔡正孫

正孫，字粹然，自號蒙齋野逸，謝枋得門人。

疊翁老師因行賦詩讀其辭而見其心天地鬼神昭布森列不可誣也爲之感慨激烈正孫辱在師門弟子之職敢不拜一語以激揚先生之義氣用韻斐然

山色愁予渺渺青，平生心事杜鵑行。霜饕雪虐天終定，歲晚江空水自清。肩上綱常千古重，眼前榮辱一毫輕。離明坤順文箕事，○此是先生素講明。

○離明坤順，猶言地火明夷。文謂文王，箕謂箕子，見易明夷卦。句欲疊山勿屈節也。

王濟淵

濟淵，字道可，疊山門人。

送疊山先生北行

希夷○何事出山中，心事當年漢臥龍。○行止但憑天作主，別離初不淚沾胸。定知晚菊能存節，未必寒松肯受封。○大義昭明千載事，前程儘更好從容。

○希夷，謂陳搏，搏，宋初賜號希夷先生。

○漢臥龍謂諸葛亮。

○秦始皇登泰山封松樹爲五大

夫，此喻疊山不至屈節降元。

張子惠

子惠，字叔仁，疊山門人。

送疊山先生北行

打硬修行三十年，如今證驗做儒仙。人皆屈膝甘爲下，公獨高聲罵向前。此去好憑三寸舌，再來不直一文錢。到頭畢竟全清節，留取芳名萬古傳。

王奕

奕，字伯敬，宋玉山人。官本州教授，自號玉斗山人，有東行斐稿。

送謝疊山先生北行

皇天久矣眼垂青，盼盼先生此一行。遺表不隨諸葛死，離騷長伴屈原清。兩生○
無補秦興廢，一出○仍關魯重輕。白骨青山如得所，何須兒女哭清明。西江詩話

○兩生，謂魯兩生。漢既定天下，令叔孫通定朝儀，通欲召魯諸生共定之。諸生中有兩生不肯行。

○全上。

洪咨夔

咨夔，字舜俞，宋於潛人。有平齋文集。

挽疊山先生

千古精忠日月光，恨無麟筆寫堂堂。還家恥作梁江總，○辟穀誰知韓子房。○
後死十年應有待，輕生萬里故非狂。有兒可拾江邊骨，須信人亡道不亡。疊山集附

○麟筆，猶言春秋之筆。

○江總，字總持，梁考城人。仕梁爲太子舍人，入陳爲太子詹事，與後主荒

宴，隋初，復拜上開府。

○子房，謂張良，良相漢封留侯，晚好黃老，學神仙辟穀之術，以功名終。

汪元量

元量，字大有，號水雲，宋錢唐人。以善琴事謝后王昭儀，宋亡，隨三宮留燕，後爲黃冠南歸，往來匡廬彭蠡間，世莫測其去留。詩多紀國亡北徙事，與文丞相獄中倡和作，周詳愴愴，人謂之詩史。有湖山類稿、水雲集。

遺民錄：往時讀泣血錄，爲之淚下。一日水雲出其類稿，紀其亡國之戚，去國之苦，艱關愁嘆之狀，備見于詩，微而顯，隱而彰，哀而不怨，歎歎而悲，甚于痛哭，豈泣血錄所可並也。唐之事紀于草堂，後人以詩史目之，水雲之詩，亦宋亡之詩史也。敬賦二十字，書綴卷後云：「天地事如許，英雄鬢已斑，淚添東海水，愁壓北邙山。」鶴田李珣識。

錢唐歌 一本題作送琴師毛敏仲北行

西塞山邊日落處，北關門外雨來天，南人墮淚北人笑，臣甫低頭拜杜鵑。

①元兵由北門入杭。②句用杜甫杜鵑詩意，見前注。

北師駐皋亭山

錢唐江上雨初乾，風入端門陣陣酸，萬馬亂嘶臨警蹕，三宮垂淚濕鈴鸞，童兒賸

遣追徐福，厲鬼終當滅賀蘭。若說和親能活國，嬋娟應是嫁呼韓。

○時楊駙馬送二王出奔，由浙入閩。句當指元兵追二王事。

○賀蘭謂賀蘭進明，見謝枋得詩

「南八」條注。按厲鬼本張巡語，此蓋合用也。○時元人索宮女。

文山道人事畢 一本作挽文丞相

厓山○擒得到燕山，此老從容就義難。生愧夷齊○尙周粟，死同巡遠○只唐官。
雪平絕塞人何在，月滿通衢骨未寒！一劍故知公所欠，要留青史與人看。

○厓山，在今廣東新會縣南大海中，宋末陸秀夫抱帝昀于此赴海死。文山本在五坡嶺被執，北行道經厓山。○夷齊，卽伯夷叔齊，見前文天祥詩注。○巡遠，謂張巡許遠，見前注。

浮丘道人招魂歌

有客有客浮丘翁，○一生能事今日終。嚙氈雪窖身不容，○寸心耿耿摩蒼空。睢陽○臨難氣塞充，大呼南八男兒忠。我公就義何從容，名垂竹帛生英雄。嗚呼一歌兮歌無窮，魂招不來何所從。

①浮丘道人，文山別號。

②句以蘇武爲喻，見前注。

③睢陽謂張巡，南八，謂南霽雲，並見前注。

有母有母①，死南國，天氣黯，淡殺氣黑。忍埋玉骨厓山側，蓼莪②。劬勞淚沾臆，孤兒以忠報罔極。③拔舌剖心命何惜！地結萇弘④，血成碧，九泉見母無言責。嗚呼二歌兮歌復憶，魂招不來長嘆息。

①母謂文山母曾夫人，以祥興元年九月卒，時文山屯兵海豐也。

②蓼莪，詩經篇名，孝子追念父

母之作也，有「哀哀父母，生我劬勞」之語。

③罔極，猶無極也。蓼莪有「欲報之德，昊天罔極」

言父母恩如天之無極也。

④萇弘，見前鄧剡詩注。

有弟有弟①，隔風雪，音信不通雁飛絕。獨處空廬坐繲綫，短衣凍指不能結。天生男兒硬如鐵，白刃飛空肢體裂。此時與汝成永訣，汝于何處收兄骨？嗚呼三歌兮歌聲咽，魂招不來淚流血！

①文山有弟，曰璧，曰璋，璋自船澳奉母喪趨惠州別，璧在羊城別，自是南北隔絕。

有妹有妹①，天一方，良人去後逢此殃。黃塵暗天道路長，男吟女呻不得將。汝母

已死埋炎荒，汝兄跣足行雪霜。萬里相逢淚滂滂，驚定拭淚還悲傷。嗚呼四歌兮歌欲狂，魂招不來歸故鄉。

○文山有妹，長曰懿孫，次曰淑孫。長適孫氏，不幸家沒入燕，攜子女，伶仃孤苦，客食萬里。

有妻有妻，○不得顧，饑走荒山汗如雨。一朝中道逢狼虎，不肯偷生作人婦。左掖虞姬右陵母，一劍捐生剛自許。天上地下吾與汝，夫爲忠臣妻烈女。嗚呼五歌兮歌聲苦，魂招不來在何所！

○文山夫人，姓歐陽氏。

有子有子，○衣裳單，皮肉凍死傷其寒。篷空煨燼不得安，叫怒索飯饑無餐。亂離走竄千里山，荆棘蹲坐膚不完。失身被繫淚不乾，父聞此語摧心肝。嗚呼六歌兮歌欲殘，魂招不來心鼻酸。

○文山長子，曰道生，次曰佛生，均早逝，以姪陞爲嗣。

有女有女，○清且淑，學母曉妝顏如玉。憶昔狼狽走空谷，不得還家收骨肉。關河

喪亂多殺戮，白日驅人夜燒屋。一雙白璧委溝瀆，日暮潛行向天哭。嗚呼七歌兮歌不足，魂招不來淚盈掬。

①文山有女，曰柳娘、環娘。

有詩有詩吟嘯集，①紙上飛蛇歎香汁。杜陵寶唾手親拾，②滄海月明老珠泣。天地長留國風什，鬼神呵護六丁立。我公筆勢人莫及，每一呻吟淚痕濕。嗚呼八歌兮歌轉急，魂招不來風習習。

①吟嘯集，文山詩集之一。②文山有集杜詩二百首。

有官有官位卿相，一代儒宗一敬讓。家亡國破身漂蕩，鐵漢生擒今北向。忠肝義膽不可狀，要與人間留好樣。惜哉斯文天已喪，我作哀章淚悽愴。嗚呼九歌兮歌始放，魂招不來默惆悵！

鄭思肖

思肖，字憶翁，號所南，福州連江人。太學上舍，應博學宏詞科，元兵南下，叩關上太后幼主疏，辭切直，忤當路，不報，遂客吳下，寄食城南報國寺以終。有錦錢、咸淳、中興等集。

輟耕錄：先生剛介有立志，會元兵南下，叩關上疏，犯新禁，衆爭目之，由是遂變名曰肖，曰南，義不忘趙，北面他姓也。隱居吳下，一室蕭然，坐必南向，歲時伏臘，望南野哭，再拜乃返，人莫識焉。工畫墨蘭，不安與人，邑宰求之不得，聞先生有田三十畝，因脅以賦役取，先生曰：「頭可斫，蘭不可得。」過齊子若之書塾云：「此世但除君父外，不會別受一人恩。」寒菊云：「禦寒不藉水爲命，去國自同金鑄心。」其忠肝義膽，于此可見。

遺民錄：所南初名某，宋亡，乃改名思肖，即思趙，憶翁與所南，皆寓意也。坐臥不北向，廡其堂曰本穴世界，以本之十，置下文，則大宋也。精墨蘭，自更祚後，爲蘭不畫土，根無所憑藉。或問其故，則云：「地爲人奪去，汝猶不知耶！」

墨蘭

鍾得至清氣，精神欲照人。抱香懷古意，戀國憶前身。空色微開曉，晴光淡弄春。淒

涼如怨望，今日有遺民。

寫憤四首錄一

天命尙屬漢，大夫空美新。①三宮②猶萬里，一念只孤臣。淚盡眼中血，心狂夢裏身。勿云今已矣，舉首卽蒼旻。

①新謂新莽。大夫謂揚雄也。雄諂事莽，故云。②三宮，謂全后、謝后、幼主，時已降元在燕京。

書前後臣子盟檄後

死亦烏可已，丹心闡大猷。恭承父母教，用翦國家讎。日破四洲①夜，天開六幕②秋。終當見行事，不與世同流。

①四洲，佛家語，猶言九州。②六幕，猶六合也。

語聲

語聲帶咽吐新詩，徹骨啣冤痛不知。報國心惟憂漢賊，讀書人肯學胡兒？劍攜人
手霜三尺，鏡掛當胸月一規。終究難磨天理在，匪伊談笑定時危。

詠制置李公芾①

舉家自殺盡忠臣，仰面青天哭斷雲。聽得北人歌裏唱，潭州城是鐵州城。

①李芾字叔章，宋衡州人。以蔭歷知永州、溫州，咸有聲績。德祐初知潭州，元兵圍城，芾親冒矢石，城垂陷，闔門死之，諡忠節。芾爲人剛介，臨事精強過人，好賢禮士，爲衆所歸。

詠察使姜公才①

殺氣盤空白晝陰，始終不受似精金。直疑碧落三更月，來作將軍一片心。

①姜才，宋濠州人。隸淮南兵中，以善戰名，爲通州副都統，與元兵屢戰屢勝。宋亡，元使人招之，才不聽，以疽發背不能戰，被執不屈死。

詠都統王公安節①

健兒三百陷胡塵，匹馬孤騰勇過人。至死執刀仍罵賊，自言不作兩朝臣。

①王安節，堅子，宋度宗時爲東南第七副將，駐兵江陵。元兵攻常，常城素惡，安節作柵以守，相拒兩月不下，元丞相伯顏自將攻之，屢招降不下，麾兵破南門，安節被執，不屈死。

自題大義集後

長夜漫漫發浩歌，生民塗炭果如何！中興車馬修攘在，變雅君臣廢缺多。赤幟開明新日月，青氈恢復舊山河。誓崇忠義誅姦逆，田海①雖遷志不磨。

①田海謂滄海桑田。

寅辰歲旦歌①

天運無情歲事新，大寶虛位孤王春。晝出銜恤②夜夢哭，皇皇五載臣無君。南望二王③未駐蹕，北憶三宮猶蒙塵。祆祲蝕日地軸折，冤氣上騰霾蒼雯。百姓茹苦痛徹髓，大事未定焦如焚。我寧久處遯悶中，遽忍終死爲逆民。大哉父母之遺體，與生俱生仁義身。天鍊精金鑄我心，上籀忠孝兩字文。痛憶我君我父母，眼中不識天下人。不變不變不不變，萬挫以死無二心。醉喝海嶽尙翻動，不信不滅犬羊羣。或謂逝水不可復，叱我癡忠空愁顰。焉知漢絕十八載，④光武乃興春陵兵。卽此一語斷世事，仰面再拜淚如傾。

①時爲德祐亡後之四年。②銜恤，猶言銜憂，語本詩小雅。③二王，謂益王廣王。④西漢絕于平帝元始五年，至王莽五年，光武始起兵舂陵，相隔凡十八年。

勵志

大哉天地經，森然不可踰。聖人治天下，綱常安厥居。誰謂遭大變，干戈血模糊。天地忽破碎，虎狼穴吾廬。毒氣擊萬物，草木亦焦枯。我爲國之臣，于義當捐軀。受死不爲痛，國家終何如。念此迫我心，萬劍裂肌膚。骨腐尙啣冤，且爲國家圖。鬼神果有知，聞之亦歎歎！

一礪

愈久愈不變，一忱生死俱。獨行天與語，枯坐石爲徒。血汗衣冠國，冤浮盜賊區。何當洗兵馬，終古統炎圖。

二勵二首

愁裏高歌梁父吟，猶如金玉夏商音。十年勾踐亡吳計，①七日包胥哭楚心。②秋

送新鴻哀破國，晝行饑虎嚙空林。胸中有誓深于海，肯使神州竟陸沈。

①勾踐十年生聚，十年教訓，遂報吳仇。

②申包胥，楚大夫。伍員以吳師入楚，包胥入秦乞師，依庭

牆哭七日，秦伯乃遣將定其國難。

鈞天夢冷紫宸春，①臣子含哀社稷屯。②一縷血忱開白日，兩篇③心誓哭蒼旻。

渡江祖逖④願興晉，蹈海仲連⑤羞帝秦。回首故都宮闕恨，滿山秋色正愁人。

①首句謂亡國。鈞天，謂鈞天廣樂。

②屯亦作述。易屯如遭如，難行不進貌。

③鄭所南心史有前

後臣子盟檄二篇，原注謂指此。

④祖逖，見前文天祥詩注。

⑤魯仲連，見前文天祥詩注。

八礪

黃道霾陰晝蝕光，野浮冤氣白冥茫。世無聖主天應哭，時有忠臣國不亡。萬刃攢身終莫變，一誠銘骨豈能忘。休嫌重復叨叨說，未奏膚功正斷腸。

劉 堽

堽，字起潛，宋末南豐人。博覽工詩文，有水雲村稿。

丞相信國公文公

時平輒棄置，事迫甘前驅。嗚呼忠義臣，匪直科目儒。江寒朔吹急，列城同一趨。豈不希便安，綱常乃當扶。移檄倡諸鎮，奮袂躬援桴。川決我莫回，萬險棲海隅。天乎復不濟，道窮竟成俘。一死事乃了，吾頭任模糊。悠悠譏好名，責人無已夫。三衢有魁相，○投老作尙書。

○三衢魁相，謂留夢炎，夢炎宋狀元宰相投元者。

潘音

音，字聲甫，天台人。宋季躬耕不仕，有待清軒遺藁。

悼文丞相

回首中原已陸沈，捐軀朔漠氣蕭森。恐吹餘燼成炎火，未許黃冠返故林。○社稷忽生千古色，綱常無忝百年心。總拚清骨榮荒草，不復胡沙掩素襟。

○兩句謂元如釋文山回南，必將再圖興復。按王積翁等見文山不屈，欲請釋爲道士，留夢炎不可，曰：「天祥出，復號召江南，置吾輩於何地！」事遂寢。

劉麟瑞

麟瑞，字如村，壩子，工詩，至治間，追惟宋末仗義死節之士，搜討遺事，賦五十律，題曰昭忠逸咏。

丞相信國公文公

金字牌飛出建章，○鬱孤萬壘爲勤王。驅馳嶺海君臣寓，囚繫燕雲道路長。六籍一時光日月，孤忠千古立綱常。元歸凜凜渾生氣，南北人誇姓氏香。

○句謂宋帝下詔徵天下兵勤王。

○鬱孤，山名，在今江西贛縣。

湖南安撫知潭州李公芾

平楚樓頭矢石驚，焚香稽首別宸京。盡殲妻子期全節，寧死封疆不忍生。烟燄張空隳趙壁，○旌旗倒影下湘城。善刀○人在同觀化，名與澄江一樣清。

○李芾，字叔章，宋衡州人。德祐初守潭州，元軍圍城，芾親冒矢石，城垂陷，闔門死之，諡忠節。芾爲人剛介，臨事精強過人，好賢禮士，爲衆所歸。

○潭州將陷，芾令帳下沈忠盡殺其家人，已亦引頸受

刑。③句猶玉石俱焚之意。④元兵決湟水圍城，故曰旌旗倒影。⑤善刀，莊子語，謂拭刀也。觀化，亦莊子語，言見人死，有「倚戶觀化」之句。此當是指沈忠事。

淮東制置使李公庭芝①

淮海曾聞一偉人，十年臥護息邊塵。②重來鐵騎攻城急，旋執金戈赴陣頻。夢入甌閩期立極，③路遵通泰條捐身。④平山堂⑤下悲風起，魂繞瓊花⑥萬樹春。

①李庭芝，字祥甫，宋隨人。淳祐初舉進士，後主管兩淮制置事，守揚州，破李璫兵。咸淳末元兵圍揚，遣人招降，庭芝悉誅之。既而益王遣使召庭芝，行至泰州，裨將以城降元，庭芝赴蓮池，水淺不得死，被執至揚，遇害。②句謂守揚固，能靖邊塵。③句謂奉益王召將由温州入閩以扶王室。④句謂庭芝行經泰州被執而死。⑤平山堂，在江都（即揚州）西北蜀岡上。⑥揚州有瓊花。

丞相陸公秀夫①

八面兵威八面攻，馮夷②飛血洗千篷。波翻水寨乾坤震，風仆檣旗③社稷空。百辟散班奔鷄首，④孤臣扈蹕憇龍宮。⑤茫茫南國重回首，一片丹心照海紅。

○陸秀夫，字君實，宋鹽城人。景定初進士，德祐初以禮部侍郎使軍前請和不就，益廣二王走温州。秀夫追及之，與陳宜中、張世傑等立益王於福州。時君臣播越海濱，庶事疎略，秀夫儼然正笏，如治朝，或時在行中，淒然泣下，以朝衣拭淚，衣盡浥，左右無不悲慟者。王殂，又立衛王，秀夫爲左丞相。厓山破，秀夫驅妻子先入海，負王赴海死。○馮夷，水神也。○方厓山戰時，世傑部有一舟檣旗仆，諸舟之檣旗皆仆，於是諸軍大潰。○四句謂百官奔船首也。百辟猶言百官，鷁首謂船首也。○五句謂秀夫抱帝入海死。

樞密張公世傑○

曾擁貔貅奏凱歌，厓山雲暝竟蹉跎。地空九有棲荒服，寒列千艘保海阿。○龍躍壘沈天若此，○烏鳴矴絕○事如何！鯨波沃日炎光熄，凜凜英魂尙枕戈。

○張世傑，宋范陽人。出身軍旅，元兵迫臨安，從二王入福州，拜簽書樞密院事，奉益王入海。衛王昺立，從至厓山，張宏範攻厓山，世傑以數艦遁去，後還收兵厓山，復欲求趙氏後立之，俄颶風壞舟溺死。○兩句謂國土已盡，退保海濱。○句謂帝昺繫組溺海死。○烏鳴，謂兵敗而遁也。左傳襄十八年，叔向告晉侯曰：「城上有烏，齊師其遁。」師曠告晉侯曰：「烏烏之聲樂，齊師其遁。」矴，繫

舟之物，石絕，謂厓山船失所繫而敗亡也。

江東制置使謝公枋得①

草履麻衣漫蔽形，十年賣卜②慣零丁。願從楚地師龔勝③，欲向遼城友管寧④。
采石⑤吟成期絕粒，娥碑⑥讀罷棄餘齡。一門盡節均無媿，千載西山疊疊青。

①見前。

②見前謝枋得仕履。

③見前謝枋得詩注。

④管寧見前文天祥詩注。

⑤枋得被迫

北行，既渡采石，即不食。

⑥枋得抵燕，疾甚，居憫忠寺，見壁間曹娥碑，泣曰：「小女子猶爾，我豈不

汝若哉！」遂絕食死。曹娥事見林景熙詩注。

階州守臣董公鵬飛①

相傳報怨撼階州，②虎旅飛來睨敵樓。楛矢蔽空天入暝，鵝車衝壘地生愁。金城
魚肉千年恨，闔境衣冠六日休。莫怪傳家猶強項，③雲孫④忠節更風流。

①董鵬飛，不詳。

②階州，今甘肅武都。

③漢董宣爲洛陽令，搏擊強豪，稱強項令。

④雲孫，猶言

裔孫，意謂相隔已遠如浮雲也。

丞相江公萬里知府江公萬頃①

名重天閭侍少微，昔年南國秉樞機。人歸綠野身猶健，兵滿紅塵世已非。止水亭前風淅淅，鄱陽城外草依依。棣華相映人間瑞，節惠隆名世所稀。

①江萬里，字子遠，宋都昌人。度宗朝官左丞相，以峭直爲賈似道所惡，加特進子祠。萬里於芝山鑿池，扁其亭曰止水，人莫喻其意。元兵至，赴止水死。其弟曰萬頃，知南劍州，爲元兵所殺。②少微，星名，士大夫之位也。③芝山，在鄱陽城北。④棣華，猶言兄弟。

參政高公應松①

腸斷吳山②，錦繡叢，六更聲絕海潮空。③千門鎖月移行在，八駿乘風憇會同。④扈蹕孤臣慙主辱，征鞍萬里哭途窮。兩宮緩緩趨朝陛，回首天南獨死忠。

①高應松，字質畝，宋長樂人。開慶進士，累遷翰林院權直。元兵至臨安，挾宋降，應松不肯草降表。及元兵入城，舉朝奔竄，從官留者九人，應松其一也。擢端明殿學士，簽書樞密院事，從恭帝入燕，絕粒不語，越七日卒。②吳山在杭城，俗名城隍山。③宋宮禁有六更，故曰六更聲絕。元兵抵杭，屯錢唐江沙上，人方幸波濤大作，一洗而空之，潮三日不至。④見前范成大詩注。

徐世隆

世隆，字威卿，元西華人，中統間官集賢院學士，有威卿集。

挽文丞相

大元不殺文丞相，君義臣忠兩得之。義似漢王封齒，日忠如蜀將斬顏。時精
神貫日華夷見，氣節凌霜天地知。卻恐史臣編不到，老夫和淚寫新詩。

○雍齒，漢沛人。從高祖起兵，旋畔去，已而復歸高祖，從戰有功，然終爲高祖所不快。高祖嘗恐諸將
怨望，從張良言，先封齒爲什邡侯，於是諸將皆喜，曰：「雍齒且封，吾屬無患矣。」○嚴顏，見前文

天祥詩注。

虞集

集，字伯生，號道園，元仁壽人。仕元至奎章閣侍書學士，纂修經世大典，一時大典冊，均出其手，每承顧問，必隨事盡言，以爲諷諫。有道園學古錄、道園遺稿。

哭文山丞相

徒把金戈挽落暉，①南冠無奈北風吹。②子房③本爲韓讎出，④諸葛⑤寧知漢祚移！
雲暗鼎湖龍去遠，⑥月明華表鶴歸遲。⑦不須更上新亭望，大不如前灑淚時。

①句用魯陽揮戈故事。淮南子：『魯陽公與韓構難，戰酣方暮，援戈而揮之，日爲之反三舍。』

②張良，字子房，爲韓報仇，見文天祥詩注。③諸葛亮，見前注。④句謂宋帝已亡，鼎湖本黃帝升仙之處，後人引以言帝王之崩。

⑤句謂文山之死。搜神記：『丁令威學道於靈虛山，後化鶴歸遼，集華表柱云，「有鳥有鳥丁令威，去家千年今始歸。城郭如故人民非，何不學仙冢壘壘。」』後人用爲人死之詞。按華表，墓上石柱也。

⑥新亭在今南京江上，亦名勞勞亭。東晉諸名士於新亭飲宴，周顛嘆曰：『風景不殊，舉目有山河之異！』皆相視流涕。惟王導愀然變色曰：『當共戮力王室，克復神州，何至作楚囚相對！』詩之末二句，言東晉雖偏安江左，今則山河全失，更不如矣。

復神州，何至作楚囚相對！詩之末二句，言東晉雖偏安江左，今則山河全失，更不如矣。

彭友信

友信，字以實，明攸縣人。洪武初貢生，召對稱旨，授北平布政使。有方伯集。

宋丞相文文山三月三日獄中遺墨①

崖山雲寒海舟覆，六載孤臣老幽獄。東風嘯鳩三月三，五陵望斷春蕪綠。長帆昔挂秦淮船，手持一柱擎天南。閒關嶺海血灑檄，回首家國如飛烟。六宮粉黛黃沙裏，漢火無光吹不起。全驅肯學褚淵②，生嚼舌甘爲杲卿③。死落花上巳風雨時，展卷如對麟鳳姿。再拜酌公金屈卮，有口不讀蘭亭詩。

①指南後錄上巳一首，序曰：「予自丙子上巳日，真州屏之城門外，於今憂患通六年，俯仰時節，爲之慨然。」詩云：「昔日長淮樹去帆，今從燕薊眺東南。泥沙一命九分九，風雨六年三月三。地下故人那可作，天涯游子竟何堪。便從餓死傷遲暮，面對西山已發慚。」②褚淵字彥回，南齊陽翟人。美儀容，初尙宋武帝女，明帝崩，遺詔以爲中書令。淵心識齊高帝（蕭道成）非常人，顧命之際，引帝預焉。及卽位，封南康郡公，世頗以名節譏之。③顏杲卿，見前文天祥詩注。

胡奎

奎，字虛白，明海寧人。博貫經史，尤長于詩。洪武中以儒學徵官寧王府教授，嘗過望湖亭，和東坡詩書於壁，有老人觀之曰：「六百年來無此作矣，君非斗南先生耶！」言訖忽不見，故人稱斗南先生，有斗南老人集。

悼文山

裂指西風感別離，乾坤人物太奇奇。生爲孝子忠臣勸，死有皇天后土知。萬折江流魚腹石，○千年人立首陽碑。○一門史氏春秋筆，愁把湖光入畫時。

○句以孔明喻文山。魚腹石謂八陣圖。○句以夷齊高節爲喻。

甘瑾

瑾，明餘干人，工詩。

讀文丞相傳

萬里胡天泣楚冠，○南雲歸計路漫漫。尙圖一旅○興王易，不念孤兒立國難。樓
櫓海門西日暗，劍歌江介北風寒。九原負痛遺編在，朔雪殘燈掩淚看！明詩統

○楚冠見前宇文虛中詩『南冠』條注。

○夏少康一旅之衆，可以中興。

金幼孜

幼孜，名善，以字行，明新淦人。建文進士。洪熙初官至禮部尚書，有北征錄、金文靖集。

讀文丞相傳有感

憶昨中原板蕩，○秋銜哀日夜在興周。全生不爲功名計，後死空懷社稷謀。噉噉丹心明日月，巍巍大節重山丘。北來弔古看遺錄，祇在當時淚已流。

○詩大雅有板蕩二篇，皆言厲王之無道，以喻宋世之亂，故下句興周，猶言興宋。

薛瑄

瑄，字德溫，明河津人。永樂進士，宣德中授御史，英宗復辟，拜禮部侍郎，諡文清。瑄學本於程朱，以復性爲主。有薛文清集、從政名言。

讀文山傳

氛祲冥冥。○暗海波，英雄無地用干戈。精忠在我當如此，成敗由天奈若何！渺渺蒼梧。○西日澹，蕭蕭大地北風多。睢陽錦里。○皆祠廟。丞相勛名共不磨。

○氛祲，妖凶之氣；冥冥，晦暗也。

○蒼梧，地名，在今廣西，舜崩於此。見鄧剡詩注。

○睢陽，謂張巡。

許遠雙忠廟。錦里在成都，有諸葛丞相祠。句謂文山以丞相而盡節，故云。

朔氣蕭森歲向深，揮戈拔淚動哀吟。艱危已竭回天力，慷慨猶存捧日心。海水尋常秋月冷，燕雲千里暮星沈。○悠悠往事都如夢，祇有孤忠照古今。

○五句喻宋亡於厓山，六句喻文山死於燕。

丞相英名二百年，分明往事在遺編。初離故國悲禾黍，^①再立危邦慘杜鵑。^②大勢已傾寧畏死，孤忠自許敢求全。當時桃李知何限，回首春風盡落然。

① 悲禾黍，見前岳飛詩注。

② 杜鵑見前注，句謂厓山之敗，帝昺溺海死，故言慘也。

陳獻章

獻章，字公甫，明新會人。正統舉人，從吳與弼講學，以薦授翰林檢討，乞終養歸，屢薦不起。其學以靜爲主，居白沙里，門人稱白沙先生。有白沙集。

題厓山奇石陰詩

國粹學報：白沙居近厓門，每登臨奇石，憑弔宋帝與張陸諸君殉國處，見張宏範紀功之銘，銘曰：「鎮國大將軍張宏範滅宋於此。」乃爲冠一「宋」字於上以醜之，更於石陰題詩云：

忍奪中華與外夷，乾坤回首重堪悲。鑄功奇石張宏範，**不是胡兒是漢兒！**

○張宏範，字仲疇，定興人。元初爲都元帥，督兵侵宋，執文天祥於五坡嶺，破張世傑、陸秀夫於厓山，因以亡宋。

厓山大宗祠詩

天地神祇此大忠，百年舟楫更誰同！蒼厓不是無春色，吹盡斜陽一笛中。

厓山弔陸公○祠

傷心欲寫厓山事，惟看東流去不回。草木暗隨忠魄弔，江淮長爲節臣哀。精神貫日華夷見，氣脈凌霜天地開。耿耿聖旌何處是，英靈抱帝海濤隈。

○陸公，謂陸秀夫，詳見前注。

楊一清

一清，字應寧，明雲南安寧州人。成化進士，累官至華蓋殿大學士，卒諡文襄，有石淙類稿。

謁睢陽協忠廟

一旅閒關百戰中，漁陽鼙鼓避英風。城危竟失江淮蔽，義正終收郭李功。滅賊死甘爲厲鬼，擁兵身恨失奸雄。年年明水祠宮在，不愧前朝表協忠。

①見前注。

②句謂安祿山作亂。

③郭謂郭子儀，唐華州人。玄宗時爲朔方節度使，平安史，聯回

紇，征吐蕃，以一身繫天下安危者二十年。封汾陽郡王，故亦稱郭汾陽。李謂李光弼，唐柳州人。肅宗時拜節度使，平安史之亂，與郭子儀齊名。

④句用南霽雲故事，見前謝枋得詩注。

程敏政

敏政，字克勤，明休寧人。成化丙戌進士，累官吏部侍郎，有篋墩集。

謁京口魏勝將軍廟

長風吹山磯，落日下京口。○桓桓魏將軍，廟食此邦久。土馬○賸儀衛，金書炫庭牖。忠義夙所欽，再拜酌江酒。憶當宋社南，君臣竄身走。將軍起田間，意氣最雄赳。孤城江海上，日日事攻守。中原天弗畀，竟爾隨戎醜。前旌曉不揚，雄劍夜空吼。何人始召亂，志士徒殞首。當時百戰場，荒落見沙柳。

○魏勝，字彥威，宋宿遷人。智勇善戰，金人南侵，聚義士三百取漣水，下海州，屢敗金兵。勝善用大刀，能左右射，揭旗曰：山東魏勝，金人見即退走。隆興中知楚州，時和議未決，金兵乘懈侵邊，勝拒於淮陽，中矢墜馬死。○京口，地名，在今江蘇丹徒。○土馬，廟前所塑泥馬也。

李夢陽

夢陽，字獻吉，明慶陽人。弘治癸丑進士，累官至江西提學副使，有空同集。

石將軍 ① 戰場歌

清風店 ② 南逢父老，告我已巳 ③ 年間事。店北猶存古戰場，遺鏃尙帶勤王字。憶昔蒙塵實慘怛，反覆勢如風雨至。紫荆關 ④ 頭晝吹角，殺氣軍聲滿幽朔。胡兒飲馬彰義門，⑤ 烽火夜照燕山雲。內有于尙書，⑥ 外有石將軍。石家官軍若雷電，天清野曠來酣戰。朝廷旣失紫荆關，吾民豈保清風店。牽爺負子無處逃，哭聲震天風怒號。兒女牀頭伏鼓角，野人屋上看旌旄。將軍此時挺戈出，殺敵不異草與蒿。追北歸來血洗刀，白日不動蒼天高。萬里煙塵一劍掃，父子英雄 ⑦ 古來少。單于痛哭倒馬關，⑧ 羯奴半死飛狐道。⑨ 處處懽聲噪鼓旗，家家牛酒犒王師。應追漢室嫖姚將，⑩ 還憶唐家郭子儀。⑪ 沈吟此事六十春，此地經過淚滿巾。黃雲落日古骨白，砂礫慘澹愁行人。行人來折戰場柳，下馬坐望居庸口。⑫ 卻憶千官迎駕

初，千乘萬騎下皇都。乾坤得見中興主，殺伐重開再造圖。姓名應勒雲臺^⑤上，如此戰功天下無。嗚呼戰功今已無，安得再生此輩西備胡。

①石亨，明涓南人。善騎射，正統中協守萬全路，及英宗北狩，數立奇功，所向無敵，累官鎮朔大將軍，總帥京軍團營。景帝病，亨與曹吉祥迎英宗復辟，進爵忠國公。②清風店，地名，在河北定縣北。

③己巳，爲英宗十四年。是年瓦剌入寇，帝親征，師潰被執。④紫荊關，在今河北易縣西紫荊嶺上。

⑤彰義門，不詳，或指燕都城門言。⑥于謙，字廷益，明錢唐人。永樂進士，宣宗朝歷官中外，頗有

政績。英宗土木之變，京師震驚，羣議南渡，謙議立景帝，定策固守，以社稷安危爲己任，官至兵部尙書，後英宗復辟，被殺。萬歷時諡忠肅。⑦亨從子彪，驍勇善戰，英宗北狩，彪從亨數戰，有奇功，爲大

同參將。⑧倒馬關，在今河北唐縣西北，以山路險滑，馬爲之倒，而名。⑨飛狐道，謂飛狐關，在今

河北涑源縣北。⑩嫖姚將，謂霍去病，去病，漢平陽人。武帝時，爲嫖姚校尉，伐匈奴有功，先後凡六

出，渡沙漠，封狼居胥山而還，拜嫖姚將軍。帝嘗爲治第，去病曰：「匈奴未滅，何以爲家！」帝益重之。

⑪見前注。⑫居庸，關名，在今昌平縣西北，最險峻。⑬雲臺，漢宮臺名，永平中顯宗追感前世，

乃圖畫二十八將於上。

邊 貢

貢，字廷實，明歷城人。弘治進士，累官戶部尚書，有華泉集。

謁文山祠

丞相英霧迴未消，絳帷燈火颯寒飈。黃冠①日月胡雲斷，碧血山河龍馭②遙。花
外子規③燕市月，水邊精衛④浙江潮。祠堂亦有西湖樹，不遺南枝向北朝。

①黃冠見前注。

②天子崩曰龍馭上賓，見前鼎湖注。

③子規、精衛，並見前注。

④精衛，鳥名，詳

見前注。

黃相

相，字弼甫，明莆田人。弘治丙辰進士，官九江知府，有一溪集。

謁岳武穆廟①

古廟沈沈掩夕曛，西連孤壠結愁雲。金牌②卒墮和戎計，鐵騎空回少保③軍。萬里鑾輿終北狩，④百年基業遂中分。乾坤遺恨依然在，散作秋濤不忍聞。

①岳飛，字鵬舉，宋湯陰人。家貧力學，事母孝。宣和中以敢戰士應募，紹興中平江淮，歷授少保，河南

北路招討使。既敗兀朮，欲北向規復，爲秦檜所阻，繫獄死。孝宗時諡武穆。②飛既敗兀朮於郾城，

遂進兵朱仙鎮，欲指日渡河，時秦檜力主和議，欲盡棄淮北地以與金，一日降十二金牌召飛還。

③少保謂飛。④謂徽欽二帝北狩。

周用

用，字行之，明吳江人。弘治進士，官至吏部尙書，太子少保，卒諡恭肅，有恭肅集。

厓山二首

岡州○行殿火飄紅，井澳○樓船苦北風。猶謂夏康○能復國，可憐劉禪○已封公。漫山春草珠襦冷，卷地胡塵玉帳空。千古亂階○誰復問，直尋國史到元豐。○

○岡州卽礪縣，在廣東海中，宋端宗卒於此，陸秀夫等復立帝昺，升州爲翔龍縣。○井澳，在今廣

東香山縣南海中橫琴山下。元將劉深攻帝於淺灣，世傑戰不利，奉帝避井澳，颶風大作，舟敗幾溺，帝驚悸成疾。○夏康謂夏少康。見前甘瑾詩注。○劉禪，蜀後主，魏遣鄧艾鍾會伐之，從譙周策

詣降，封安樂公。此喻宋主降元，封瀛國公。○亂階，禍亂之階梯也。○元豐，宋神宗年號，其時王

安石行新法，弊害百出，國力中衰。句似謂宋之亡國，當歸咎於元豐新政，以其爲禍亂之階也。

宣和○容易誤亡遼，卻向天南寄九朝。○忍見黃衣○淪碧海，猶聞白屋○怨青

苗。玉魚^⑤墮地迷秋草，鐵馬橫沙落暮潮。帝業艱難餘涕淚，黃埃無處望陳橋。^⑥

①宣和間，遼勢衰，金漸強盛，遂滅遼。

②宋南渡傳高孝、光、寧、理、度、恭七朝，德祐降後，羣臣復立端

宗及帝昀，共計九朝。

③匡山敗時，陸秀夫負帝入海死，羣臣從死甚衆，越數日，尸浮海上者數萬，

元卒有求物尸間者，遇一尸，小而衣黃衣，負詔書之寶，當爲帝昀也。

④白屋，謂平民也。青苗，王安

石新法之一，謂官預出錢以貸民，納時加息二分，正月散而夏斂，五月散而秋斂，號青苗錢，安石用

非其人，爲害閭閻。

⑤玉魚，帝王殉葬物。

⑥陳橋，驛名，在開封北，宋太祖行軍過此，諸將以黃袍

加之，奉爲帝。

顧鼎臣

鼎臣，字九和，明崑山人。弘治進士，累官禮部尙書。有顧文康公詩草、未齋集。

讀文文山傳用少陵韻

峯崒文山幾萬尋，燕山千古共蕭森。綱常允賴中流柱，賦咏空傳大雅音。無忝掄魁登宰輔，時于白日見丹心。堂堂信史英風在，午夜虛齋一振襟。

文徵明

徵明，初名璧，以字行，別號衡山，明長洲人。幼不慧，稍長穎異挺發，爲人和而介。正德中以歲貢生詣都，授翰林院待詔。詩文書畫皆工，而畫尤勝。有莆田集。

詠文信國事四首

地轉天旋事不同，老臣臨市自從容。誓將西嶺填東海，忍著南冠向北風。千里勤王空赴義，百年養士獨收功。人間別有成仁樂，未用區區悼此公。

○南冠，見前「楚囚」條注。

倉卒勤王萬里身，風塵顛倒作纍臣。○三綱已去嗟何補，一死臨期認自真。直以安危繫天下，未宜成敗論斯人。遺文尙可誅奸賊，何但悲辛泣鬼神！

○纍臣，拘囚之臣。

國勢已離天命去，孤臣狼狽阻殘兵。分當如此餘非計，事訖無成死有名。平日公

卿咸肉食，千年忠義屬書生。狂胡盜竊曾無既，惜不令公見肅清。①

①末句謂明復中原，惜公未見。

南北間關百戰餘，此身宗社①許馳驅。可憐功業孤魂在，自決存亡大義俱。夷狄至愚猶歎服，②皇天無意欲何如！平生心事堪誰訴，漫託他年半紙書。

①宗社謂宗廟社稷。

②句謂信國孤忠，入燕不屈，每爲元人所歎服。

朱魯

仕履不詳。

文丞相忠孝外傳詩

天驕○敢笑帝山河，慣見中原主議和。選將爲聞丞相疏，磨刀欲試浙江波。南風不競○塵難掃，北道乘機凱欲歌。忠佞同朝誰辨得，華夷氣數竟如何！

○天驕，謂匈奴，此喻元蒙古人。

○南風不競，猶言南宋勢衰。左傳襄十八年，師曠曰：「吾又歌南

風，南風不競，多死聲，楚必無功。」

十年胡騎戰中華，破碎山河落日斜。未許行成留越使，○相將問鼎到周家。○茫茫國運天難問，鬱鬱忠腸事可嗟。淚灑英雄渾是血，憑風血染杜鵑花。

○句謂伯顏不許宋和，文山被留。○句謂欲滅宋，用楚子問周鼎故事。

陳嘉謨

嘉謨，字世顯，明廬陵人。嘉靖進士，官給事中，有念初堂集。

東昌父老嘗語余信國公生於永和石窟余自香林訪其地有文姓者公遠孫也石窟之南東有章水環之水外五鳳山高出漢表莫與並秀者

廬陵有砥柱，○可以障百川。降神在何許，乃在五鳳前。峨峨五鳳山，秀色橫天南。正氣川嶽合，孤光日月懸。成仁與取義，至今頑天廉。杖藜訪遺趾，野屋棲寒烟。拜公幾代孫，力耕十畝田。大賢固有後，所貴淳風全。我老與世辭，荷鋤理荒阡。愧公之閭里，三謝爲濟然。公靈耀箕尾，○千載當來旋。

○砥柱，卽中流砥柱，以喻人之獨立不撓者。○耀箕尾，猶言騎箕尾，傳說故事，謂死後精神跨於

箕尾之間也。箕尾，二星名。

許炯

炯，字彥韜，明新會人。嘉靖辛卯舉人，有吾野漫筆十三卷。

厓山大忠祠

古祠牢落對行宮，朝市荒涼夕照中。玉璽○久歸滄海去，銅駝○空見碧苔封。已無杯土藏遺劍，○猶有餘民泣墮弓。○一曲雍門○歌不盡，滿山松柏起悲風。

○玉璽，天子之印。句謂帝昺負詔書之寶溺海死。○銅駝，見前注。○句謂無地可葬帝皇也。坏

土用「長陵坏土」事。○句謂遺民念宋帝也，黃帝得道，騎龍上天，羣臣攀龍髯，斷，墮烏號之弓。

○雍門，古之善琴者，嘗于孟嘗君，鼓琴而歌，孟嘗涕淚增哀，下而就曰：「先生之鼓琴，能令文若破國亡邑之人。」

螺川望文丞相墳

六歌○聲斷市朝空，紫蓋黃旂散朔風。厓海○有心同捧日，燕臺無路可從龍。蒼

|梧^①處處愁雲黑，杜宇年年怨血紅。江上孤墳勞望眼，古碑芳草夕陽中！

①文山有六歌，見前詩。

②厓海，謂厓山；燕臺，謂燕京，並見前注。

③蒼梧，杜宇，並見前注。

梁有譽

有譽，字公實，明廣州順德人。嘉靖庚戌進士，授刑部主事，有蘭汀存稿。

厓門弔古

誰悟當年讖已真，^①泚^②杭回首總成塵。憤無勾踐^③三千士，死恨田橫^④五百人。海上乾坤春夢短，厓前風雨客愁新。貞魂若作嘯鵑去，葛嶺^⑤山頭哭萬巡。

①宋初，太祖召陳圖南問天下終始事，對曰：「一泚，二杭，三閩，四廣。」再問，則曰：「非臣所知也。」

②泚，今開封，爲北宋都城。

③勾踐，春秋時越王，父允常爲吳王所敗，勾踐敗吳雪恥，吳王夫差

復報越，困勾踐於會稽，勾踐請和，用范蠡文種十年生聚十年教訓之策，因以滅吳，橫行江淮，名震中國。④田橫，秦時齊人，韓信旣破齊，橫遂自立，漢滅項羽，橫與其徒屬五百人入海，高祖使人招之，橫與二客詣洛陽，未至三十里，曰：「始與漢南面，今奈何北面事之！」遂自殺，二客亦自殺，餘五百人在海中聞橫之死，亦皆自殺。⑤宋賈似道賜第葛嶺。

吳國倫

國倫，字明卿，明興國人。嘉靖進士，官至河南參政，有甌瓊洞稿。

礪州弔古

一旅南巡瘴海邊，孤舟叢檝繫樓船。○從容卷土天難定，急難蒙塵地屢遷。丹鳳未傳行在所，黃龍○靈兆改元年。當時血戰潮痕在，常使英雄涕泫然！

○二句謂南宋之末，二王播越海濱。

○丹鳳樓以喻京師，句謂不知京師所在。

○帝昺立，有黃

龍自海中見。

吳 日

旦，字而待，明南海人。嘉靖舉人，官歸州知州，有蘭皋集。

厓門弔古

羌管胡琴一曲歌，南人漸少北人多。空聞杞女齊城哭，不見昭王漢水過。寶冊有靈浮海島，珠襦無主寄烟蘿。千秋留得孤忠在，成敗休論奈爾何。

①杞梁妻，齊杞殖妻也。殖戰死，妻無子，內外無親，乃就夫屍於城下哭之，內誠動人，道路過者，莫不揮涕，十日而城爲之崩。

②周昭王，名瑕，時王道微缺，王南巡，反濟漢，漢濱人以膠舟進，中流膠溶，船解，王及祭公皆溺焉。

③帝昺負詔書之寶投海死，後爲元兵所得。

④句謂紹興六陵被發。

誤國由來一字閒，上方無劍討神姦。①虞淵日入誰能取，滄海龍游遂不還。②後夜蜀禽猶迸血，③秋來湘竹總成斑。④丹青俎豆休明事，一簇崇祠幾仞山。

①上方謂上方劍，見前注。神姦，謂巧於作姦者。

②虞淵，日至於虞淵，謂之黃昏。二句謂宋帝溺海

死。③句猶杜鵑啼血。

④湘竹，卽湘妃竹。相傳舜崩蒼梧，二妃追至，哭帝極哀，淚染於竹，故斑斑

如淚痕。

鄭國賓

國賓，字汝嘉，明蘭谿人。嘉靖進士，有臥雲堂集。

關西老將歌

少年騎馬疾如飛，長弓勁箭突重圍。萬乘曾推雙轂送，五侯揖讓平交歸。瀚海黃沙連朔漠，天山月白聞邊柝。一身轉戰三千里，陰風颯颯陣雲惡。奮臂前驅斷月支，橫行又奪胡馬騎。雕戈白日明秋漢，大漠霜高響鐵蹄。塞下人傳老都護，軍前共說長城固。豈知歲月漸蹉跎，老大逢人不相顧。射虎將軍竟不侯，牧羝歸來空白頭。○聞說燉煌○徵猛士，關西老將淚先流。

○射虎將軍謂李廣，廣數奇，未能封侯。○句謂蘇武牧羊海上十九年，歸漢後，位不過典屬國，功

大賞小，故云空白頭。

○燉煌，地名，在今甘肅。

黃謙

謙，字亨大，明莆田人。嘉靖進士，有萬玉山藏稿。

惶恐灘 宋文信國被俘過此

雙淚秦庭○事忍言，南天不弔北來魂。灘聲似解孤臣意，日日奔流到海門。

○秦庭用申包胥哭秦庭事，見前注。

歸有光

有光，字熙甫，明崑山人。嘉靖進士官至太僕寺丞，有震川先生集。

題周冕贈任別駕卷

明詩紀事：按此紀蘇州同知任環破倭事也。史稱倭患起，長吏不嫻兵革，環性慷慨，獨以身任之，卽第一詩。惟有使君躬擐甲，劉家港口看潮生也。朱竹垞云：任公軀瘦瘠，倭人目曰瘦官人，望而避之，卽第二詩。忽駕迴潮趨海道，傳呼盡避瘦官人是也。

江南列郡盡乘城，藏穴何人肯出兵。惟有使君躬擐甲，劉家港口看潮生。
東倉白晝靜城闐，煙火連天豺虎隕。忽駕迴潮趨海道，傳呼盡避瘦官人。

海上紀事詩

明詩紀事：熙甫有海上紀事詩云云。史稱倭犯太倉，環馳赴之，短兵接，身被三創，幾殆，宰夫捍環出，死之，卽義士劉平代死事也。

任公血戰一生餘，蓮碧花嬌村塢虛。義士劉平能代死，吳門○今不數專諸。○

○吳門卽蘇州。

○專諸春秋時刺客，吳公子光謀殺王僚，伏甲窟室以享王，專諸置匕首魚腹中

刺之，王僚立死，諸亦爲王左右所殺。

頌任公詩

輕裝白袷日提兵，萬死甯能顧一生！童子皆知任別駕，巍然海上作金城。

沈明臣

明臣，字嘉則，明鄞人。有豐對樓集。

凱歌

甬上耆舊集：胡宗憲行部七閩，燕將士爛柯山上，酒酣，請嘉則爲凱歌十章，其一云云。

銜枚夜度五千兵，密領軍符號令明。狹巷短兵相接處，殺人如草不聞聲。

戚繼光

繼光，字元敬，明登州衛人。善練兵，紀律極嚴，以臨陣，回顧輒斬其長子。嘉靖中以浙兵平東南倭寇，稱戚家軍。後鎮薊門，專主守禦，邊境晏然。由總兵累官太子太保，有止堂集、紀效新書。

登盤山絕頂

柳亭詩話：戚南塘武功將略，垂諸史冊，而偶爲吟咏，亦超放自如，有鄭都官（谷）羅江東（隱）筆致，鎮薊、遼日，登盤山絕頂詩云云。

霜角一聲草木哀，雲頭對起石門開。朔風村酒不成醉，落葉歸鴉無數來。都使雕戈銷殺氣，未妨白髮老邊才。勒名峯上吾誰與，故李將軍○舞劍臺。

○柳亭詩話原注：故李將軍者，指唐李藥師也。

陳 第

第，字季立，明連江人。初爲諸生，後上書邊帥入軍，擢至游擊將軍，有薊門塞曲、兩粵游草。

送戚都護[○]歸田詩

轅門遺愛滿幽燕，不見胡塵十六年。誰把旌麾移嶺表，黃童白叟哭天邊。

[○]謂戚繼光，陳曾隸戚部下。

周詩

詩，字以言，明崑山人。有靈岩山人集。

謁岳鄂王墓

將軍埋骨處，過客式英風。北伐生前烈，南枝死後忠。○山河戎馬異，涕淚古今同。悽斷封丘草，蒼蒼落照中。

○句謂精忠柏，舊在杭獄署內，清末移置岳墳，今見存。

黃鳳翔

鳳翔，字鳴周，明晉江人。隆慶初及第，官至南禮部尚書，有田亭草。

謁于少保祠

白登^①圍不解，六飛^②去不返。社稷幸有君，臣節惟蹇蹇。^③九鼎奠如山，邊塵淨若捲。漢皇有神靈，浩然乾樞轉。安得延陵讓，^④用竟呂甥^⑤。款南宮蟄龍奮，^⑥自恨一死晚。蒼穹驟黜黜，旁觀爲涕洟！嗣皇^⑦賜昭雪，廟貌寄崇巘。臣忠主亦聖，遺風百世遠。

①于少保，謂于謙也。詳見前李夢陽詩注。

②白登，山名，在山西大同縣。匈奴嘗圍漢高帝於此，七

日乃解。此以喻英宗土木之變，兵敗被虜。

③六飛，謂帝王，見前注。

④蹇蹇，忠貞貌。

⑤句謂英

宗代宗不能如延陵季子之讓位也。公羊傳：謁也，餘祭也，夷昧也，與季子同母者四。季子弱而才，兄

弟皆愛之，同欲立之以爲君。弟兄迭爲君，而致國乎季子。季子使而亡焉。僚立，闔廬使專諸刺僚，而

致國乎季子。季子不受，去之延陵，終身不入吳國。呂甥，見前謝枋得詩注。句謂英宗復辟，

于謙被殺。弘治時念謙有功社稷，謚肅愍，萬歷時改謚忠肅。

李之世

之世，字長慶，明新會人。萬歷舉人，官池州推官，有南歸稿、雪航草等集。

厓山弔古

汴杭回首卽荒濱，三徙逢厓○事竟真。天地有靈應一涕，風波垂死泣孤臣！何來赤手堪扶國，卽去黃冠○亦誤身。還是中華千古地，長風吹雨洗腥塵。

○三徙逢厓，卽陳圖南所謂一汴，二杭，三閩，四廣。謂三徙到廣東厓山也。○黃冠謂文山，見前潘音詩注。

方孔炤

孔炤，字潛夫，明桐城人。萬歷進士，崇禎初以右副都御史巡撫湖廣，北京陷，歸隱十餘年卒。有中丞集。

井中鐵崇禎末吳門浚井得鄭所南書①

連江②鐵函書似漆，吳門浚井一日出。沈埋一十三萬日，羣鬼嘶叫風雨溢。男兒之血本不死，蛟龍盤護千年紙。觿栗③場中羽變徵，咸淳④淚激三江底。淚無端，江且乾，防江不難防心難，丸泥難塞圓通關，天使井水澆人間。至今首陽麓，不生周草木，此語歌之古今哭。

①所南見前，書謂鐵函心史。

②連江，地名，在今福建。所南，連江透鄉人。

③觿，吹器，狀類胡笳，

軍中吹之以爲號也。

④咸淳，宋慶宗年號。

袁崇煥

崇煥，字元素，明東莞人。萬歷進士，慷慨負膽略，好談兵，以邊才自許。歷官兵部主事，監關外軍，內撫軍民，外飭邊備，勞績大著。清兵攻寧遠，崇煥激士死守，卒以解圍。崇禎初，以兵部尙書，督師遼薊，會清兵越薊州而西，崇煥急引兵入護京師，朝士誣其引敵脅和，下詔獄，磔於市，天下冤之。自崇煥死，邊事益無人，明卒以亡。

南還別陳翼所總戎

慷慨同仇，日，間關百戰時。功高明主眷，心苦後人知。麋鹿還山便，麒麟繪閣宜。去留都莫訝，秋草正離離。

○同仇，謂同其仇敵也。○三句似因魏闈中梗，罷遼東巡撫時所作。

鄭 琰

琰，字翰卿，明閩人，有二陝詩稿。

汪懋忠七十從軍之燕

千金紫馬百金裝，白首窮邊烈士腸。一雁正來君又去，二毛①雖短劍還長。燕臺馬死崩寒日，②易水魂歸哭夕陽。③筋力尙堪三日戰，牙旗秋捲塞雲黃。

①二毛，謂老人髮斑白有二色也。

②句用燕王購駿骨事。

③句用荆軻刺秦王歌易水事。

孫承宗

承宗，字稚繩，明高陽人。萬歷進士，沈毅有智略，尤曉暢邊事，累官兵部尚書，後督師遼薊，修復城堡，練兵屯田，邊防頗固，闖黨讒之，乞歸。清兵攻高陽，承宗率家人拒守，城破，投繯死。有高陽集。

謁太常楊椒山○祠

楊公負奇穎，舞象○成奇調。孝友自天植，義烈爲譚笑。兩疏○志竟酬，一泓血未耗。代隔名逾尊，祚薄神復耀。我來採芳芷，灑血一憑弔。

○楊繼盛，字仲芳，號椒山，明容城人。嘉靖進士，歷兵部侍郎，俺答人寇，仇鸞欲開馬市議和，繼盛極陳其不可，貶狄道典史。已而俺答敗約，鸞誅，帝思其言，遷刑部郎。時嚴嵩用事，恨鸞陵己，心善繼盛，欲驟貴之，改兵部武選司。而繼盛惡嵩甚于鸞，劾其十大罪，嵩構之下獄，杖之百，創甚，坐繫三載，竟棄西市。臨刑賦詩，天下傳誦。○舞象，象武舞也。禮，十五成童舞象。句謂童時有異稟。○兩疏，當指論馬市及劾嚴嵩二疏。

朱繼祚

繼祚，字立望，明莆田人。萬歷進士，歷官禮部，入東閣。後舉兵應魯王，守興化，城破死之。

絕命詞

嗟予生兮不辰，逢慘禍兮攖身。乾坤崩隕兮，陸海爲塵。日星掩曜兮，萬象沈淪。人孰無死兮，鴻毛秦嶽。①惟其所處兮，殤延彭促。②旦夕畢命兮，去將安之！夫妻子母兮，不得相依。上告蒼天兮，鑒此微詞。雖爲螿粉兮，甘之如飴。千秋萬古兮，誰其予知！與化③俱徂兮，於戲噫嘻？

①句謂死有重於泰山，或有輕於鴻毛。②殤子短折，彭祖高壽。句謂死如得所，殤子可謂延年，不

然雖彭壽亦短促耳。③化，猶陶潛歸去來辭乘化之化。

孫士美

士美，字公粲，明松江華亭人。天啓辛酉舉人，知深州事。崇禎戊寅十一月州城被圍，力盡死於官，一門殉難者十有三人。

守城作

鐵騎繞孤城，烽烟勢未平。君親本至性，南北總關情。地下難熏鼠，○原頭絕救兵。

一作此日魚書急，何時鶴唳清。寄言青史筆，莫載罪臣名。

○句用張巡守睢陽食盡掘鼠事。

袁繼咸

繼咸字臨侯，（一作字季通）明宜春人。天啓進士，累官兵部侍郎，總督九江軍務，以忠義結左良玉心。及夢庚降，繼咸爲清兵所執，不屈死。有六柳堂遺集。

靜志居詩話：袁侍郎軍中自銘曰：「死事也易，成事也難。爲嬰勿克，爲白維艱。張死匪先，許死匪後。臣心匪他，靖獻我后。嗚呼！父母有過則諫，諫而不從，則號泣旻天，撻之不怨。晉陽之甲，豈可訓哉。」既被獲，抵大勝關，清將傳語，袁總督著隨行，與以大官做，又自銘曰：「大官好做，大節難移。成仁取義，前訓是師。文山袁山，仰止庶幾。」袁山，侍郎自號也。

讀謝皋羽西臺慟哭記①

南方有朱鳥，②飛中虞人弦。飼以金精粒，對之不下咽。粒味豈不旨，不如南土泉。黃冠③志弗遂，碧血流濺濺。有客感意氣，慟哭西臺巔。擊碎鐵如意，悲響震嚴川。④歸舟不成寐，髣髴語燈前。嗟彼積翁⑤羅，我非雀與鳶。夢炎何足刺，知己殊未然。周粟不可茹，箕疇⑥曾未傳。生死良非苟，忠孝各自全。謝子幽明契，聊以祕懷

官言罷條不見月明高在天。

①謝翱，字臯羽，見前謝翱仕履。翱晚登子陵西臺，以竹如意擊石，弔文信國，有登西臺慟哭記。②

朱鳥，南方之宿，以喻文信國。虞人，掌山澤之官。數句謂文山被執。③黃冠見前注。二句謂積翁爲

請釋爲黃冠不遂，卒不屈被殺。④巖川謂嚴陵之川，卽桐江也。⑤積翁謂王積翁，夢炎謂留夢

炎，俱見前注。⑥箕疇，謂周武克殷，箕子朝周，陳洪範九疇。

雪日

雪片大如掌，忍饑不可齧。愧無子卿①，氈敢墜漢臣節。鑽牖瞰扶桑，晨曦未全滅。

花發領南枝，羅浮②夢空結。

①子卿謂蘇武，見前注。②羅浮，山名，在廣東，詳前注。

左懋第

懋第，字仲及，（一云字蘿石）明萊陽人。崇禎進士，官至兵部侍郎。清兵破李自成，懋第使清議和，被留南京破死之。有梅花詩草。

靜志居詩話：左公將北行，遺書姜給事琛，大略謂國遭大故，二東未聞有斷頭穴胸以報故君者，彼鄒魯仁義之稱安在？懋第北行，是懋第死日也。既入燕，卒以閏月十九日死于市。

客燕

鼎髯○攀無及，親闈并莫依。豈堪哀子淚，時落客臣衣。陵樹夢猶見，家山魂亦稀。人間忠孝事，意與鶴同歸。

○鼎髯，卽鼎湖龍髯，黃帝事，詳見前注。

臨刑絕命詞

三岡識略：左公懋第，奉使議和，不屈死，臨刑詩云云。被難時，忽風沙四起，捲市柵於雲際，一時爲之

罷市。

漠漠黃沙少雁過，片雲南下意如何！丹衷碧血消難盡，蕩作寒烟總不磨。

祁彪佳

彪佳，字幼文，明山陰人。天啓進士，官至御史。南都失守，自投池中死。

臨難題案

圖功爲其難，潔身爲其易。吾爲其易者，聊存潔身志。含笑入九泉，浩氣留天地！

吳應箕

應箕，字次尾，明貴池人。崇禎副榜，唐王立授池州推官，監紀軍事，兵敗被執，不屈死。有樓山堂集。

朱竹垞云：「先生羅九經二十一史於胸中，洞悉古今興亡順逆之迹。當崇禎中，預慮燕都之必不能守，聞者皆笑其迂。而先生持論侃侃，不阿也。名雖不登朝籍，而人材之邪正，國事之得失瞭如指掌。分宜張爾公稱先生人文似陳同甫，是誠知言。聞先生授命處，血迹至今猶存，洗之不去。袁弘祖紹而後，不多得也。」

閒看

閒看處堂①喜，真稱舉國狂。人猶殺李范②，運不及齊梁③。寂寞臨春閣④，悲涼石子岡⑤。只餘諸葛恨⑥，頸血濺淮揚。史公道鄰

①處堂謂燕雀處堂，喻安居而忘禍也。

②李范謂李膺范滂，喻明南都株殺黨人（時殺周仲馭，

及雷介公）。

③齊梁句，謂國祚促短，尙不及齊梁。

④臨春閣，陳後主造，在南京，以喻福王好興

土木，轉瞬國亡。

⑤石子岡，在今南京，諸葛恪死處。

⑥末二句謂史可法之死揚州。

黃道周

道周，字幼玄，一字螭若，明漳州人。天啓進士，授編修。福王時，官禮部尙書，唐王時，改吏部尙書，督師被執，死於市，有漳浦集。

過新嶺①

自清錄：黃道周過新嶺賦絕句云云。自注云：新嶺上弔金正希，死時有江天一諸賢從之，足爲吐氣。殘棋唾手已難工，又是論人成敗中。但說丹心何所用，一時張眼念臧洪。②

①此弔正希詩，正希，金聲字，休寧人。福王時以兵部侍郎督師，清兵下江南，被執不屈死。②臧洪，字子源，漢射陽人。中平末，太守張超請爲功曹，時董卓圖危社稷，洪說超誅卓爲天下倡，超然其言。後袁紹以洪領青州刺史，任事二年，紹憚其能，徙爲東郡太守。曹操圍張超於雍丘，甚急，洪徒跣號泣，從紹請兵，紹不許，超遂族滅，洪由是怨紹，絕不與通。紹興兵圍洪，城陷被執，死之。

金 鉉

鉉，字伯玉，明武進人。崇禎戊辰進士，選揚州府學教授，入爲國子監博士，升工部主事，尋改兵部，甲申殉國難。

拜文信國祠下

復垢○自天運，臣道無終窮。殉節士所恆，寧足矜子功？偉哉一文士，毅然任卽戎。棘行若履坦，所在吟淒風。一息苟可奮，安忍卽瘖聾。九死固所甘，但惜炎運終。○堪嗟生祭者，○不足語微衷。

○復垢，卦名。謂地雷復，天風垢。一則一陽初生，一則一陰初生。喻互爲消長也。○炎運終，謂宋亡也。○宋末王炎午，有生祭文丞相文。

賀王盛

盛，字周兼，號無黨，明丹陽人。崇禎進士，官兵部主事。永歷帝以少司馬召，事發死難。

絕命詞

曲阿詩綜：無黨運際鼎革，雄才大略，概不得施。其詩多激昂感慨，純作繞梁之音，而風骨稜峭，有古遺直風。唐人中蓋得孟東野之潔者，自題絕命詞云云。時同殉者凡十人。

悲歌慷慨說天祥，情氣凌虛返帝鄉。從此十人離紫禁，相隨地下拜高昌。⊖

⊖高昌，不詳。

徐 洵

洵，字九一，明長洲人。崇禎進士，官至侍讀學士。及清兵克蘇州，薙髮令下，投水死。

三月十九日①

珍饌精醪賜講筵，每逢令節主恩偏。十章書未陳金鑑②，九逝魂猶戀細旃。社稷風雲誰奏曲，園陵霜露已經年。龍髯回憶橋山遠③，玉匣珠襦④不忍傳。

①崇禎十七年，三月十九日，李自成陷北京，崇禎帝自縊於煤山。②句用張曲江陳千秋金鑑錄

以諷明皇事。③句用黃帝故事，詳見前注。④玉匣珠襦，古帝后之殮。

張錫眉

錫眉，字介茲，號次崖，明上海人，嘉定籍。舉崇禎庚午鄉試，遂家於膠。乙酉秋城破，嚙指書絕命詞自縊，妾何氏抱幼女赴水以殉國。

絕命詞

託命不辰，僑居茲里。倚絕宗親，路隔同氣。○與城存亡，死亦爲義。舉家殉之，惜非其地。後之君子，不我遐棄。

○同氣，謂兄弟也。

陳良謨

良謨，初名天工，字賓日，明鄞縣人。崇禎辛未進士，授大理府推官，擢四川道御史，巡按四川，十六年還臺，京師陷，賦絕命詩自縊。

絕命詩

中天懸日月，四海所畢照。倏爾陰霧昏，日月失常道。仰觀我明明，薄蝕一時變。書此，忽颺風襲牖，曰：「異哉此風。」隨續云。電風自南來，光復天心見。大夫百執事，其誰忘明君；愧予沉疴久，牀第○淹數旬。背城孰盡瘁，巷戰杳無聲。如何社稷靈，憊爾順民形！載舟亦覆舟，古今同一轍。順民卽逆民，參觀非一日。蒼蒼不可問，亡國我何存。誓守不二心，一死報君恩。

○牀第，謂牀席也。

陳函輝

函輝，初名煒，字木椒，改名後字木叔，又號寒山，明臨海人。崇禎進士，除靖江令，福王立，起兵部主事，魯王監國，進兵部侍郎，兼侍讀學士，江上師潰，入天台雲峯寺自縊死。有寒光集。

臨終別親友

廉泉同義魄，萬古在禪林。故國千行淚，孤臣一寸心。深山空有恨，異日或相尋。身後遙爲託，應懷鍾子琴。①

①鍾子期，春秋楚人。伯牙鼓琴，志在高山流水，子期聽而知之。子期死，伯牙鼓琴絕絃，謂世無知音者。

生死真無補，重扶賴有君。先生留正義，後起訂遺文。落日空山哭，驅車去路分。此心如見許，孤劍在孤墳。①

①季札初使，過徐，徐君好季札劍，口弗敢言，季札心知之，爲使上國未獻。比返，徐君已死，乃解劍繫徐君冢樹而去。

絕命詞十錄五

生爲大明之人，死作大明之鬼。笑指白雲深處，蕭然一無所累。父母恩無可報，妻兒面不能親。落日樵夫湖上，應憐故國孤臣。

慧業○降生文人，此去不留一字。惟將子孝臣忠，貽與人間同志。

○慧業，佛家語，謂智慧之業用也。

臣年五十有七，回首萬事已畢。徒慙赤手擎天，惟見白虹貫日。○

○荆軻慕燕丹之義，白虹貫日。注：「精誠所感，白虹爲之貫日。」

手著遺文千冊，尙存副在名山。正學○焚書並出，所南心史○難刪。

○正學謂方孝孺，字希直，明寧海人。建文時，爲侍講學士，燕王入南京，令草詔，不從，被殺。孝孺自名其室曰正學，世稱正學先生，死後，禁其書。○鄭所南有心史，見前注。

范景文

景文，字夢章，明吳橋人。萬歷進士，崇禎初，拜兵部尚書兼東閣大學士，入參機務，京城陷，投井死。有文忠集。

甲申殉難詩

明詩紀事：公有詩云，蓋不知帝已殉國，猶冀蒙塵南巡也。

孤臣空洒淚，天步①遂如斯。妖蝕三光②暗，心盟九廟③知。翠華迷草路，淮水漲烟澌。故國千年恨，忠魂繞玉墀。

①天步，猶今言國運。②三光，日月星也。③九廟，天子起九廟。

許直

直，字若魯，明如皋人。崇禎進士，官吏部員外郎，都城陷，自經死。

絕命詞

明詩紀事：都城陷，公北向拜君，南向拜父，秉燭作絕命詞畢，自經死。

擲筆翻然辭世行，老親幼子隔幽明。丹心未雪生前恨，青簡空留死後名。

陳潛夫

潛夫，字彥倩，明仁和人。崇禎丙子舉人，榜名朱明，後更焉。除開封推官，擢監察御史，清兵下江東，率妻妾投水死。

絕筆

父兮生我，申以嚴誨。惟孝惟友，曰忠與義。丙子鄉薦，顧名自勵。名曰孝廉，庶幾無愧。致身之期，歲在癸未。司理開封，星言視事。以身許君，有死無二。是時兩河，賊氛如蝟。衆人迴車，予獨攬轡。賊出河朔，羣工奔避。予乃渡河，擊楫而濟。誓清河南，以報先帝。手披荆榛，身禦魑魅。獨張空拳，以當賊騎。知有封疆，九死何畏。三十州邑，終復舊地。維時先帝，鑒予忠瘁。授以巡方，繡衣北莅。惜也諸姦，互相牽制。中樞信讒，嫉予不媚。聯絡要圖，置之罔遂。三月撤歸，可爲隕涕。哀哀先人，一時捐棄。甘旨莫遂，遺書淪廢。我哀方盈，姦怒轉熾。赫赫金吾，逮予邸第。圍牆幽憂，寇氛猝至。匍

匍歸來，挈家奔避。航海飄零，請兵于會。召募丁男，三百而已。衣甲糗糧，皆予自備。血戰江干，二十餘次。糧寡兵微，於事何裨。疾痛呼號，徒然憤恚。丙戌五月，公侯師潰。區區孤軍，其何能濟。事不可爲，偷生何貴。拜別吾母，以及諸弟，挈吾妻妾，從彭咸。○逝。成仁取義，千古如是。

○彭咸，殷賢臣，諫其君不納，投水死。

夏允彝

允彝，字彝仲，明松江華亭人。崇禎進士，除長樂知縣。福王立，起吏部主事，清兵下南都，自投池水死。

哀侯京兆峒曾

烈烈侯夫子，負節本奇特。十載罷郎官，抗志衆莫測。西江富文彥，衡鑒饒奇識。三復陟屺詩，解組倚親側。砂礫揚中天，青霾暗無色。壘壘滎陽城，糾糾墨翟力。環塹方及泉，子魚殉社稷。公語兩子前，生死義各得。兩子泣相從，之死矢靡慝。外絕晉衛旅，內竭鼠雀食。重關泣漣洏，屠毀填荆棘。壯哉一門士，九原同羽翼。所惜蘭蕙摧，沈寃成罔極。

①侯峒曾，字豫瞻，明嘉定人。天啓進士，歷吏部郎，出爲廣東參政，遷順天府丞。福王時家居起兵，守鄉里，城陷，赴水死。有內言公集。

②陟屺，謂念母也。詩：「陟彼屺兮，瞻望母兮。」

③滎陽，城名，在

今河南，此喻其故里嘉定。二句謂設城防堅守也。墨翟，戰國宋人，倡兼愛之說，國策載其百舍重繭

以救宋園，蓋翟善守城，公輸子不能攻也。④不詳。⑤二子，謂峒會之第三子元演，第五子元潔，城陷，同投水死。⑥二句謂外絕援兵，內無糧儲也。羅雀掘鼠，張巡守睢陽時事。⑦此當是指其弟岐，曾因陳子龍事被執冤死。

黃進士淳耀哀詞

自靖錄：嘉定鄉紳黃淳耀破家結客，同侯峒會等率縣民守城，城破，大呼曰：「結髮讀書，有年矣，死無以報高皇帝、烈皇帝。」偕弟淵耀至西清涼庵，淳耀埽壁題曰：「宏光元年七月初四日遺臣黃淳耀自裁於西城僧舍。嗚呼，進不能宣力皇朝，退不能潔身草野，讀書寡益，學道無成，耿耿不寐，此心而已。」僧亟止之曰：「公未仕，可勿死也。」淳耀曰：「城亡與亡，此儒臣分內事。」同弟自經死。

黃子不偶生，大雅寡諧俗。羽儀①乍高翥，結綬匪所欲。②黃雲暗蒼梧，③北風吹大陸。烽火滿吳關，④下邑⑤勢彌蹙。緬彼二三子，登陴自躑躅。城郢⑥既已乖，號秦⑦又誰告。處死良獨難，苟生何能淑！吁嗟烈士心，伯仲⑧互相勗。威鳳既在羅，恥與凡禽逐。未知沒者悲，但知存者辱。存歿兩茫茫，思君不可贖。

①羽儀，易語，以喻賢者爲世表率。

②句言不欲爲官。綬，印綬也。

③蒼梧，見前注。

④謂蘇州。

⑤下邑指嘉定。

⑥城郢，謂築城於郢也。左傳：「楚子囊遺言，謂子庚必城郢。」君子謂子囊忠。

⑦號秦，用申包胥哭秦庭乞兵故事，謂無可告援也。

⑧伯仲，謂淳耀與弟淵耀也。

絕命詞

自靖錄：彝仲聞國變，作絕命詞云云。

少承父訓，長荷國恩。盡心報國，誓以忠貞。南都既覆，猶望中興。中興杳然，何忍長存。卓哉吾友，虞求廣成。勿齋容如，子才蘊生。願言從之，握手九京。人孰無死，不泯此心。修身俟命，欲勵後人。

①此六人當是同時奔走國事死難者。

麻三衡

三衡，字孟璿，明宣城人。貢生，屯師姑山，兵潰被執，死於市。

西山四首錄二

世亂忽如此，國恩誰與倫。徵兵到甌脫，①揖盜自重關。②貧賤懷知己，弓裘③忘至尊。中宵望北斗，不敢賦招魂。④

①甌脫，邊境棄地之謂。②重關，猶重關，謂深宮也。③弓裘，猶弓冶，謂父子相繼之事業也，詳前

注。④招魂，楚詞篇名，宋玉爲屈原作也。

終日如有失，相看何所求。一身隔江海，雙淚滿滄洲。父老疑猶在，東南渙不收。中原多李郭，①早晚急同讎。②

①李郭，謂李光弼、郭子儀，詳前注。②同仇，見前注。

被執時題詩

山陽錄：孟璿出家財募士，旬日得數千人，遂起兵於稽亭，兵敗被執，作詩題所執室中牖上云云。
吳越連沙漠，天心不可謀。漫留千丈髮，笑看百年頭。若水①心猶烈，平原②志未酬。清風吹宛句，③朝暮五湖秋。

①若水謂李若水，見前。

②平原謂顏真卿，詳前注。

③宛句二水名，在今安徽宣城東南。

張秉純

秉純，字不二，含山諸生。弘光乙酉，南都破，不食死。

絕命詞

明詩紀事：含山張秉純，弘光乙酉聞變，作絕命詞，不食死。戴敬夫和其詞曰：「先生影未出青山，如此從容一死難。新史不勞高士傳，殘詩留著野人看。嵯峨千載首陽山，欲往從之道路難。鈔得漢書龔勝傳，南風危坐把兒看。賊臣顰笑擲江山，最快陳東罵死難。今日相從游地下，神州沈陸有誰看。」

逢人漫說宋文山，樓上三年坐臥難。我本布衣饑不死，西山無面復相看。

○謂文山在燕獄時。

睦本

本，字允立，號務庵，明丹陽人。明永子，諸生，後永歷以中書召，事發，自題絕命詞云：「父既死忠，子當死孝。千載而下，不愧名教。」與賀王盛同殉節，有務庵集。

與蔣冷生習射談詩醉吟

文章與氣節，此世無復聞。惟有曠懷友，卓然迥出羣。感遇不汲汲，○憂時共殷殷。○語到千秋事，情深各悲欣。學書兼學劍，行矣慎殊勳。

○汲汲，欲速之意。○殷殷，憂也。

悼葛蒼公泖湖○殉難宏光元年

櫓槍○忽犯斗，禍亂適先後。百六歲丁巳，○乙酉月在酉。○蒼公力戰時，泖水已失守。我父○殉初六，我公殉廿九。奔跣扶柩歸，熒熒○方在疚。洒血向旻天，冀公能獲醜。傳公雄水犀，○制勝北湖口。初聞伏巖邑，戎馬地深蹂。復道渡閩關，納約

已自牖。及有寄輓詞，始知前否否。今秋逢韓僧，目擊怒濤吼。血戰落日黃，利劍刃自手。慷慨同盧公，^⑧生氣猶赳赳。^⑨我父遇九原，同籍同心友。我愧身未殉，終天罪自負。痛憶幼追隨，豪飲兼使酒。志不可一世，心一無所苟。落落狂與貧，江上期不朽。我今嚴父死，哀號載稽首。痛公復痛父，哀衷莫能剖。百痛既荒迷，招些望喪輓。^⑩英烈來雲中，大節招九有。

①葛蒼公，謂葛麟，見後葛麟仕履。溲湖，卽溲水，在今松江。②樓槍，彗星也。斗，謂斗星。③古稱百

六陽九爲厄運。④乙酉，謂宏光元年酉月八月也。⑤本父，名明永，字嵩年，崇禎舉人，除華亭教

諭，城破被執，不屈死。⑥營營，憂思也。⑦水犀，見國語：『今夫差衣水犀之甲者，億有三千。』

⑧盧公，謂盧象觀。⑨赳赳，武貌，果毅貌。⑩輓，同柳，音柳，喪車也。

吳可箕

可箕，明休寧人。國子監生。乙酉五月，清兵渡江，福王出走，可箕題詩衣上，走雞鳴山關，壯繆廟中，痛哭自縊死。

題衣上詩

大義君臣重，臨危矢致身。操心死國難，恥作兩朝人。

凌潤生

潤生，明歙縣人。御史駙從子，清兵下歸德，與駙同死。

題衣絕筆

鞠旅陳師誓大川，時乎不濟悵徒然。沙場偃臥一聲嘯，鞭馭春光向上天。

夏完淳

完淳，字存古，明華亭人。考功郎允彝子。年十五，唐王時官中書舍人，從軍，越二年，以陳子龍事連及，死於難。有玉樊集、南冠草。

顧寧人云：『存古父允彝以吏部考功郎主事，不辱赴水死。母某氏棄家爲女冠，存古年十七，慨然有勤王之志，與諸豪俊相結，往來湖中，能視天文，料軍事，草檄賦詩，援筆立成。及松江敗，與端木諸君，蹈義以死，豈非忠臣之子，能成父志者哉！』

秋夜感懷

登樓迷北望，沙草沒寒汀。月湧長江白，雲連大海青。征鴻非故國，橫笛起新亭。○
無限悲歌意，茫茫帝子靈！

○新亭，見前虞集詩注。

春興同錢大作

上苑東風試早鶯，故宮依舊百花明。江帆入境移瓜步，○敵馬如雲走石城。○金

鼓平陵^①憐翟義^②旌歌滄海葬田橫^③傷心中夜看牛斗醉把吳鈞^④萬里行。

①瓜步，地名，在今江蘇六合境。

②石城即石頭城，明南都，今南京是也。

③平陵，地名，在今陝西

咸陽西北，昭帝陵在此，因以爲縣。

④翟義，字文仲，漢上蔡人，累官東郡太守，王莽居攝，義舉兵討

逆，立劉信爲天子，自稱大司馬，柱天大將軍，移檄郡國三輔，豪傑多起響應，兵敗死。

⑤田橫，見前

鄧刻詩注。

⑥吳鈞，劍名。

張肯堂

肯堂，字載松，明華亭人。天啓進士，官至福建巡撫。唐王立，拜吏部尚書，魯王監國，加太傅，舟山不守，自經死。

絕命詞

自靖錄：舟山兵敗，肯堂服蟒袍南面坐，視其妾五人，媳沈氏，孫女茂漪，皆縊死，卽題絕命詞云云。自縊於雪交亭。

虛名廿載著人間，晚節空勞學圃閒。漫賦歸來慚靖節，○聊歌正氣續文山。○君恩未報徒憂瘁，臣道無虧在克艱。寄語千秋青史筆，衣冠二字莫輕刪。

○陶靖節（潛）賦歸去來辭。

○文文山作正氣歌。

張煌言

煌言，字玄著，號蒼水，明鄞人。崇禎舉人，明末南京之敗，煌言與同郡錢肅樂等倡義奉魯王監國，以兵屢抗清師，舟山破，魯王入閩，倚鄭成功，煌言勸成功取南京，自崇明入江，所向皆捷，煌言先移師上游，已下皖二十餘城，成功自鎮江敗退，事遂不成。後魯王卒，煌言散兵隱居，旋爲清軍所獲，不屈死。有奇零草、北征錄、採薇吟。

挽張鯢淵○相國

一身真可繫危安，垂死威儀尙漢官。○魂返黃墟○應化碧，顏留青史卽還丹。千秋共惜遺金鑑，④十載何慚帶鐵冠。⑤也識公歸箕尾⑥上，定依日月倍光芒。

○鯢淵謂張肯堂。

○肯堂臨難時，蟒袍就絰。

○黃墟，地下也。

④唐張九齡於千秋節上事鑑

十章，號千秋金鑑錄，以伸諷諭。

⑤鐵冠，御史之冠，肯堂曾官御史，故云。

⑥箕尾，二星名，見前陳

嘉謨詩注。末句芒謂星之光芒。

紗籠○姓字迥無瑕，晚節何如五柳○家。欲報君恩餘白髮，祇留相業在黃麻。○

樓空燕子從風墜，^④門冷龍孫^⑤帶雨斜。一自墨胎歌^⑥斷後，華亭^⑦鶴唳更堪嗟。

① 紗籠用王播事，播少孤貧，寄食僧舍，僧厭忌，乃罷齋而後擊鐘，因題詩壁上。後播鎮揚州，訪舊詩，已碧紗籠之矣。

② 五柳謂陶潛，潛自號五柳先生。

③ 黃麻，詔書之稱。

④ 句謂肯堂諸姬皆從

死。燕子樓，用唐張建封妾關盼盼故事。

⑤ 龍孫，竹名。

⑥ 墨胎，孤竹國君姓。歌謂夷齊西山之歌。

⑦ 晉陸機故宅在華亭，機將死，嘆曰：「華亭鶴唳，可復聞乎？」

弔沈五梅 ① 中丞

香臺咫尺渺人琴，萬里寒潮送夕陰。報國千年藏碧血，毀家十載散黃金。名山難瘞孤臣骨，潮海空磨戰士鐔。② 留得荒祠姓氏古，春歸惟有杜鵑吟。

① 沈五梅，不詳。

② 鐔，兵器，似劍而小。

張書紳范子瞻論余十餘年來戎馬勞苦孤危以詩見贈讀之悵然因次其

韻

相業封侯非我望，伯圖王業向誰論。可憐節旄旄旄全落，獨恨交亡劍尚存。上客攝衣空有缺，孤軍裹甲已無禪。也知戈朽難回日，誓死何妨絕影奔。

①句用蘇武牧羊故事，見前注。

②句用季札掛劍故事，見前注。

③馮驩，孟嘗君客，以食無魚，出

無車，無以爲家，三爲長缺歸來之歌，孟嘗君禮之，悉如所求。

④句用魯陽揮戈故事，詳前注。

書懷

一劍橫磨①近十霜，端然搔首看天狼。②勳名幾誤乘槎客，③意氣全輕執戟郎。④圯上⑤書傳失絳灌，⑥隆中⑦策定起高光。⑧山河縱破人猶在，試把興亡細較量。

①橫磨，劍名，本景延廣語。

②天狼，星名。楚詞：舉長矢兮射天狼。

③句用張騫乘槎故事。博物志

言有人乘浮槎到天河，與牛宿作談。荆楚歲時記引此，謂此人卽張騫云。

④執戟，古侍郎之職。東方朔文官不過侍郎，位不過執戟。

⑤圯上，謂圯上老人。張良遇黃石公於圯上，授以太公兵法。

⑥絳謂絳侯周勃，灌謂灌嬰，均漢文時大將。

⑦隆中，諸葛亮隱處，在今襄陽境。後漢先主劉備見

亮於隆中，一談卽定三分之策。

⑧高光謂高祖光武二帝。

追往八首錄一

長驅胡騎幾曾經，草木江南半帶腥。肝腦總應塗舊闕，鬚眉誰復嘆新亭！
博浪^①沙先起，弩注錢唐^②潮亦停。回首河山空血戰，只留風雨響青萍^④。

①新亭，見前注。

②博浪謂張良刺秦始皇，見前注。

③吳越王錢鏐築捍海塘，怒潮急湍，版築不

就，鏐乃造竹箭三千，羽簇俱備，命水犀軍架強弩五百以射潮，潮頭東趨西陵，遂定其基。
④青萍，名劍也。

八月辭故里二首

按：此詩二首，本國粹學報所錄。又按三岡識略所載，與此不同。其辭曰：「張煌言仕魯藩，周旋海島二十餘年，後知事無成，散遣部曲，入普陀爲僧，至是就擒，賦詩見志云云。」詩止一首。（缺後一首）
茲從國粹所載，兩首全錄。

義幟縱橫二十年，豈知閏位^①在于闐。桐江空繫嚴光釣，^②震澤難回范蠡船。^③
生比鴻毛猶負國，死留碧血欲支天。忠貞自是孤臣事，敢望千秋信史傳。

①閏位，謂如年之有閏月，非正統也。

②嚴光，漢餘姚人，字子陵，少與光武同學，光武卽位，變姓名

隱釣於富春江上。桐江，卽富春江，釣臺在焉。③范蠡，春秋楚人，仕越，與越王勾踐共滅吳，遂浮海入齊，或謂載西施游五湖，營商致富。震澤，今太湖也。

國亡家破欲何之，西子湖頭有我師。日月雙懸于氏墓，
乾坤半壁岳家祠。④慚將素手分三席，猶爲丹心借一枝。他日素車東浙路，
怒濤豈必屬鴟夷。⑤

①于氏墓謂于謙墓，于謙見前注。

②岳家祠謂岳飛之祠，岳飛見前注。

③臨安志：「子胥死，浮

屍於江，因流揚波，依潮來往。或有見其乘白馬素車在潮頭者。」鴟夷謂子胥，子胥死，以鴟夷盛屍浮於江。

吳 易

易，字日生，號惕庵，明吳江人。崇禎癸未進士，授兵部職方司主事，奉檄督餉吳中，未還而揚州已失，而吳江亦失，遂與同邑孫兆奎等舉兵。唐王聞之，遙授兵部右侍郎，總督江南諸軍事，進兵部尚書。魯王亦授兵部侍郎，封長興伯，爲清兵所敗，遁嘉善錢氏園，爲仇家所執，解杭州，不屈，作詩數章，死草橋門，年三十五。

朱竹垞云：「啓禎之間，風雅凌替，古風猶置不講，日生奮跡松陵，誦六公詠，原本老杜八哀之作。」

六公詠

靖遠侯王忠毅公驥^①

抱膝當時危，懷古存匡濟。英雄與世徂，風烈忍衰替。我思靖遠公，振翮全盛世。躡躍弓馬間，談笑布軍勢。甘涼^②始出鎮，肅整戎伍氣。張筵斬懦將，股栗衆相視。一舉平阿台，河西晏亭燧。麓川^③肆作逆，公又決大計。鎖甲^④金兜牟，照耀宮中賜。長驅展方略，奪險扼吭背。指麾風霆奔，戰象失精銳。萬古金沙江，不聞漢兵至。江

枯石碣爛，羅拜帳下誓。凱歌萬里入，勞賜千里出。不有爪牙臣，何以正神器。龍蛇壯士節，蛙黽腐儒議。嗚呼三征南，丹書在苗裔。

○王驥，字尙德，明東鹿人。剛毅有膽，曉暢戎略。中永樂進士，官兵部尙書。麓川之役，總督軍務。謫孟養至孟邾海，地在金沙江西，去麓川千里，爲自古兵力所不到，諸蠻震怖。凡三征麓川，還總督南京機務，年七十餘，以兵部尙書請老歸，諡忠毅。

○甘，今張掖地，涼，今武威縣。

○麓川，地名，在今雲南，永樂中思任登叛，遣王驥討平之，詳上注。

○鎖甲，卽鎖子甲，鐵甲也，可以禦箭。金兜牟，戰時所

著之冠，亦名冑。

威寧伯王襄敏公越○

威寧熊羆○姿，高視氣敵萬。脫略繩墨外，勇智走飛電。大廷吐奇言，排闥怒風旋。威聲動異域，瓌特震所見。目屬膺帝心，短袂故上殿。帝曰快御史，爲朕將而弁。所部皆鷹騰，公也身搏戰。擣虛握勝策，入穴虎乃困。一片紅鹽池，○冰天千帳爛。烽銷玉關○烟，雪卷陰山片。轅門正高會，琵琶奏哀豔。戰士挾秦姝，頓使死力賤。豁

達籠豪英，出沒鬼神眩。丈夫重勛名，志豈在鐵券。^⑤絕塞懸孤臣，中援何足玷。慘淡黃金印，零落白羽扇。^⑥風塵暗不開，北顧撫長劍。

○王越，字世昌，明濬人。景泰進士，歷官兵部尚書，總制大同及延綏甘寧軍務，封威寧伯。凡三出塞收河套地，身經十餘戰，出奇取勝，動有成算，獎拔士類，籠絡豪傑，人樂爲用，卒諡襄敏。○熊鰲，皆猛獸，以喻武士。○紅鹽池，在陝西定邊縣西北，與甘肅鹽池縣接界，王越大破韃靼於此。○玉關卽玉門關，在甘肅陰山，橫障漠北。二句謂討平邊寇。○鐵券，古以頒有功之臣者，其制如瓦，外刻履歷恩數之詳，以記其功，中鑄免罪減祿之數，以防其過。字嵌以金，各分左右；左頒功臣，右藏內府，有故則合之以取信。○相傳諸葛亮以白羽扇指揮三軍。黃金印、白羽扇二句謂王越死後零落情況。

新建侯王文成公守仁

文成王佐才，星嶽氣突兀。資神^①道無餘，童稚挺英越。訪客絕塞游，^②獷騎^④角
馳射。睥睨^⑤山川勢，志蓋燕然^⑥。磧縱橫五十家，旣長稍折節。空濛九華^⑦雲，浩
蕩南屏^⑧。月以茲洞儒宗，奧義大闡斥。精微續聖系，餘緒^⑨贊帝業。運籌羣盜間，

麟森百巢滅。①神龍無安翔，金翅縱高掣。逆旂蔽西江，②妖星射金闕。③公時擁
 上流，安危視絲髮。隻手提天綱，④雷轟走飛檄。指顧縛元凶，⑤九廟初安帖。煌煌
 再造勛，不得身獻捷。帝閭紛狼狐，八荒置牙孽。⑥非公燁，⑦威名乾坤免頽疊。控
 制仗兵符，中樞洵雄哲。吁嗟營青蠅，⑧功大賞故阨。論道羅豪賢，恬澹謝矜伐。崩
 迫戎馬中，講席每不輟。中興劇南顧，元老再秉鉞。六字蛟螭薶，⑨千年銅柱折。⑩
 漢儀耀百蠻，洒淚思田碣。威寧⑪赫遺劍，伏波⑫愾廟謁。乃知非常人，洞達神爽
 接。我生世未遠，恐懼壯猷歎。戡靖竟何人，中原日流血！

①王守仁，字伯安，明餘姚人。弘治進士，正德初以忤劉瑾，謫龍場驛丞，瑾誅，累擢僉都御史巡撫南
 贛，平大帽山諸賊，定宸濠之亂，世宗時封新建伯，總督兩廣，破斷籐峽賊。明世文臣用兵，未有如守
 仁者。其學以良知良能爲主，嘗築室陽明洞中，世稱陽明先生。有王文成全書。②資神，猶稟賦也。

③守仁少好騎射，曾赴塞外，與胡兒馳逐。④獷騎，謂胡騎之獷悍者。⑤睥睨，斜視貌，有輕視
 之意。⑥燕然，山名，見前注。⑦九華，山名，在安徽青陽。守仁讀書其中，悟良知之理，空濛雨氣也。

①南屏山名，在杭州南山。

②餘緒猶言緒餘，餘事也。

③羣盜謂大帽山諸賊。颯，暴風也。句

謂滅賊甚速。

④逆旗謂宸濠之叛。西江猶言江西。

⑤妖星，指彗星、棓槍等言；金闕謂朝廷也。

⑥天綱，星名，主武帳；又作王法解，並通。

⑦指顧，言速迅也。元凶，謂宸濠。

⑧上句謂朝多小人，下

句謂廣布爪牙。

⑨燁，熾也，盛也。

⑩詩，營營青蠅，後世以青蠅喻讒人。

⑪不詳。

⑫漢馬援平

交趾，立銅柱於象林南，與西屠國分界。

⑬威寧謂王越，見上。

⑭伏波謂馬援，援拜伏波將軍。

定襄侯郭忠武公登①

郭公武定孫，②神駒渥注③好。十齡走健筆，歛吸振奇藻。動徹春秋義，兵法腹笥了。安危異人出，所以奠皇造。英宗北狩初，決機一何早。黃塵擁華蓋，④痛憤居庸道。紫微⑤爲盪搖，柱⑥極西欲倒。我公奮孤撐，乃心協少保。⑦國也今有君，揮血視清昊。嶽峩⑧雲中城，⑨虎豹鬱相抱。崩騰萬馬陣，擊衆每用少。猿臂捷有神，鐵甲盡穿縞。楊石⑩雄軍聲，鎖鑰資電掃。撇烈天網翻，槎枒地龍繞。豈多三軍力，遂爭造化巧。詩看橫槊賦，⑪檄倚馬上草。排宕非常姿，灑氣秋空島。⑫高詠戰場

篇④ 寂寞風流紹。

①郭登，字元登，英孫，明濠人。幼穎敏，及長，博聞強記，善議論，好談兵。景泰初以都督僉事守大同，以破敵功封定襄伯。登儀觀甚偉，髯垂過腹，爲將紀律嚴明，料敵制勝，動合機宜。成化中卒，諡忠武。

②郭英封武定侯。

③渥洼，見前注。

④華蓋，天子之車蓋。

⑤居庸，關名，在昌平西北，地甚險要。

⑥紫微，星名，天子之所居。

⑦柱，謂天柱。

⑧少保，謂于謙，詳見前注。

⑨巖窠，見前注。

⑩雲

中城，卽山西大同。

⑪楊石，不詳。

⑫句謂橫槊賦詩，倚馬草檄。

⑬晶，音杳，明也，遠也。

⑭戰場

篇，當是登詩。末句謂風流寂寞，無人紹述也。

少保戚公繼光①

大將東南誰，戚公真鷹揚。②雄情恣擗闔，③祕策揮陰陽。夙奉綦履④訓，更見經術詳。結友傾賢豪，文采殊頡頏。曉達三門⑤流，以律師所臧。龍鳥追武侯，⑥衡軸通軒皇。⑦變化開精心，什伍爲鴛鴦。島夷⑧蹂南土，兵氣慘不張。閉營百日練，戰力虎士強。疾掃溟波平，受鉞總薊方。⑨計伸犁庭⑩威，十萬環偏廂。遠猷振華夏，

定策爲周防。亭障①雜星羅，旌旄蔽日光。呼韓②遂稽首，郅支亦來王。款關四十年，戎馬不敢颺。伐暴貴上兵③，功豈必戰場。豈無通侯賞，坐使戰士傷。時平武略絀，世亂智勇長。問彼登壇者，曷以恢我疆。

①戚繼光見前。②鷹揚，謂威武奮揚如鷹也。③捭闔，猶言開合，鬼谷子有捭闔篇，言陰陽剛柔。

喻制事之宜。④綦履下飾也。思君履綦，言視殿上之地，則想君履綦之迹也。⑤三門，當指奇門。

遁甲術數之類。⑥龍鳥，當是陣圖之名。句謂如武侯之戰陣法。⑦衡軸，喻兵法。句謂繼光曉暢。

兵法。軒皇，謂軒轅黃帝。⑧烏夷，謂倭寇。⑨上句謂南平倭寇，受命北鎮薊門，以備邊患。⑩犁

庭謂犁平其庭以爲田，喻滅國也。⑪亭障，句謂繼光造墩臺數千以固邊防。⑫呼韓，郅支均句

奴單于之稱，此喻韃靼受封，邊塞晏然。⑬上兵，謂「上兵伐謀」不貴力敵也。（語本孫武子謀

攻篇）

都督俞公大猷①

文武道不殊，自古惜絳灌。②俞公萬夫雄，倜儻亦儒將。讀書當陽亞，雅歌征鹵③。上開豁延攬，真沈靜韜鈴。④公師趙布衣，⑤手畫風雲狀。貫穿十八勢，方圓識

所勦。瑣瑣部使者，叱咤故庸妄。寇憑舟山劇，^⑥策恃橫海壯。洪飆排烈風，壯氣噴高浪。朦衝^⑦百丈城，大壑千里帳。蛟宮覆絕島，鯨波赤溟漲。幕府害讜言，不得功罪當。奇績屢見攘，塞默秉謙讓。及乎雲溪^⑧役，搜剔窮箐嶂。遂憑死間力，老謀一摧盪。封侯數則奇，^⑨燕領^⑩空殊相。詎多驅除才，大受足忠忼。國恥今未雪，元戎況飛颺。豈無幽沈士，屹然安危仗。蒼茫鼓鼙思，^⑪駕馭必英匠。^⑫

①俞大猷，字志輔，明晉江人。讀書知兵法，舉嘉靖武會試，累擢廣東都司，平交黎有功，進參將，移浙江，屢以舟師破倭寇，時稱俞家軍，爲諸倭所嚴憚。擢廣東總兵，平惠潮羣盜，經略廣西，滅海賊，平古田獍，積寇盡除，威震南服。卒諡武襄。大猷負奇節，其用兵先計後戰，不貪近功，忠誠許國，老而彌篤，洵名將也。

②絳謂絳侯周勃，灌謂灌嬰，均漢之名將。

③征鹵，鹵，猶大盾也，言雅歌於征鹵之間。

④上句謂襟胸開豁，則延攬出於真誠。下句謂秉性沈靜，則曉暢軍略。

⑤不詳。

⑥句謂倭寇

憑藉舟山爲亂。

⑦朦衝，戰艦也。

⑧雲溪，地名。

⑨漢李廣數奇，不得封侯，此借以爲喻。

⑩古

以燕領虎頭爲貴相。

⑪鼓鼙，軍中樂器。聞鼓鼙而思將帥，故曰鼓鼙思。

⑫英匠，猶言哲匠，句謂

將帥須有善用人者駕馭之。

從軍行

已分沙場報國恩，身經百戰滿創痕。但教死去圖麟閣。①不願生還入玉門。②

①麟閣，卽麒麟閣。漢宣帝圖功臣於麒麟閣，凡十一人，以霍光爲首。②玉門卽玉門關，見前注。

陸培

培，字鯤庭，明仁和人。崇禎進士，除行人，家居死難。

絕命詩

誰謂朝廷一命輕，行人①使節本皇明。春秋官敍諸侯上，周禮班從司馬名。雍國
尙慙收采石，②荆胥無計泣秦兵。③蕩陰④徒有湔衣血，烈帝孤臣恨未平。

①行人，官名，掌朝覲聘問之事，周禮屬秋官。

②雍國，謂虞允文。允文字彬甫，紹興進士，累官中書

舍人。金主亮入寇，朝命允文犒師采石，遂督兵戰，大敗之。劉錡執其手曰：「朝廷養兵三十年，今日大功，乃出儒者。」孝宗時拜左丞相，封雍國公。

③句用申包胥泣秦庭請救兵故事，見前注。

④

蕩陰，地名。蕩陰之戰，晉惠帝敗績，嵇紹死節。見前注。

吳爾壩

爾壩，字介子，明崇德人。崇禎癸未進士，改庶吉士，李自成陷京師，從賊中脫歸，依史可法軍，死揚州之難，有滋蘭堂初集、聶許堂遺草。

朱竹垞云：「先生間道潛行，依史閣部軍中，以身許國，遇鄉人祝孝廉淵南還，斷一指裹家書中，遺其親，誓不空返，卒死於兵。曾譏死臣傳，曰：『仁書傳有小序，各繫以人，曰：滿身曰焚，曰炮烙，曰炙，曰自剄，曰不食，曰閉口，曰雉經，曰扼吭，曰立稿，曰沒陣，曰觸，曰墜，曰燬，曰烹，曰菹醢，曰櫛，曰斬，曰車裂，曰磔，曰鋸，曰囊撲，曰剝，曰剖，曰拉，曰杖，曰笞，曰鎚擊，曰刺，曰幽，曰凍，曰疽發背，曰慟哭。』統論之曰：『諸死者，或假手於人，或憤激自裁，或罵賊畢命，身死主悟者有之，身死敵懼者有之，身死家破者有之，身死名榮者有之，要與禽息鳥視者遠矣。』其曰：『被犀甲，操吳戈，氣之雄，騰天河，鶩廣野，捐愛戚，志之決，頭匪恤，我心赤，我血碧，長城雖壞，白虹貫日。』則先生自道也。先生之死，故人殮其屍而寄棺於佛寺，寺毀於兵火，棺亦燬焉。其家函所寄指葬之。四明葛世振入之昭忠錄，并銘其墓。」

我行其野二章

我行其野，石田嶙峋。荒原暗淡，隻不見人。黃埃接天，有狐旻旻。○陰風吹車，慮掣

其輪。

○旻旻，衆多貌。

相彼征駒，尙求果腹。嗟我人斯，終朝無祿。螟螣[○]之生，不遺荏粟。哀哉雁戶，載行載哭。

○螟螣，害稻之蟲，螣音特。

我丁匪辰，紛此百罹。寇訏于郊，僉曰撫之。惟儉人[○]是咨，俾大璫[○]是司。我行其野，告哀以詩。

○儉人，佞人也。儉音纖。

○璫，宦官也。

題仁書後

被犀甲，操吳戈，氣之雄，騰天河。鶩廣野，捐愛戚，志之決，頭匪恤。我心赤，我血碧，長城雖壞，白虹貫日。[○]

○白虹貫日，見前注。

凌 駒

駒，字龍翰，明歙縣人。崇禎癸未進士，授職方司主事，南渡拜監察御史，巡按河南，監各鎮軍，清兵渡河，駒馳歸德，誓以死守，城破，遂自縊。

題衣

艱難歷盡乃徒然，謝世長歸碧落天。從古文山○能有幾，不如仗節學平原。○

○文山見前注。○平原謂顏真卿，見前注。

葛麟

麟，字蒼公，號瞿庵，明丹陽人。爲諸生時，走京師，擊登聞鼓，雪京江太守印司奇冤。崇禎癸未舉人，乙酉福王立，巡按祁彪佳薦，授中書銜，時馬阮用事，隱居不出。南都破，與盧象觀起兵，後同殉難於御湖。著有瞿庵集。

贈友人

怪君何事太憂愁，要作男兒拚斷頭。試看古今雄烈士，幾人保首上荒邱！

上史閣部

金符玉牒世相傳，仗鉞威稜靖海天。許國有心同旭日，趨時無意任秋烟。龍鈎光冷鯨鼈化，虎帳風高雁鷺眠。莫道東南撐半壁，還期唾手向幽燕。

文 乘

乘，字應符，明長洲人。諸生，明南都亡，與吳易同舉兵，兵敗被執，不屈，賦詩就戮。

絕命辭

閔閱 ○ 名家舊姓文，一身報國許誰聞。忠魂今夜歸何處，明月灘頭臥白雲。

○ 閔閱，書功狀以榜於門也。後世因謂巨室曰閔閱。

何騰蛟

騰蛟，字雲從，明黎平衛人。天啓舉人，由南陽知縣，歷官湖廣巡撫。左良玉與師東下，邀與偕，不從，走長沙，招降李自成餘衆，唐王封定興伯，令謀恢復。桂王立，爲武英殿大學士，清兵下湘潭，被執，不屈死。贈中湘王，諡文烈。

張應詔圖園集：「文信國公，宋末竭力盡忠，輔二王；何文烈公，明末竭力盡忠，輔三王，險阻艱難，其時同，其勢同，其志同。元執信國公於五坡嶺，張宏範曰：「國亡，丞相忠孝盡矣。能改心以事宋者，事今，將不失爲宰相矣。」信國公泫然出涕曰：「國亡不能救，爲人臣者，死有餘罪，況敢逃其死而二其心乎。」本朝執公於湘潭，遺之書，其略曰：「今天厭於明，神器有主，尙思收旣覆之水，然久死之灰，棄身不顧，而單騎被執，心與文山一轍，而境遇之艱難倍蓰過之，忠貞亮節，誰不憐惋。先生之道盡矣，若肯承合天意，知命來歸，當不讓洪承疇之一席也。」公報書曰：「某少壯從王，運逢屯蹇，甲申三月，自分一死，所以苟延至今日者，思躅汾陽後塵也。不意志切才疎，致滋狼狽，負恩辱國，臣罪當誅，尙可苟延人世乎！邱墓妻子不敢顧，頭可斷，心可剖，先王先公，實式憑之！」不爲利動，不可威劫，百鍊之剛，又自相同。信國公過金陵詩曰：「從今離去江南路，化作嘯鵲帶血歸。」公自悼詩曰：

「盡瘁未能時已逝，年年鵑血染宗周。」其慷慨悲歌也，無乎不同。

述懷

列祖艱難業，諸臣敗亂重。揭竿^①何太夥？制梃^②竟誰從？國是成剜肉，^③軍謀競養癰。^④劇慚心力竭，無計掃羣凶。

①揭竿，謂倡亂也。

②制梃，喻爲國效忠也。

③剜肉，謂剜肉補瘡；言但顧目前之急，不顧後也。

④養癰，謂養癰遺患，有姑息害事之意。

瞿式耜

式耜，字起田，明常熟人。萬歷進士，除永豐知縣。福王立，擢右僉都御史，巡撫廣西。唐王監國，官兵部侍郎，協理戎政。清兵破汀州，式耜與丁魁楚等立永明王于肇慶，及王奔全州，以大學士留守桂林，尋封臨桂伯。在軍與士卒同甘苦，聞時政闕失，必疏諫，兩粵皆倚以爲重。城破，端坐府中，與總督張同敞俱死之。有魏林漫錄及雲濤松丸等集。

崇禎忠節錄：「瞿公授命時，門下士吳江楊藝字二癡者，衣衰絰號哭於營中，見文武將吏，卽叩頭請改葬，凡二日，聞者感動，令備棺衾殮焉。常熟馮班有過臨桂，伯墓下詩云：「馬鬣悠悠宿草新，賢人聞道作神明。昭君怨氣萋弘血，帶雨和烟又一春。」」

自警

不朽稱三立，[○]唯名貫此中。完貞方是德，砥世卽爲功。生死休言命，春秋只教忠。失身千古恨，大擔在微躬。

○三立，謂立德、立功、立言也。

浩氣吟

國粹學報：『庚寅十一月，聞警，諸將咸棄柱走，留守瞿公執城亡與亡之義，效死勿去。敵於申刻，自江東泗水入城，共誓一死。六之日，以不屈被刑，捶楚之餘，木塞其口，兩臂俱傷，左臂已不復伸矣。幽囚困辱，防視甚嚴。留守賦詩八章，以明厥志。孤臣張同敘述。』

藉草爲茵枕塊眠，更長寂寂夜如年。蘇卿○絳節惟知漢，信國○丹心上告天。九死自甘遑惜苦，千秋公論亦隨緣。殘燈一室羣魔繞，寧識孤臣夢坦然。

○蘇卿謂蘇武，見前注。○信國謂文天祥，見前注。

已拚薄命附危疆，生死關頭豈待商。二祖○山河人共擲，四年精血我偏傷。羞將顏面尋吾主，賸取忠魂落異鄉。不有江陵真鐵漢，○腐儒誰爲剖心腸。

○二祖當指明太祖、成祖。○江陵鐵漢指張同敘言，同敘爲張居正曾孫。居正，明江陵人，嘉靖進士，穆宗時，與高拱並相，神宗時代拱爲首相，飭吏治，整邊備，綜核名實，信賞必罰，爲相十年，海內稱治。

正襟危坐待天光，兩鬢依然勁似霜。願作須臾階下鬼，何妨慷慨殿中狂。頻加綁辱神無變，旋與衣冠貌益莊。慚愧老夫非怯死，輸君浩氣姓名香。

連年索賦，養邊臣，曾見登陴有幾人！上爵滿門皆紫綬，荒村無處不青燐。僅存皮骨民堪畏，□□妻孥國已貧。試問怡堂，今在否，孤餘留守自捐身。

○索賦，猶悉索敵賦，言盡所有以供給之意。○怡堂，不詳。

邊臣死節亦平常，恨死猶銜負國傷。擁主○竟成千古罪，留京翻□一隅疆。罵名此日知難免，厲鬼○他年詎敢忘？幸有顛毛○留旦夕，魂兮招赴祖宗旁。

○擁主，謂擁立永明王。○厲鬼，張巡死節時語，謂「死當爲厲鬼以殺賊」。○顛毛，謂頂髮也。

拘幽土室豈偷生，求死無門泪轉清。勸勉○煩君申大義，癡愚嘆我太無情。高歌每羨騎箕句，○洒淚時聞滴雨聲。四大○久空同泡影，英魂到底護皇明。

○原注謂彭王二君時來勸。○騎箕句用趙鼎事，趙鼎，字光鎮，宋聞喜人。高宗時與張浚共圖興

復，後與秦檜不合，貶嶺南，不食而卒。自題銘旌曰：「身騎箕尾歸天上，氣作山河壯本朝。」○四

大佛家語，謂地水風火道德經則以道、天、地、王爲域中四大。

岩疆四載盡臣心，坐看神州已陸沈。職守殉城身豈易，恩期勇死報應深。二陵風雨一時來，繞歷代衣冠何處尋？歎息時艱逢國步，河山有淚尙蕭森。

○二陵，當用左傳殺之戰故事。「殺有二陵焉，其南陵，夏后皋之墓也；其北陵，文王之所避風雨也。」又唐崔曙亦有「二陵風雨自東來」之句。

年逾六十復奚求，多難頻經渾不愁。刼運千年彈指到，綱常萬古一身留。欲堅道力憑魔力，何事俘囚學楚囚？了卻人間生死事，黃冠莫擬故鄉游。

○彈指，喻時之暫也。○楚囚，見前注。○黃冠，文天祥故事，見前注。

初六日紀事○

文山當日猶長揖，堪笑狂生禮太疎。○軀命已交初見刻，喜嗔遑計就刑餘。夷裝畢竟仍華語，漢字如教聽聖書。○張子已成千古事，知予結局定何如？

○庚寅十一月初五聞警，開國公趙印選等均遁去，翌日瞿張二君被執。○二句爲張同做不屈

受刑掠而發，見後同儻仕履注。按文山見李羅時長揖不拜。③原注謂指孔有德言。有德，清初從順治入關，爲平南大將軍，率師平湖南，所向皆捷，鎮廣西，封定南王。

自嘆示別山①

七尺那堪斗室蟠，禪關止靜好同觀。心維漢鼎②千秋痛，目極堯封③萬里酸。胡語嘈嘈魂裏聽，飄風烈烈夢中寒。扶輿④非大身非小，留得綱常宇宙寬。

①別山，同儻字。②漢鼎，喻明祚。③堯封，謂中國舊有之版圖也。④扶輿，猶言扶搖，喻旁礪之大氣也。

閏十一月初一夜放言

周德雖衰命豈移，①天南胡馬竟長嘶。縱云將相無周召，②寧遽乾坤倒夏夷！舉世滔滔狂不醒，孤臣矯矯行偏危。無逃大義昭千古，敢望文山節並垂。

①句謂明祚雖薄，尙未應亡。左傳：『周德雖衰，天命未改。』②周召謂周公、召公。

辮髮胡裝日夜攢，①殊形見慣也相安。苦爭乾淨荒邊土，盡改中華文物觀。日月

晦蒙天不霽，河山破碎地偏寒。俘囚熱血魂常在，炯炯雙眸死後看。

○句謂清人薙髮垂辮。

盈耳無非賊與蠻，○俘囚視息亦何顏！投誠博寵翻蒙賤，守正嬰羅未許頑。誰謂人心真盡死，敢云故物不應還！終宵飲恨呼宗祖，寒雨疎疎淚共潸。

○原注：「彼中呼兵將曰賊，百姓曰蠻子。」

張同敞

同敞，字別山，明江陵人。大學士居正曾孫，未弱冠，卽補弟子員。崇禎間，追卹江陵相業，復其官。蔭同敞中書舍人。時朝政紊亂，同敞痛哭陳言，爲忌者所中，挂冠去。桂王立，召拜兵部左侍郎，加尙書。庚寅十月，清兵入嚴關，同敞督師靈川，兵潰，從江東泐水入桂林，謂留守瞿式耜曰：「事急矣，惟共死封疆而已！」十一月，寧遠伯王永祚迎降，城中無一兵，遂與式耜同被執，諭之降，不聽，幽於民舍，日賦詩唱和，旋被殺。

吳駿公云：「別山死事最烈；其未死也，受拷掠，兩臂俱折，目睛出，語不爲撓。稼軒有初六日記事一詩云：『文山當日猶長揖，堪笑狂生禮太疎。』別山和云：『臂先頭斷生堪賤，身爲城亡計豈疎。銜木焉知舌在否，睛亡自笑眼多餘。』此其被刑時詩也。若兩公者，真可謂殺身成仁者矣。」

熊岑溪云：「清定南王久耳公名，欲活之，勸諭百端，公不從，有「命延一刻，慚難負，論到千秋慮益深。應知同學談忠孝，決不偷生負鬼神」之句。定南王召公諭之，公以死自誓，猶張空拳，將擊王，左右兵之，斷公臂，傷睛，有「舌存不信乾坤去，臂斷寧同兒女傷」又臂先頭斷云云。左右曳公跪，公不肯，席地而已，猶慢罵，左右以木塞其口，有「腰膝尙存堪作鬼，死生有數肯呼天」又銜木焉知云

云。瞿公贈詩有「文山當日猶長揖，堪笑狂生禮太疎。張子已成千古事，知予結局定何如。」又有「斷臂傷睛木塞唇，猶存雙膝見忠臣，但將一死成今古，剩有丹心質鬼神」等句。聞者莫不哀之。」

和稼軒師浩氣吟八首

稜稜瘦骨不成眠，祖德君恩四十年。腰膝尙存甘作鬼，死生有數肯呼天。疊山 ①
欲附文山烈，蘇武 ② 休思漢武 ③ 緣。蹈鑊撩衣 ④ 談笑裏，何須血淚更潸然。

① 疊山、文山，並見前注。 ② 蘇武，見前注。 ③ 漢武帝，名徹，承文景之業，興太學，崇儒術，平南越、東越、朝鮮，下滇及西南夷，斥匈奴，通西域諸國。版圖益廓，稱爲雄主。惟急征斂，重刑罰，有刻薄寡恩之嫌。在位五十四年。 ④ 蹈鑊撩衣，本茅焦故事，謂不辭就死也。

異國凋零非故疆，首山 ① 一死尙留商。舌存不信乾坤去，臂斷寧同兒女傷！胡語可憐原漢語，帝鄉無路是愁鄉。悲魂應變天邊月，照見孤臣鐵石腸。

① 首山，謂首陽山，用伯夷、叔齊事，詳前注。

連陰半月慘無光，草簟終宵薄似霜。白刃臨頭惟一笑，青天在上任人狂。願留衰

鬢酬周孔，○不羨餘生奉老莊。有骨可埋頭可斷，小樓夜夜汗青香。

○周孔，謂周公、孔子。

○老莊，謂老聃、莊周，均道家。

四載危疆一個臣，○城亡雖待愧今人。將軍不肯留犀甲，風雨惟聞哨碧燐。列國冠裳何事改，九邊賦稅爲誰貧？傷心烈祖當年志，寸磔應叢百世身。

○瞿式耜任留守凡四年。

生當吾世遇非常，坐臥形容亦可傷。胡馬夜嘶過百粵，○老臣慟哭守殘疆。千秋正氣憑□鑒，一死中原遂忍忘？不入耳言今古淚，有懷欲訴孝陵○傍。

○百粵，謂廣東也。

○孝陵，明太祖陵墓，在南京。

凜然大義自平生，囊底無錢魂亦清。二烈雙忠○原有數，九朝七世。豈忘情！忍教骨肉皆冤鬼，多難師生共哭聲。想見刀頭空一切，長宵盼不到天明。

○二烈雙忠，不知所指。唐張巡、許遠稱雙忠，有雙忠廟。又宋末陸秀夫、張世傑亦稱雙忠。

○九朝

七世，以南宋喻明也。南宋傳高、孝、光、寧等九朝，凡七世。

日日刀錐攢我心，天人幽困見消沈。厄馴此日身難免，論到千秋慮亦深。粵月應憐偕砥礪，楚魂○誰爲賦招尋！昨宵猶夢亡親在，醒後惟聞碧雨森。

○楚魂謂屈原，原死，其弟子宋玉爲賦招魂。

忌生翻覺死難求，甲士相環任我愁。祭酒○一生同臘盡，睢陽○二字共名留。已拚魂作他鄉鬼，博得人稱亡國囚。三百年來恩怨血，先皇應許得從游。

○祭酒，不知何指。

○睢陽，謂張巡，見前注。

稼軒師贈余一詩，余惶恐待死之餘，漫和一章。

臂先頭斷生堪賤，身爲城亡計豈疏。銜木焉知舌在否，傷晴因笑眼多餘。○血分顏柱○悲前史，癩伏襄橋○有特書。早晚刀山游息好，古人慷慨愧難如。

○三四兩句，見前仕履附注。

○顏柱不詳。按宋楊邦乂知溧陽時，金帥完顏濟江遣人說降，邦乂

以首觸柱流血，不從，旋被害。與詩義相類，不知是否。

○豫讓，戰國晉人。初事范中行氏，無所知名，

去而事智伯，甚見尊寵。智伯爲趙襄子所滅，讓變姓名爲刑人，挾匕首欲刺襄子，不果，又漆身爲癩，

吞炭爲啞，伏於橋下，爲襄子所獲。襄子責其何以不爲范氏報仇，讓以智伯國士相待爲對，並請襄子之衣而擊之。襄子義之，乃使使者持衣與讓，讓拔劍三躍，呼天擊之曰：「可以報智伯矣。」遂伏劍而死。

留守師見贈二詩依韻賦答

仗節誰云有異同，此身此難正遭逢。書生恥效荀文若，夫子堪師信國公。共看挺身當亂裏，可憐渡水入城中。願隨君死非無意，烈烈天朝賴世忠。

○荀彧，字文若，後漢潁陰人。舉孝廉，曹操以爲奮武司馬，軍國事悉以咨之，積功封侯。董昭等欲進操爵爲魏公，彧曰：「曹公本興義兵，不宜如此。」操心不平。後彧病，操饋以空器，遂飲藥卒。○信國公謂文天祥，見前。

當年竊幸識韓荆，已許今朝共死生。商粟勉餐貧可授，南冠未改座中盟。臣心既盡悲誅磔，胡語空勞說姓名。一線幾希師若友，有仁須殺此身成。

○韓朝宗，唐長安人。歷左拾遺，累遷荊州刺史，喜識拔後進，當時士咸歸重之。李白與書曰：「生不願封萬戶侯，但願一識韓荊州。」其稱慕如此。○商粟，伯夷叔齊首陽山事，見前注。○南冠，見

楚囚注。

稿成寄僧

且夕刀頭思，文章豈再持。死生一片血，天地百年悲。遺稿無多句，將書寄二詩。孤心從此別，莫問今何時。

囚月餘矣，十二月初十日暮，欲出予予知此際亦成我矣，乃喝設案展几拜天地祖宗，畢毋損我冠裳，卽就殺復吟一章。

一月悲歌待此時，成仁取義有天知。衣冠不改生前制，名姓空留死後詩。破碎河山休葬骨，顛連君父未舒眉。魂分懶指歸鄉路，直往諸陵拜舊碑。

萬泰

泰，字履安，號悔庵，明歸安人。崇禎舉人，官戶部主事，與陸符齊名，其詩兼史事，寧波文學風氣，泰實開之。入清，以遺民終。居恆慘懷國變，忽忽不自得，嘗曰：「此心耿耿，安得一把火焚之成灰耶！」

柬義扶①

昔我游嚶中，②神理淡孤吹。晨夕友素心，人文揖古誼。宗盟推上谷，③黃陳④分
 座位。蘇子⑤最靜穆，道義稱昆季。我得從之游，把臂笑相視。以君冰雪姿，滌我風
 塵氣。莊莊⑥無苟容，落落⑦成深致。北闕借上書，南天各垂翅。⑧悠悠六七年，天
 涯紛涕泗。君涉吳江深，我入越山邃。愁觀白日靜，坐老蒼天瘁。足音空谷⑨來，相
 看總顛顛。深語不終歡，乍見還疑寐。蹙額託侯黃，⑩一語一揮淚。豫讓⑪國士心，
 杵臼⑫男兒事。緣君見古人，始識彝倫字。深深此日談，脈脈當年意。乃知證懷人，
 絕去榮觀智。明夷⑬大道存，後死斯文寄。南陽⑭田可耕，商山⑮芝可餌。况當強

仕^⑤年，隱學求其志。努力酬君親，正氣還天地。有如死可生，當使生不愧。契闊與艱難，此理無失墜。爲我語平園，蕭條且高寄。

①義扶姓陳，與履安同時人。

②膠中，謂膠城，今江蘇嘉定。

③上谷謂侯廣成。

④黃謂蘊生，字

淳耀。陳指義扶。

⑤蘇子，未詳。

⑥莊莊，矜直貌。

⑦落落，獨立不徇俗貌。

⑧垂翅，猶言不得志。

⑨空谷足音，本莊子語。後人遇難得之人物或言論，輒云空谷足音。

⑩乙西南都之難，侯廣成

先死，兩子俱爭殉，皆遇害。蘊生偕其弟偉恭同日死。踰年侯雍瞻亦死。

⑪豫讓，見前注。⑫杵臼，

見前注。句謂眉聲撫蘊生遺孤。

⑬明夷，卦名。其象爲日入地中，明而見傷，凡賢者不得志，憂讒畏

譏，皆謂之明夷。

⑭南陽，地名，在今湖北，諸葛亮有「臣本布衣，躬耕南陽」之語。

⑮商山，在陝

西商縣，秦末四皓隱此。

⑯強仕之年，謂四十歲。

三月十九日①

三月當今十九日，普天聲淚憤盈時。一卮酹已非王土，七載人猶是漢恩。國士未

聞酬豫讓，②南冠惟見泣鍾儀。③滄溟萬里頻回首，慘淡春風咽子規。

①崇禎帝死三月十九日。

②豫讓見前注。

③鍾儀見前注。

年年此日淚濟然，今日今年更可憐。帝子不歸猶望狩，機槍未隕尙經天。青萍
但有沈沈氣，赤伏徒聞囉囉傳。我欲排雲問閭闔，人間大恥幾時湔！

①機槍，彗星也，主兵凶。

②青萍劍名，見前注。

③赤伏符，讖文也。光武紀：

「同舍生彊華，自關中

奉赤伏符來，詣王曰：「劉秀發兵捕不道，四夷雲集龍鬪野，四七之際火爲主。」

④囉囉，喧囂

貌。⑤閭闔，天門也。

陳士京

士京，字齊英，明奉化人。崇禎諸生。

酌刀

我有寶刀日流血，拍露流星橫卷雪，石亦可破玉可切，天房虛星主其穴。昨夜時命遭脆脆，用之割愁亦不裂，豪歌砍地聲嗚咽，西風夕照鳴鶻鳩。吁嗟此刀苦不遭，竟夜寒芒猶足豪。追隨十年不憚勞，淒風積雨飛寒濤。吐花五色終難韜，我且酌之十斛醪，白虹吸浪刀醕陶。

林棟隆

棟隆，字無過，明寧波人。萬曆時進士。

過大營舖讀岳少保金沙寺題壁①

宋徽②二帝蒙塵北，封豕③妖氛照山谷。岳侯建旄桂嶺④，東迅埽嵐烟晴暗服。大營之地昔屯兵，紫電高霞曜日迎。長驅欲搗黃龍府⑤，曹城⑥小醜安足平。恢復吞胡心可剖，號令風霆如拉朽。金牌十二誰召還，血污遊魂莫須有⑦。我來山寺識忠肝，石畫殘碑掩淚看。勁氣不隨湖水去，至今江月照人寒。

①大營舖，即大營鎮，在湖南祁陽縣。宋岳飛嘗駐兵於此，有永州祁陽縣大營驛題記。

②宋徽欽

二帝爲金人所擄。蒙塵，見前注。

③封豕，大豕也，以喻貪暴者。

④桂嶺，在湖南臨武縣北。

⑤黃

龍府，見前注。

⑥曹城，地名。

⑦宋秦檜誣岳飛以罪而殺之，韓世忠詣檜詰其實，檜曰：「飛子雲

與張憲書，雖不明，其事體莫須有。」世忠曰：「莫須有三字，何以服天下！」

王藥師

藥師，字更生，明湖州人。

聞諸路起兵信

日月無光風雨淒，橋山^①弓劍共哀啼。早知鐵戟埋三輔，^②忍見銅駝過五溪。^③
朱亥^④臂橫皆欲裂，田光^⑤頭落手猶提。甬東^⑥亦有蒼頭卒，^⑦願効前驅渡浙
西。

①橋山，見前注。

②漢以京兆尹，左馮翊，右扶風，共治長安城中，謂之三輔。

③五溪，五水名，今貴

州境，夾溪悉爲蠻族所居，謂之五溪蠻，漢馬援征蠻即指此。

④朱亥，戰國魏大梁人，有勇力，隱於

屠肆。侯嬴薦之，公子無忌，會秦兵圍趙，無忌欲救之，使亥袖四十斤鐵椎擊殺晉鄙，奪其軍，遂退秦

兵存趙。

⑤田光，戰國燕處士，爲人智深而勇沈，太子丹聞其異，與謀刺秦王事，光自辭衰老，因薦

荊軻於太子。太子曰：「願先生勿泄也！」光曰：「諾。」出而嘆曰：「夫爲行而使人疑之，非節俠也！」

遂自剄而死。

⑥甬東，謂寧波一帶。

⑦蒼頭卒，謂卒之青帕者，本蘇秦說魏王語。

莊元宸

元宸，字起貞，明鄞人。崇禎進士，官刑部主事，京師陷，迎魯王於天台，屢以時事進諫，王不能用。及清兵東下，元宸狂走山中，朝夕哭，疽發背死。

絕命詞

誓不負所學，立身非立名。捐軀良烈烈，有待豈偷生。日月茲時暗，乾坤何日明？洗心惟有水，以待河之清。

故人唐魯公，顛沛勿遽死。事至不可爲，終須一決耳。苦心透層霄，幽恨及沒齒。而我同蹉跎，下泉慚君子。

○唐魯公，謂顏真卿，此當指明末之殉國者。

欲透生死關，須從悟道還。百年身有盡，一死事無難。上與夷齊友，近惟汪馬班。致身在何地，明月照溪灣。

○夷齊，謂伯夷、叔齊，見前注。

○汪馬，謂汪君常、馬長源。

王夫之

夫之，字而農，號薑齋，衡陽人。明崇禎舉人，張獻忠陷衡州，招夫之，走匿南嶽，賊執其父爲質，夫之引刀自刺肢體，昇往易父，俱得脫，瞿式耜薦於桂王，授行人。尋歸隱，杜門著書，有集。

讀指南集①

揚州② 不死空坑死，出使皋亭③ 事未央。鳴鳩春催三月雨，楓林秋忍一林霜。礪門④ 鶴唳留朱序，文水魚書待武陽。滄海金椎終寂寞，汗青猶在淚衣裳。

① 指南錄，文天祥集名。

② 揚州地名，在今江蘇。天祥初使被留，北行至鎮江，出亡，至揚州，制置司

下令緝捕，元兵又出，危殆萬狀，卒脫險。空坑地名，天祥兵敗處，詳前注。（按天祥雖敗於空坑，但仍

脫走，及五坡嶺之潰，遂被執。）③ 皋亭，山名，在今杭縣。元兵至此，宋遣天祥使元營，遂被留。④

礪州，在廣東吳川縣南海中，宋景炎曾駐此，旋即崩殞。

陸世儀

世儀，字道威，明太倉州人，諸生，有桴亭集。

張睢陽廟

捍禦功勳烈，江淮廟貌尊。一時羅鼠雀，○千古祀雞豚。天地心猶在，風塵氣更昏。英靈如可作，慷慨欲同論。

○張睢陽，謂張巡，詳見前注。

○羅鼠雀，張巡守睢陽故事，詳前注。

遙哭希聲錢公○公婁舊令也。中西之難，開關嶺海，卒死王事，葬海中之瑯瑘山。其二弟肇一兼三負遺書，至婁因賦一律以誌思慕。

營頭夜隕海濤奔，真宰○茫茫未可論。絕島君臣留正朔，瘴天風雨葬忠魂。誰將心事傳龍比，○賴有遺書屬弟昆。千古崖山○成恨事，臨風遙慟一傾尊。

○錢肅樂，字虞孫，一字希聲，明鄞人。崇禎進士，除太倉知州。有政績。清兵下杭州，肅樂建議起兵，士

民響應。魯王監國，擢右僉都御史，厄於小人，憂憤絕食，卒於舟。有正氣堂集、南征集。②真宰天也。

③龍比，謂龍逢比干，古之忠臣。龍逢諫桀而死，比干諫紂而死。按肅樂有比干心詩一首。④崖山，宋亡國處，以喻明亡。

次韻挽瞿稼軒① 歸葬稼軒爲桂林留守死難贈臨桂伯其孫扶柩歸葬

砥柱乾坤賴老謀，那堪宰相盡風流。橫江已斷千尋鎖，籌國誰開萬里樓。②南粵兵戈行殿恨，東皋花木故園愁。稼軒思故鄉，於桂林作別墅，名小東皋。渡河只有宗留守，

慟哭相從地下遊。

①瞿稼軒，名式耜，見前。②萬里樓，不詳。③宗留守，謂宗澤。

周岐

岐，字農父，明桐城人。有執宜集。

弔故相國史道隣先生①

舉目河山勢已更，當年百戰此危城。恨留一矢②浮圖著，臂刺③孤忠血迹明。擲杖長憐夸父④沒，揮戈難起魯陽⑤生。相看惟有庭前柏，猶宿棲烏向我鳴。

①道隣，史可法字。按岐曾參史幕。②一矢浮圖，南霽雲事，見前注。③不詳。④夸父，上古人名，不量力，欲追日影，逐之於陽谷，渴死，棄其杖，膏肉所浸，化爲鄧林。⑤魯陽揮戈，詳前注。

徐夜

夜，字長公，一字嵇庵，明新城人。有東癡詩選。

富春山中弔謝皋羽①

晞髮②吟成未了身，可憐無地著斯人！
生爲信國③流離客，死結嚴陵④寂寞隣。
疑向西臺⑤猶慟哭，思當南宋合酸辛。
我來憑弔荒山曲，朱鳥⑥魂歸若有神。

①富春山在今桐廬。謝皋羽，名翺，見前。

②晞髮，皋羽集名。

③信國謂文天祥，皋羽曾以布衣參

信國幕。

④嚴光，字子陵，東漢人。少與光武同學，隱居富春山。

⑤西臺，謂釣臺西臺，皋羽曾哭文

山於此，有西臺慟哭記。

⑥朱鳥，南方宿名。皋羽哭文山有「化爲朱鳥兮，有味焉食！」之句。

戴本孝

本孝，字務旃，明和州人。

安遠侯隸卒

南都破，安遠侯柳迎降，一隸卒止之，不可，卒投河死。

大忠思一獻，不售死何逃。身賤心難詘，名傳義益高。忍爲新手版，辱澆舊戎韜。
自此河邊柳，薰條向碧濤。

○手版，笏也，朝見時所執者。

長干丐者

長干有丐者，杖曳挈瓢行至通濟橋，植杖挂瓢脫屣橋上，投河而逝。人於其瓢中得一詩云：誰把乾坤忽動搖，風吹淮水冷蕭蕭。逢人莫訴傷心事，乞丐如何愛此瓢。

青天蓋黃土，生死太尋常。欲乞誰家食，甘同故國亡。一瓢詩淚盡，雙履跡塵香。蒙

①蒙袂，謂乞食者，語本檀弓。

方以智

以智，字密之，明桐城人。崇禎進士，授檢討，國變後爲僧，名宏智。有浮山全集。

告哀詩

守陴神策○亂紛營，樞密○雍容禁請纓。東觀○士猶朝試閣，北衙軍已夜開城！
攀髯○竟抱龍湖痛，嚙臂虛傳駱谷行。○金紫貂蟬○何處哭，小臣血伴闕烏聲。

○神策，軍名。

○樞密，官名。請纓，見前注。

○東觀，漢時官中藏書之處，以喻策士之所。

○攀髯，

黃帝升天故事，龍湖猶鼎湖也，並詳見注。

○句義不詳。

○金紫，謂金印紫綬，古貴官之服。貂蟬，

武官冠飾。漢制，侍中、中常侍冠加金璫，附蟬爲飾，插以貂尾，故名。

哭臥子○

共指西湖靈隱松，揮毫刻石記相逢。文章自小誇司馬，○名字當今比臥龍。○一
死泰山○於汝畢，再生苗地爲人傭。悲歌奠酒沅江○水，與淚東流到九峯。○

①臥子陳子龍字見前。
於泰山。

⑤沅江，水名。

②司馬謂司馬相如。

③臥龍謂諸葛亮。

④一死泰山謂臥子之死重。

⑥九峯，在今松江。按臥子死於松江，故云。

余颺

颺，字廣之，明莆田人。崇禎進士，官至廣東副使。國變後與朱孕岡起兵，被執禁獄中，踰年得脫，有蘆中集。

拜戚少保祠

當年一旅下閩疆，殲絕倭酋罷戰場。父老今猶談事蹟，春秋時復奠蒸嘗。銅龍鱗甲蒼苔落，畫壁龍蛇幾度荒。幾度嘯鴉飛繞樹，峇嶢古廟煥山陽。

韓繹祖

繹祖，字茂貽，明烏程人。諸生，與總兵金有鑑等起兵，復湖州，兵敗，匿僧舍，見伶人衣冠上場，大慟而絕。有咏性堂遺稿。

揚州哭史督輔老師墓①

權臣內擅外強藩，來往江淮一旅屯。馬革②空留酬義骨，龍髯③追從鑒忠魂。運移諸葛終無效，④力盡睢陽又絕援。⑤夢裏旌旗催北渡，孤墳何不葬中原！

①揚州梅花嶺有史可法衣冠冢。

②馬革，猶馬革裹屍，謂力戰而死，本馬援語。

③龍髯，黃帝升

天事，見前注。

④句以諸葛亮輔蜀漢爲喻。唐人弔諸葛詩「運移漢祚終難復，志決身殲軍務

勞。」

⑤句用張巡守睢陽事，見前注。

常延齡

延齡，字喬若，明應天人。襲懷遠侯，國變後爲僧，種菜以老。

揚州

傷心幕府夕陽開，往事江南不盡哀。飲羽共憐黃闔子，空拳猶奮乙邦才。誰知闔禍流無盡，已去天心挽不來。宰相尙留乾淨土，北風吹裂舊旗臺。

○黃闔子謂黃得功，明合肥人。福王時四鎮之一，後移鎮太平，清兵至，倉卒中流矢，知事不可爲，拔箭刺吭死。得功粗猛，不識文義，然行軍嚴紀律，所至人感其德。

○乙邦才，明青州人。崇禎中以隊長討賊有功。史可法鎮揚州，以邦才爲副將，城破，自刎死。

胡長庚

長庚，字星卿，明應天人。駙馬東川侯胡觀裔孫。

揚州

一片陰寒晝不開，笳聲淒絕角聲哀。文山○自正千秋氣，諸葛○空思十倍才。颯颯朔風吹淚落，沈沈西日送愁來。大招○欲賦天難問，瓦礫拋殘上將臺。

○文山謂文天祥，見前注。

○蜀漢先主臨終謂丞相亮曰：「君才十倍曹丕……」云云。

○大

招，楚辭篇名。屈原放逐九年，恐命將終，所行不遂，故大招其魂，因以諷諫。

爰丹生

丹生，字彤寶，一字山夫，明嘉善人。

乙將軍 ○ 歌題劉公舫所作傳後

乙將軍，真天人。烈如南霽雲。○ 又如雷萬春。○ 冒重圍，入孤城。出孤城，部領二百騎，出入風雨旋雷霆，誰能從之。曰張衡。將軍起列校，主將陷陣單騎拔之。推主師上馬。○ 短兵接戰身步行。○ 乙將軍，真天人。初隸黃得功，○ 後隸史道鄰。○ 面中飛矢屹不動，揚州化作睢陽城。將軍戰死舊城下，誰能傳之。昌黎文。○

○ 乙將軍謂乙邦才，見前注。劉公舫，體仁字，其所著七頌堂文集，有乙將軍傳。○ 南霽雲，見前注。

○ 雷萬春，張巡部偏將，令狐潮圍雍丘，萬春立城上與潮語，伏弩發，六矢著面，萬春不動。潮疑木刻人，及謀得其實，乃大驚。萬春強毅用命，每戰巡任之，後死難。○ 二句疑有訛奪字。○ 初，黃得

功討賊，陷水田中，賊圍之，幾死。邦才馳救之，以馬與得功乘，步行射殺追騎十餘人，始得脫。○ 黃

得功，詳前注。
此以喻劉體仁。

⑤史道鄰謂史可法，詳前注。

⑥昌黎謂唐韓愈，愈文如泰山北斗，爲百代所敬仰。

黃宗羲

宗羲，字太沖，號梨洲，明末餘姚人。尊素子，尊素死詔獄，宗羲具疏訟冤，袖長椎椎許顯純等，崇禎帝嘆爲忠義孤兒。歸益肆力於學，明亡，隨孫嘉績、熊汝霖諸軍於江上，魯王以爲左僉都御史。後海上傾覆，乃奉母歸里，畢力著述。康熙中屢徵不出，學者稱南雷先生。有南雷文定等書數十種。

卓烈婦并序

烈婦爲廣陵諸生錢公穎女，年十七，歸前指揮卓煥。煥字文伯，以軍功累官指揮使，逮廣寧陷，徙居揚州，隨督輔史公可法守城。乙酉夏四月，揚州城將陷前一日，烈婦曰：「城陷必屠，婦女不能免辱，孰若先死？」煥止之，謀匿複壁，婦不可，抱三歲兒，奔後園躍入池死。時煥之姑適王氏者，少寡，歸寧於家，亦躍入。煥未字之妹二，幼弟三，亦皆躍入。嗚呼！烈婦一言，未亡之人，未嫁之女，孩提之童，一時感憤激烈，相率從死，真可慨也！吾友蕭山王自牧作傳甚詳其事，余爲賦詩四章。

兵戈南下日爲昏，匪石○寒松○聚一門。痛殺懷中三歲子，也隨阿母作忠魂。

○匪石，言心志之堅定也。詩：「我心匪石，不可轉也。」○寒松，喻志節之堅貞也。

無數衣冠拜馬前，獨傳閨閣動人憐！汨羅江○上千年淚，灑作清池一勺泉。

○汨羅江，在湖南湘陰境。戰國時楚屈原懷沙自沈於此。

問我諸姑淚亂流，風塵不染免貽羞。一行玉佩歸天上，轉眼降旛出石頭。○

○末句謂南都出降。石頭城謂南京也。

王子○才華似長卿，○斷腸數語寫如生。至今杜宇聲聲血，還向池頭叫月明。

○王子謂王子牧，曾作傳記其事者。○長卿，司馬相如字。相如工文章辭賦，爲漢文學家。

三月十九日聞杜鵑

江村漠漠竹枝雨，杜鵑上下聲音苦！此鳥年年向寒食，何獨今聞摧肺腑？昔人云是古帝魂，再拜不敢忘舊主。前年三月十九日，山岳崩頽哀下土。○雜花生樹鶯又飛，逆首○猶然逋膏斧。燕山模糊吹蒿薤，江表熙怡臥鍾鼓。太王○畜意及聖昌，奧突通誠各追數。金馬封事石渠書，怨毒猶然在門戶。靜聽嗚咽若有謂，懦夫不敢安窠藪。何不疾呼自廟堂，徒令涕泣沾草莽。

①句謂崇禎帝死。②逆首當指李自成輩流寇。逋膏斧，猶言未服刑也。③周太王有三子，長泰伯，次仲雍，三季歷。以季歷賢而有聖子昌，太王欲傳位季歷以及昌，泰伯知之，與弟仲雍逃之荊蠻，以避季歷。

釣臺①

曾注西臺慟哭記，②摩娑老眼見崔嵬。當時朱鳥③魂閒返，今日誰人雪後來。江上愁心絲百尺，平生奇險浪千堆。欲修故事如皋羽，④同志方吳⑤安在哉！

①釣臺，見前注。

②西臺慟哭記，謝翱作。詳前注。

③朱鳥，見前注。

④皋羽，謝翱字，見前。

⑤方

吳謂方鳳吳涓，均宋末遺民，結月泉吟社。

蒼水①

廿年苦節何人似，得此全歸亦稱情。廢寺醵錢收棄骨，老生禿筆記琴聲。遙空摩影狂相得，羣水穿礁浩未平。兩世雪交私不得，只隨衆口一閒評。

①蒼水，謂張煌言，見前。

顧炎武

炎武，字寧人，號亭林，明崑山人。諸生，性耿介絕俗，與同里歸莊有歸奇顧怪之目。魯王時與莊同起兵。明亡，周游四方，載書自隨。所至墾田度地，以備有事。康熙中屢徵不起，卜居華陰以終。其學主博學有恥，斂華就實。凡國家典制，郡邑掌故，天文兵農之屬，莫不窮究原委。晚益篤志六經，精研考證，遂開清代樸學之風。著有亭林詩文集等數十種。

王太監墓

先帝賓天^①日，諸臣孰扈從？中涓^②能一死，大節獨從容。地切山陵闕，魂扶御輦恭。遠同高力士^③，陪葬泣玄宗^④。

①王承恩崇禎時爲司禮秉筆太監，李自成犯闕，帝命提督京營。城陷，帝縊萬壽山，承恩亦縊其下，後葬帝陵側。

②賓天，謂帝崩也。

③中涓，猶內侍，謂居中而涓潔者也。

④高力士，唐玄宗時宦

官，以誅蕭岑等功，寵任極專。後流配黔中，赦歸，聞上皇晏駕，北望號慟，嘔血而卒。代宗以其耆宿，保護先朝，陪葬泰陵。

哭歸高士①

弱冠始同游，文章相砥礪。中年共墨衰，②出入三江汭。悲深宗社墟，勇畫澄清計。不獲聘良圖，斯人竟云逝！峻節冠吾儕，危言驚世俗。常爲扣角歌，③不作窮途哭。生耽一壺酒，沒無半間屋。惟存孤竹心，④庶比黔婁躅。⑤太僕⑥經鏗鏗，三吳推學者。安貧稱待詔，⑦清風播林野。及君復多材，儒流嗣弓冶。⑧已矣文獻亡，蕭條玉山下。酈生⑨雖酒狂，亦能下齊軍。發憤吐忠義，下筆驅風雲。平生慕魯連，⑩一矢解世紛。碧雞竟長鳴，悲哉君不聞。

①歸高士謂歸莊。

②墨衰，猶言衰墨，素服也。古以戎事凶，故墨之。

③寧越欲見齊桓公，扣牛角

而疾商歌。

④孤竹謂夷齊也，見前注。

⑤黔婁，古隱士，貧甚，歿而衾不蔽體，後人因以爲貧士之

喻。⑥太僕謂莊曾祖有光。

⑦待詔謂莊叔祖子慕。

⑧弓冶，見前注。

⑨酈食其，漢陳留人。謁

沛公，說下陳留，號爲廣野君。又說齊下七十餘城，及韓信襲齊，齊以食其爲賣己，遂烹之。

⑩魯仲

連，見前注，平生好爲人排難解紛。

井中心史歌

崇禎十一年冬，蘇州府城中承天寺，以久旱浚井，得一函，其外曰：「大宋鐵函經，」錮之再重，中有書一卷，名曰心史，稱「大宋孤臣鄭思肖百拜封。」思肖號所南，宋之遺民，有聞於志乘者。其藏書之日，爲德祐九年，宋已亡矣，而猶日夜望陳丞相、張少保統兵外來，以復土宇，至於痛哭流涕，而禱之天地，盟之大神，謂氣化轉移，必有一日。於是郡中之人，見者莫不稽首驚詫。而巡撫都院張公國維刻之以傳。又爲所南立祠堂，藏其鐵函祠中，未幾而遭國變，一如德祐末年之事。嗚呼！悲矣！其書傳至北方者少，而變故之後，又多諱而不出。不見此書者三十餘年，而今復睹之富平朱氏。昔此書初出，太倉守錢君肅樂賦詩二章，崑山歸生莊和之八章。及浙東之陷，張公走歸東陽，赴池中死。錢君遜之海外，卒於瑯琊山。歸生更名祚明，爲人尤慷慨激昂，亦終窮餓以死。獨余不才，浮沉於世，悲年運之日往，值禁網之愈密，而見賢思齊，獨立不懼，故作此歌以發揮其事云爾。

有宋遺臣鄭思肖，
痛哭元人移九廟。
獨立難將漢鼎扶，
孤忠欲向湘纍弔。
著書一卷稱心史，
萬古此心心此理。
千尋幽井置鐵函，
百拜丹心今未死。
厄運應知無百年，
得逢聖祖再開天。
黃河已清人不待，
沈沈水府留光彩。
忽見奇書出世間，

又驚牧騎滿江山。天知世道將反覆，故出此書示臣鵠。三十餘年再見之，同心同調復同時。陸公③已向厓門死，信國④捐軀赴燕市。昔日吟哦弔古人，幽篁落木愁山鬼。嗚呼！蒲黃⑤之輩何其多，所南見此當如何？

①鄭思肖，見前。

②湘纍，謂屈原也。反離騷注：「諸不以罪死曰纍，屈原赴湘死，故曰湘纍。」

③

陸公謂陸秀夫，見前注。

④信國謂文天祥，見前。

⑤蒲謂蒲壽庚，宋泉州人。守泉州，益廣二王航

海至，距城不納，旋又納款於元。黃謂黃萬石，亦宋末人。

歸莊

莊，字元恭，一名祚明，有光曾孫。明諸生，工文辭書畫。國變後，野服終身，往來湖山，或稱歸藏，或稱歸乎來，或稱懸弓。與顧炎武善，有歸奇顧怪之目。晚年寄食僧舍，非素交，雖厚勿納。有懸弓集等數種。

哭仲兄爾德①

吾兄誠壯士，單馬赴圍城。風拔將軍樹，①星流君子營。②酬知卽報國，狗義遂捐生。痛絕江山隔，空餘急難情。④

①爾德以崇禎十七年赴督師關部史公幕府，宏光元年四月，從禦揚州，已而城破，與史公同死難。

②漢馮異稱大樹將軍。③君子營，猶君子軍，古有此稱。君子當爲賢人之義。④急難情指兄

弟言。詩：『鶴鶴在原，兄弟急難。』

願公①之弟王淳王湛以統義兵戰于太倉城下見殺願公有詩哀之卽次

其韻

自非戎服卽緇髮，○壯節高風在一門。後死僕慚君二弟，全生爾勝我諸昆。錫飛
○好度中華鬼，矢盡難招異地魂。新詔褒忠多異數，草茅枯骨或沾恩。

○願公當是釋戒顯，字願雲，太倉人。○緇髮，謂剃度爲僧也。○錫飛猶飛錫，言僧之游方也。

古意十二首錄一

王業總萬方，王臣盡億姓。委贄同一體，大義存亡並。奈何士大夫，平昔誦孔孟，一
遇興亡際，方寸失其柄。魯連○恥帝秦，東海寧隕命。薛方○不仕莽，詭辭未失正。
非有故主恩，迂愚自天性。中華壯男兒，忍見兵戈橫。苟活亦何爲，擬續西山咏。

○魯連，見前注。○薛方，字子容，漢齊人。爲郡掾祭酒，嘗徵不至。王莽秉政，以安車迎之，方謝曰：

「堯舜在上，下有巢由。」莽悅其言，不強致。方居家教授，光武卽位，徵之，道卒。

顧夢游

夢游，字與治，江寧人，明季諸生，工詩，有茂綠軒集。

真州拜文丞相祠

揚子江頭丞相祠，春帆弔古獨看碑。中興百死猶思濟，正氣千年儼在斯。風雨如聞九合語，乾坤又見陸沈時！吞聲野老偷生久，未薦蘋蘩淚已垂！

○真州，今江蘇儀徵。文丞相謂文天祥也。以喻文天祥興兵勤王，以抗元復宋。

○九合，本謂桓公九合諸侯，一匡天下，所謂尊周攘夷是

賈開宗

開宗，字靜子，商丘人，明季諸生。曾以白衣參劉澤清幕。明亡不仕，潛心學問，自號野鹿居士，有遯園集。

卓烈婦

睢陽^①鬚眉今已矣，南雷^②鐵骨不可起。天地正氣付阿誰，茲道如今寄簪珥。黑雲黃塵動地來，千家野哭城欲圯。夫妻相向暮□□，一笑凝睇豈惜死！夜靜不聞兒女啼，芳蘭萎謝金閨裏。君不見蔡琰^④昔日胡笳行，馬上嬌癡泣隴水。含嗔欲死死未能，何如玉碎榮蒿里^⑤？不信試看廣陵^⑥三月濤，至今風雨猶蕭蕭。

①卓烈婦，見前。

②睢陽謂張巡，見前注。

③南謂南齊雲，雷謂雷萬春，均見前注。

④蔡琰，字文姬，邕女，知音律，適衛仲道，爲胡騎所獲，在胡中二十年，曹操以金璧贖之歸，作胡笳十八拍，後再嫁

董祀。⑤蒿里，古挽歌，言人死魂魄歸乎蒿里也。其地在泰山之南。⑥廣陵，地名，在今江蘇江都

縣境。

杜 濬

濬，字于皇，號茶村，黃岡人，明季諸生，入清隱居不仕，詩文豪健，有變雅堂集。

咏史得謝翱①

文山②殉宋社，得士亦不苟。炎午③祭生前，皋羽哭死後。不知西臺④上，淚血今乾否！少陵⑤賦八哀，此意若先有。所以晞髮翁⑥，遺編燦星斗。

①謝翱見前。

②文山謂文天祥，見前。

③炎午謂王炎午，宋廬陵人，初名應梅，字鼎翁，咸淳間補

太學生，臨安陷，謁文天祥，毀家以助軍餉。天祥被執，炎午作生祭文以勵其死。自是杜門力學，名其集曰吾汶稿，以示不仕異代之意。

④西臺謂釣臺西臺，翱有西臺慟哭記，詳前。

⑤少陵謂杜甫，

甫有八哀詩。

⑥晞髮翁謂翱，翱自號晞髮子，所著曰晞髮集。

黃 達

達，字儀通，明末山陰人。

卓烈婦

乙酉圍揚州，城門一月閉。丁壯死城頭，老弱哭街市。烈婦語其夫，請君從此逝。不見高傑兵，殺掠無巨細。况茲雄師來，後先皆鐵騎。憶昔結髮時，雙雙坐羅綺。池上兩鴛鴦，見之嬌不起。如今張網羅，反覆迷天地。雄飛雌必隨，雌在雄反累。所有週歲兒，地下爲君乳。城角一聲裂，城內兵四至。遣夫出前門，驅家後園避。白髮夫長姑，黃口夫諸弟，小姑兩齊肩，掌珠抱者是。共妾爲八人，所去唯夫壻。妾身不可污，兵刃一何利。長幼聚一堂，緩急權大義。夫壻園中池，夫壻池中水。水中自有天，藏我蛾眉麗。一躍婦與兒，再躍長姑繼。二躍雙小姑，四躍靡遺類。生願相從生，死願相從死。清波激其上，明月枕其底。不聞門外兵，殺人如屠豕。

①卓烈婦見前。②高傑明米脂人。初從李自成，後降明爲總兵官。福王時鎮揚州，州民不納。史可法移其衆於瓜州，爲四鎮之一。

陸廷掄

廷掄，字懸圃，明末興化人。

過史相國墳^①

廣陵城北一孤墳，云是先朝舊督臣。家上斷碑書漢字，路旁荒草拜行人。滄波鳴咽三江戍，碧血淒涼萬古春。一自前軍星墜後，至今無復見綸巾。^②

① 史謂史可法。 ② 末二句以諸葛亮爲喻。

閻爾梅

爾梅，字調鼎，號古古，沛縣人。崇禎舉人，工詩。明亡後，奔走國事，幾及禍，顧橫波匿之側室中，始得免。隱居終身，有白奔山人集。

答友人

海外生還九死餘，老親未葬故踟躕。決無世上彈冠想，徒有年來卻聘書。伏臘不關新晦朔，湖山還伴舊樵漁。侍郎休問田園事，先帝宮陵亦已虛。

○時陳名夏欲令爾梅就會試，使親信許以會元。爾梅令仲掌書一「嚇」字示之，又作兩詩上之，名夏見詩，遂不復言。

漫說長安○好儼居，五雲臺下卽□廬。誰無生死終難避，各有行藏兩不如。龔勝○堅辭新室組，臧洪○遲答故人書。當時風雨雞鳴約，二十年來豈盡虛。

○長安謂京都。

○龔勝見前注。新，王莽篡漢時國號。

○臧洪，見前注。

傅鼎銓

鼎銓，字維新，臨川人。崇禎進士，福王時舉兵抗清死難。

憶劍甲申

陵社沈淪傷北極，孤提一劍答君親。丈夫有血終成碧，痛灑青編照古人。

岑副戎持扇索詩寫此示之

興亡底事發哀吟，厲黯南天瘴霧深。可識文山○堪百世，難爲宏範說丹心。

○文山謂文天祥。宏範謂張宏範，俱見前。

憶謝疊山○

血戰安仁○敗不還，潔身賣卜入閩關。一朝絕粒甘溝瘠，名在千秋第一班。

○疊山，謝枋得字，詳前。○安仁，地名，在今江西。

楊焯

焯，字俊三，明末吳縣人。

拜于忠肅公墳①

今古錢塘割昏曉，江潮怒嚙英雄老。松柏森森北斗低，忠臣塚上無啼鳥。隔湖月照鄂王②墳，淚灑兩朝冤少保。③憶昔景泰④年間事，隻手扶天助天討。司馬門前鐵騎寒，居庸⑤城外櫓槍埽。誰知徐石⑥爭奪門，南內鳴鐘還大寶。碧血淋漓濺西市，青山白骨埋烟草。靈旗畫展鼙鼓喧，遺殿鬼峨萬花繞。山鬼一脚不敢出，始信忠魂獨縹緲。我來拜公公豈知，孤舟落日西陵⑦道。杜鵑叫罷行人稀，銀濤白馬歸華表。

①于忠肅，謂于謙，見前注。

②鄂王，謂岳飛，見前。

③飛及謙皆官少保。

④景泰，明景帝年號。英

宗征瓦剌，兵潰被執，大臣于謙等立景帝。

⑤居庸，關名，見前注。

⑥徐石謂徐有貞石亨。景泰七

年，帝病，徐有貞石亨等奪門扶英宗復辟，且殺于謙。

⑦西陵，卽西興，在杭州江邊。

劉城

城，字伯宗，明末貴池人，有嶧桐集。

哭史公[⊖]

大臣誰死國，賤子哭燕臺。力竭告無罪，魂招誓不迴。到今真取義，自古所難才。南渡從前有，惟公獨可哀。

⊖史公謂史可法。

胡春生

春生，字夏昌，號赤岸，明末歙縣人。著有赤岸詩稿。

懷凌井心①

督師②從賊辱疆場，御史魂歸是國殤。③生畏西雛歌振鷺，④死留雙廟祀睢陽。
⑤金江⑥故里名相識，父子同時姓亦香。用疏廣受稱父子事。漫把封書重灑淚，伍胥⑦濤倚湧錢塘。

- ①凌駟字龍翰，爲督師李建泰監軍。後以御史偕從子潤生死歸德之難，並見前注。②督師謂李建泰。③國殤，謂死於國事者。④振鷺，詩周頌篇名。「振鷺于飛，于彼西雛。」注：「振，羣飛貌。雛，澤也。本章言夏商二代之後，于周爲客。天子有事，膳焉，二王之後來助祭也。」⑤睢陽有張巡許遠雙忠祠。⑥金謂金聲，字正希，見前黃道周詩注。江謂江天一，字文石，歙人，與金聲起兵，兵敗被執，不屈死。⑦伍胥，卽伍子胥，見前注。

柴紹炳

紹炳，字虎臣，明末仁和人。

卓烈婦

廣陵^①花月擁高樓，樓上珠簾珊瑚鈎。只道羅綺鋪繡陌，誰知烽火逼江頭。旌旗萬隊城邊樹，黑雲如凝矢如注。爭鎖妖嬈歸帳來，亂捲啼聲隨馬去。卓婦錢女女丈夫，勇能截鐵智盤珠。策從張許^②圍中決，氣自聶荊^③劍底紆。登堂破壁陳原委，存身何似潔身美。母爲妾進箸頭餐，妾爲母蹈池中水。清瀾碧漪翠漣漣，珠墜滄浪光耀天。懷兒驚碎萍心月，帶戚悲殘樹杪烟。烈烈幾曾居嫋嫋，求仁得仁真自樂。揚子^④何如池水香，瀨水娥江^⑤相繼作。兩地參天此一身，偷生隱忍可憐人。卓家有婦邗江^⑥畔，千秋生氣豈沈淪！前朝騎馬昨朝死，紛紛多見誰及此。二十年前余有言，大都女人勝男子！

①卓烈婦，見前注。

②廣陵謂揚州。

③張許謂張巡許遠，並見前注。

④聶謂聶政，荆謂荆軻，並

見前注。

⑤揚子謂揚子江。

⑥瀨水，謂七里瀨，在錢塘江上游。娥江謂曹娥江。

⑦邗江即邗溝，

今江南運河，自江都抵淮安，三百餘里，即古邗溝水。

俞國賢

國賢，字穎齋，明末山陰人。官參將，禦流寇，多著勞績，明亡，隱居卒。

軍中

蠢爾寇爲虐，赤子罹連遭。王師飛壓境，兵焰方熾然。東山數百里，去去無人烟。烏
鳶啄腐骨，烽燧明高天。落日下大營，令肅壁壘堅。鳴刀起四野，警夜中心懸。垢身
裹重甲，蟣蝨憑緣延。寶劍欲出鋏，雕弧不弛弦。決皆誓滅此，埽穢驅腥羶。苟得生
靈安，豈畏溝壑填。丈夫旣許國，那能圖萬全。

